



Republika e Kosovës / Republika Kosova / Republic of Kosova
Komuna e Podujevës / Opština Podujevo / Municipality of Podujeva

KUVENDI I KOMUNËS

Procesverbal i mbajtur më 29 korrik 2022 në mbledhjen e XIII-të (trembëdhjetë), të Kuvendit të Komunës së Podujevës, mandati i VII.

Mbledhja filloi në orën 10;20 dhe u mbajt në sallën e mbledhjeve të Kuvendit të Komunës. Mbledhjen e hapi dhe e kryesoi z.Hilmi Hoxha, Kryesues i Kuvendit.

Në mbledhje të pranishëm ishin të gjithë anëtarët/et e Kuvendit të Komunës së Podujevës, përveç znj.Adelinë Stublla dhe z.Ragip Fetahu të cilët munguan.

Gjithashtu në mbledhje i pranishëm ishte znj.Marigona Lahu Nënkryetare e Komunës, drejtorët e Drejtorive (DBF, DPZHE, DPKGJ, DKA, DPUMM, DSHPMSh, DBPZHR, DA, DSHMS)

Në mbledhje të pranishëm ishin edhe përfaqësues të mediave lokale, disa zyrtarë komunal dhe një numër i qytetarëve.

Rendi i ditës

z.Hilmi Hoxha, Kryesues i Kuvendit, e hapi mbledhjen duke i përshëndeti të pranishmit, ndër të tjera theksoi, në bazë të listës së nënshkrimeve të pranishëm në sallë janë 31 anëtar/e të Kuvendit ndërsa tani për tani mungojnë 4.

Sa i përket kësaj mbledhje konsideroj se të gjithëve ju është dërguar thirrja dhe materiali përkatës brenda afateve përkatëse ligjore, gjithashtu ju janë përcjellë edhe konstatimet e rekomanduara nga mbledhja e Komitetit për Politikë dhe Financa e mbajtur një ditë më parë ku keni mund të vëreni se janë rekomanduar edhe 4 pika shtesë që të përfshihen në kuadër të rendit të propozuar të ditës së bashku me materialin përkatës, kështu që urdhëroni nëse ndokush dëshiron fjalën.

z.Valon Demolli, theksoi, fillimisht më lejoni të bëjë të qartë se ky deklarim i imi është jashtë rendit të ditës dhe nuk ka të bëjë aspak me politikën partiake, por me integritetin e shërbyesve civil dhe me mendësinë e qeverisjes që është instaluar në Podujevë nga qeverisja e quajtur e ndryshimit.

Që nga fillimi i mandatit ata që erdhën në pushtet me sloganin Bashkë Qeverisim, kanë filluar mbrapsht dhe keq, dhe kur dështon t'i përmbush ato që i ke premtuar fajin gjithmonë e kanë punëtorët, kjo është gabim dhe shumë gabim dhe si rezultat i kësaj është edhe problemi që po shfaqet në administratën e Komunës. Qeverisa e “bishtit të sakicës” në krye me Shpejtimin, nis në seancën e kaluar duke ushtruar presion ndaj asambleistëve për votim apo mos votim, është çudi edhe nga Grupi i asambleistëve të tyre pasi që nuk ka reaguar askush.

Klimën zgjedhore brenda partisë LVV, e ka bartur fatkeqësisht edhe në administratën komunale, për t'iu hyrë në qejf disa aktivistëve, javën e kaluar duke tejkaluar komplet autoritetin e tij zyrtar Kryetari i Komunës ka nxjerrë vendime për transferimin e shërbyesve civil duke keqpërdorur rregulloren përkatëse për transferim të punëtorëve, dhe këtë për hakmarrje e degradim, e kjo në rend të parë vendosë paafësinë qeverisëse të këtij koalicioni duke mos përfillur asnjë procedurë ligjore ku së pari nxjerrën autorizime për kryerjen e detyrave dhe përgjegjësi të Drejtorive, madje kemi raste ku autorizimet bëhen në afat kohorë prej dy orësh, pra ka drejtor që vetëm dy orë ka qenë ushtrues detyre i Inspeksionit. Drejtorët në fjalë posa marrin urdhrat menjëherë fillojnë procedurat e

transferimit ndërsa Kryetari pa humbur kohë fillon ligjin për nxjerrjen e vendimeve dhe transferimeve. Me gjasë në mendje Kryetari i Komunës ka mbetur në vitin 2005 sepse në Komunën e Podujevës rregullativa ligjore nuk ekziston, punëtorët e Komunës për çdo ditë degradohen, poshtërohen, ndëshkohen dhe transferohen pa vullnetin e tyre dhe këtë më së mirë e argumentojnë transferimet e bëra që disa prej tyre po i cekë tani; zyrtari i shëndetësisë transferohet në kryeshef të inspeksionit, inspektori i tregut bëhet zyrtar për kulturë, inspektori i ambientit bëhet zyrtar i arshivës në bibliotekë, po ashtu ofiqari kalon në inspektor të tregut, zyrtari i lartë bëhet asistent administrativ, ndërsa zyrtari i prokurimit dërgohet në gjendjen civile, paramendojeni. Qysh bëhet kjo dhe qysh munden të punojnë këta njerëz mund ta di vetëm Kryetari, nëse jo ndokush nga Ekzekutivi do të doja të dëgjoja edhe nga të tjerët.

Shqetësuese është edhe fakti se është kapur edhe Sindikata e shërbyesve civilë të cilës nuk i është dëgjuar zëri.

Kryetari i Komunës, vendimet e ka nxjerrë duke shkelur Ligjin për zyrtarët publik dhe Rregulloren për transferime sepse transferet pas kërkesës së Drejtorisë mund t'i bëjë vetëm Njësia e burimeve njerëzore, mirëpo Kryetari në këtë rast i ka tejkaluar autorizimet zyrtare dhe këto ne do t'i adresojmë në organet e rendit, dhe njëkohësisht me këtë rast i ftoj organet kompetente që të merren me rastet në fjalë si dhe gjithashtu ftojmë edhe mediat, shoqërinë civile, sindikatën e punëtorëve që të na ndihmojnë në këtë çështje.

Po ashtu, pas gjithë këtij presioni të shërbyesve civilë, kam edhe një kërkesë edhe për mediat, përkatësisht kërkojmë që kamera të qëndrojë në vendin ku ka qenë.

Kryesuesi i Kuvendit, theksoi, ju lus që të qëndrojmë në rend të ditës dhe të mos dalim me diskutime jashtë rendit të ditës, e kemi pikën, Të ndryshme ku mund të diskutohen çështje të ndryshme por jo të na përsëriten dy pika Të ndryshme (në fillim dhe në fund). Pra në fillim të mbledhjes mund të diskutojmë vetëm rreth rendit të ditës.

z.Naim Çunaku, theksoi, po e bëjë një reagim e që në fakt nuk i përket shumë natyrës time sepse sigurisht se më njihni dhe jeni në dijeni se nuk jam nga ata që promovohem, e sidomos në rrjete sociale, mirëpo reagimi vie për shkak se zyra komunale e informimit në mënyrë tendencioze ka paraqitur mbledhjen e Komitetit për Politikë dhe Financa-KPF. Unë nuk jam kundër promovimit të Ekzekutivit dhe punës së tij në ueb faqen zyrtare, por në mbledhjen e KPF-së dihet roli i anëtarëve të tij. Forma se si është paraqitur ajo mbledhje për publikun në faqen zyrtare të Komunës, publiku nga ajo që është shfaqur ka mundur ta perceptoj se është një mbledhje e bordit të drejtorëve, përjashto këtu Kryesuesin e Kuvendit dhe Komitetit e që ndoshta ndokush ka mundur ta nënkuptoj se është kryetar i bordit të drejtorëve. E them këtë sepse të gjithë jemi dëshmitar të asaj që kemi parë dhe është e vërtetë e madhe se unë zyrtarëve të informimit individualisht ju kam potencuar se jeni duke ngjyrosur politikisht dhe të mos vazhdohet kështu, por përkundrazi vetëm kanë vazhduar më tutje.

Kësaj radhe nuk do ta zgjas më shumë, por meqë kjo zyrë është pjesë e kabinetit të Kryetarit të Komunës do të doja të jetë në përgjegjësi të punës së kryen, të jetë më profesionale, e pa anshme ashtu siç e kërkon rendi dhe Rregullorja për transparencën dhe informimin e drejtë të publikut.

Nuk dëshiroj të keqkuptohem sepse për qëllim e kisha që këtë çështje ta propozoj si pikë shtesë të rendit të ditës, ngase ja vlen të debatohet sepse zyra e informimit duhet t'i nënshtrohet rregullave të Komunës, ndërsa Komunën e përbëjnë edhe Kuvendi edhe Ekzekutivi, mirëpo meqë Kryetari i Komunës nuk është prezent këtu do ta kem parasysh që në një prej seancave të ardhshme ta paraqes si propozim për rend të ditës.

z.Xhevdet Maloku, theksoi, lus që t'i përmbaheni Rregullores së punës së Kuvendit, përndryshe herëve tjera pikën e rendit të ditës, Të ndryshme po zhvendosim të parën dhe po fillojmë nga ajo.

znj.Donjetë Sheqiri, theksoi, meqë u kërkua dhe po kritikohemi që po diskutohet sikurse të jemi në pikën Të ndryshme, atëherë lus edhe drejtorët e Ekzekutivit të qëndrojnë në sallë deri në fund të mbledhjes sepse deri më tani në asnjë seancë nuk kanë qëndruar deri në fund për t'i dëgjuar kërkesat tona.

Kryesuesi i Kuvendit, theksoi, meqë nuk ka të lajmëruar tjerë për të marrë fjalën, unë e hedh në votim rendin e propozuar të ditës sipas thirrjes dhe materialit përkatës të dërguar, si dhe duke përfshirë edhe konstatimet e rekomanduara nga mbledhja e Komitetit për Politikë dhe Financa.

z.Naim Çunaku, theksoi, ne kemi pasë një rend të ditës që na është përcjellë dhe kemi sugjerimet e KPF-së, andaj pikat e sugjeruara nga KPF duhet paraqitur si pika të veçanta para Kuvendit sepse të veçanta janë, pra ato pika të numërohen takstativisht dhe për të njëjtat të jepet arsyeshmëri përse ne si Kuvend duhet t'i votojmë apo jo.

Ne kemi rekomanduar si KPF, mirëpo arsyeshmërinë e tyre duhet ta bëjnë edhe në Kuvend sepse Kuvendi vendosë për rendin e punës.

Kryesuesi i Kuvendit, theksoi, konsideroj se drejtorët përkatës i kanë dhënë të gjitha arsyetimet në mbledhjen e KPF-së për ato pika shitesë që janë rekomanduar nga mbledhja e KPF-së dhe besoj se secili drejtor që ka propozuar pikat në fjalë do të jep edhe arsyetimet këtu në Kuvend, kështu që për t'i votuar për përfshirje në rend të ditës nuk kemi nevojë për arsyetim edhe njëherë ndoshta por në qoftë se ka nevojë besoj se drejtorët janë të gatshëm për dhënë, kështu që meqë u hedh në votim dhe u votua konsideroj se nuk kemi nevojë që procesin ta kthejmë mbrapa, pra 18 vota ishin Për, asnjë votë kundër dhe asnjë abstenim.

Kryesuesi i Kuvendit konstatoi se nga 31 anëtarë/e të Kuvendit të Komunës sa ishin prezent në sallë, me 18 vota PËR, asnjë votë Kundër dhe asnjë votë të përmbajtur (të tjerët nuk morën pjesë në votim), miratohet rendi i propozuar i ditës sipas thirrjes dhe materialit përkatës të kësaj mbledhje përfshirë edhe konstatimeve të rekomanduara nga mbledhja e Komitetit për Politikë dhe Financa e mbajtur më 28 korrik 2022.

1. Procesverbalet nga mbledhjet e Kuvendit, të mbajtura më; 29 prill 2022; 20 maj 2022 dhe 19 qershor 2022

z.Hilmi Hoxha, **Kryesues i Kuvendit**, theksoi, kemi tri procesverbale nga mbledhjet e Kuvendit, andaj urdhëroni nëse ndokush dëshiron fjalën, nëse jo atëherë i hedh në votim procesverbalet në fjalë ashtu siç ju janë përcjellë.

Pas votimit, Kryesuesi i Kuvendit konstatoi se njëzëri, nga 33 anëtarë/e të Kuvendit të Komunës sa ishin prezent në sallë, miratohen procesverbalet nga mbledhjet e Kuvendit të Komunës sipas materialit përkatës të kësaj pike të rendit të ditës.

2. Raporti i Zyrës Kombëtare të Auditimit, për pasqyrat financiare të Komunës së Podujevës për vitin 2021

- Plan i Veprimit për zbatimin e rekomandimeve të dhëna në Raportin e Zyrës Kombëtare të Auditimit

z.Fatlum Osmani, U.D. drejtor i Drejtorisë së Buxhetit dhe Financave-DBF, e paraqiti Raportin në fjalë, ndër të tjera theksoi, Raporti i Zyrës Kombëtare të Auditimit për Komunën është i një rëndësie të madhe për arsye se paraqet gjendjen reale të respektimit të ligjshmërisë gjatë aktivitetit të saj për vitin 2021, Raport i cili është me një opinion të pa modifikuar, pra është një raport pozitiv dhe sipas këtij raporti pasqyrat financiare të Komunës së Podujevës prezantojnë një pamje të drejtë dhe të vërtetë në të gjitha aspektet materiale në përputhje me standardet ndërkombëtare të kontabilitetit për sektorin publik. Baza sipas të cilës është krijuar opinionin pozitiv i Auditorit është konstatimi i tyre se transaksionet e kryera në procesin e ekzekutimit të buxhetit të Komunës së Podujevës kanë qenë në të gjitha aspektet materiale në përputhje me kriteret e përcaktuara të auditimit që burojnë nga legjislacioni i zbatueshëm në kontekstin e përdorimit të burimeve financiare.

Raporti i pa modifikuar i Auditorit është i një rëndësie të madhe edhe për shkakun se Komunës së Podujevës i mundëson një qasje në kredi investive nga Institucione ndërkombëtare financiare dhe në grante të tjera qoftë nga Organizata të huaja qoftë nga Ministritë sikurse që është granti i performancës.

Raporti në fjalë paraqet edhe të gjeturat që janë konstatuar kryesisht të natyrës teknike apo disa të gjetura të cilat nuk janë shkaktuar nga veprimet e Komunës së Podujevës por që kanë shkaktuar dëme edhe tek ne, pra janë gjithsej 12 të gjetura të Zyrës Kombëtare të Auditimit për të cilat kemi hartuar edhe planin e veprimit në mënyrë që këto të gjetura të mos përsëriten në vitin 2022.

Për fillim nuk dëshiroj të marrë kohë më shumë mirëpo gjatë debatit do t'i shkoqisim të gjitha këto të gjetura si dhe do të diskutojmë për planin e veprimit i cili është hartuar me qëllim të zbatimit e këtyre të gjeturave.

z.Arjant Topanica, në emër të Grupit të LDK-së, theksoi, sot në këtë mbledhje një ndër pikat e rendit të ditës është edhe pasqyrat e Auditorit dhe ajo se çfarë Auditori ka paraqitur se si shkojnë punët në Komunën e Podujevës. Fillimisht do të ndalesha tek hartimi i këtij Raporti të auditimit i cili duke marrë në përgjithësi ose në rast se e sheh dikush nga jashtë duket mjaft pozitiv, mirëpo në këtë pozitivitetin e tij fshehët diçka prapa tij, pra gjatë hartimit të tij janë bërë disa marrëveshje që kush i din veç e din për çfarë është fjala, me qëllim që ky Raport të del i tillë çfarë edhe është, por megjithatë nuk është i fshehur dhe edhe ky përmban një varg mangësish.

Tek arsimi dhe tek drunjtë dekorativ, si pika që të gjithë i dimë janë dy procese të cilat janë në procese gjyqësore kurse ne nuk i kemi të parapara në auditim, pra kjo është si pikë fillestare përse unë e thash më herët se ky Raport nuk është bërë në mënyrën më të mirë të mundshme dhe nuk është bërë në mënyrën më korrekte nga hartuesit e tij.

Ky Raport rezulton me 12 gjetje apo rekomandime prej të cilave 6 janë rekomandime të cilat janë përsëritur nga vitet e kaluara e që do të thotë se nuk është marrë askush me to, si dhe 6 janë të gjetura të reja. Tek gjetjet e mëhershme që janë përsëritur edhe në këtë Raport të auditimit do të përmend vetëm shkurtë për arsye se ato përsëriten edhe në gjetjet e këtij viti, si gjetje të mëhershme me të cilat nuk është marrë askush dhe që nuk janë përmirësuar janë subvencionimi dhe transferet, janë tek pasuritë e Komunës, tek llogaritë e arkëtueshme apo borxhet që qytetarët i kanë ndaj Komunës, dhe tek obligimet e papaguara për të cilat Komuna vazhdon të marrë gjoba nga proceset gjyqësore dhe ato të përmbauesit.

Si rekomandime të gjetura të reja tek raporti i fundit i auditimit janë pagesat përmes vendimeve gjyqësore për të cilat vetëm sa isha duke cekur, pra janë mbi 500,000.00€ pagesa që janë bërë si shkak i vendimeve gjyqësore apo si mos përmbushjes së detyrimeve të Komunës dhe për këto Komuna paguan nga taksat tona shumë prej 500,000.00€ për gjobat që ajo merr. Mandej janë mangësitë në menaxhimin e subvencioneve ku disa OJQ kanë përfituar në kundërshtim me ligjin për përfitime të OJQ-ve, ka raste kur ato në dokumentacionin e tyre nuk kanë paraqitur dëshmi se nuk i kanë kryer obligimet në ATK e që për këtë arsye nuk mund të jenë përfituese të subvencioneve por që në rastin tonë kanë përfituar, pastaj kanë paraqitur dëshmi jo relevante për këto pagesa e që më vonë është kuptuar se dokumentacionet e OJQ-ve nuk kanë qenë në rregull dhe korrekt por që edhe ato OJQ kanë përfituar, si dhe rast tjetër konkret është ku OJQ-të nuk kanë paraqitur fare raport financiar në dokumentacionet e tyre por që edhe në këto raste kanë përfituar. Mungesa e planit vjetor për financim të OJQ-ve është edhe kjo nga pikat e paraqitura në raportin e auditorit e që Komuna obligohet ta ketë një plan vjetor për financimin e OJQ-ve por që nuk e ka një plan të tillë. Mos pagesa e fatura dhe borxheve brenda afateve të caktuara ligjore, këtë çështje veç e ceka më parë se Komuna nuk ka arritur t'i përmbush borxhet dhe obligimet e saj në kohë reale e që për këtë arsye mund të ndëshkohet sepse lënda mund të shkoj tek përmbaruesi dhe kështu mund të ndëshkohet dhe të paguaj edhe kamatën e interesit

Klasifikim jo i duhur i kategorive të shpenzimeve, kjo si gjetje e auditorit që si rezultat i planifikimit jo të mirë ka raste kur për disa shpenzime merren para nga kodet tjera buxhetore dhe paguhen ato shpenzime. Pastaj mungesë e kontrollit gjatë përgatitjes së pasqyrave financiare është një e gjetur që pasqyrat financiare nuk janë të përgatitura në mënyrë të drejtë dhe të sakt. Mandej anashkalim i sistemit informativ të menaxhimit të burimeve njerëzore, pra për çdo ditë kemi konkurse e më shumë kemi të punësuar pa konkurse kurse kjo Komunë e anashkalon tërësisht sistemin informativ që është bërë me këtë qëllim që të lehtësoj dhe për të qenë më transparent procesi i burimeve njerëzore dhe menaxhimi i tyre. Vonesa në kryerjen e punëve të kontraktuara si e gjetur e auditorit që kjo Komunën dhe operatorët e saj kanë bërë gjatë realizimit të punëve të kontraktuara. Mandej kemi të gjeturën regjistrim jo i plotë dhe mangësi në menaxhimin e pasurisë e që sipas këtij raporti kjo Komunë tregon një kujdes të ulët ndaj pasurive që janë pasuri e taksapaguesve tanë/tonat e që kjo të dërgon tek një mos dijeni se çka ka Komuna në pronësinë e saj dhe ato si rezultat i kësaj mund edhe të tjetërsohen por edhe të manipulohen kur nuk janë të evidentuara si pasuri të Komunës.

Mangësi në menaxhimin e llogarive të arkëtueshme, pra Komunës së Podujevës në vitin 2021 i kanë borxhe qytetarët 4.3 milion euro prej të cilave 3.3 milion euro apo afër 80% janë borxhe nga tatimi në pronë e që Komuna nuk arrin të gjej mënyra dhe forma efikase si dhe politika të thithjes së këtyre borxheve të qytetarëve ndaj Komunës për realizueshmërinë sa më të madhe të llogarive të arkëtueshme, mirëpo që në këtë vit që jemi 2022 ky borxh veç është duke u rritur përkundër që do të duhej të zvogëlohej.

Si çdo raport edhe ky i auditorit të përgjithshëm i ka pikat pozitive mirëpo e jona është që qytetarëve t'i tregohet realja se çfarë po ndodh në këtë Komunë dhe atë do ta bëjmë gjithëherë deri në fund të mandatit, si dhe punëve të mira gjithsesi se do t'iu themi puna e mbarë.

z.Xhevdet Maloku, në emër të Grupit të LVV-së, theksoi, raporti i fundit i auditimit para së gjithash dallon shumë nga raportet e mëparshme të cilat kanë pasur të gjetura të cilat kanë shkaktuar dëme të konsiderueshme financiare në buxhetin e Komunës së Podujevës. Raporti në fjalë është vlerësuar si raport pozitiv i pa modifikuar dhe i cili përmban të gjetura të cilat janë kryesisht të natyrës teknike.

Vlen të përmendet fakti se nga 13 Komuna të Kosovës të cilat kanë pranuar raport pozitiv, vetëm 2 prej tyre janë Komuna të mëdha dhe njëra prej këtyre Komunave të mëdha është Komuna e Podujevës. Llogaridhënia dhe ndershmëria përkufizojnë transparencën e qeverisë, transparenca më e

madhe është e barabartë me nivelin më të ultë të korrupsionit, andaj sipas opinionit të auditorit pasqyrat vjetore financiare të Komunës së Podujevës prezantojnë një pamje të drejtë dhe të vërtetë në të gjitha aspektet materiale në përputhje me standardet ndërkombëtare të kontabilitetit për sektorin publik sipas kontabilitetit të bazuar në para të gatshme.

Raporti pozitiv i auditimit i mundëson Komunës së Podujevës përfitimin e donacioneve dhe kredive nga institucione Evropiane, ndër to siç është projekti i kolektorit të ujërave të zeza dhe granti i performancës nga MAPL.

Në emër të Grupit të asambleistëve të Lëvizjes Vetëvendosje, e vlerësojmë maksimalisht punën e qeverisë në arritjen e një rezultati të tillë nga raporti i auditorit, gjithashtu e vlerësojmë pozitivisht përgatitjen profesionale të planit të veprimit për zbatimin e rekomandimeve të Zyrës Kombëtare të Auditimit, pasi që ndjekja e rekomandimeve është nga fazat e fundit të procesit dhe kjo fazë në fakt paraqet vlerën e shtuar të organizatës që japin auditorët pasi që ndihmon përmirësimin e procesit, andaj kërkojmë nga Ekzekutivi i Komunës që të gjeturat e këtij raporti të mos përsëritën më por të veprohet menjëherë që të përmirësohen edhe këto pika dhe në raportin e ardhshëm të mos kemi gjetje të përsëritura.

z.Bashkim Syla, në emër të Grupit të PDK-së, theksoi, në raportin e auditimit të vitit 2020 zyra Kombëtare e Auditimit ka dhënë 14 rekomandime për vitin 2021, dhe nga ato 14 rekomandime 8 prej tyre janë zbatuar kurse 6 prej tyre jo. Unë dëshiroj të ndalem në 6 rekomandimet të cilat Komuna nuk i ka zbatuar, dhe atë; 1-subvencionet dhe transferet, përzgjedhja e përfituesve nga komisionet përkatëse të bëhen vetëm pasi të jenë plotësuar kërkesat e përcaktuara në thirrjen për aplikim, 2-përgatitja e planit vjetor për financimin e OJQ-ve dhe i njëjti të dërgohet në Zyrën e Kryeministrit, 3-regjistrimi i pasurive mbi dhe nën 1000€ në sistemet përkatëse, edhe në rekomandimin e 4-të është rekomandim i të njëjtës natyrë mirëpo të bëhet një krahasim i raporteve të inventarizimit me regjistrat e pasurisë, pastaj 5-llogaritë e arkëtueshme dhe efikasiteti i mbledhjes së borxheve si dhe shqyrtimi i masave ndaj operatorëve të cilët nuk i përmbushin obligimet, ndërsa rekomandimi 6-pagesa e faturave të bëhet në afatet ligjore.

Unë mendoj se disa prej rekomandimeve janë teknike të cilat mundën lehtë të përmirësohen kurse për disa prej tyre duhet një plan për t'i përmbushur ato.

z.Fatlum Osmani, U.D. drejtor i DBF-së, theksoi, ju falënderoj për diskutimet e bëra deri më tani për raportin e Zyrës Kombëtare të Auditimit për Komunën e Podujevës për vitin 2021 si dhe për planin e veprimit për zbatimin e rekomandimeve të dhëna me raportin në fjalë, plan i cili është hartuar nga ana jonë.

Edhe në fjalën hyrëse e potencova që elementi më i mirë dhe më pozitiv është që ky raport është raport i pa modifikuar dhe për faktin që në këtë edhe Zyra Kombëtare e Auditimit ka pasë pulitka shumë më strikte në auditimin e pasqyrave financiare e që si rezultat i kësaj pjesa dërmuese e institucioneve të Kosovës kanë dal me raport negativ financiar. Nga gjitha Komunitatet e Kosovës vetëm 13 prej tyre janë me raport pozitiv financiar dhe nëse i marrim Komunitatet e mëdha janë vetëm 2 prej tyre me raport të tillë, Podujeva dhe Gjakova, ndërsa të tjerat kryesisht janë Komunitatet e vogla të cilat kanë pasë një raport pozitiv financiar, dhe kjo është tepër e rëndësishme për arsye se investimet e mundshme që do t'i kemi nga institucionet financiare ndërkombëtare e që normalisht vijnë përmes Qeverisë së Republikës së Kosovës, sikurse që është impianti për trajtimin e ujërave të zeza, do të thotë në qoftë se ky raport do të ishte negativ atëherë ne nuk do të mundnim të aplikojmë për ato kredi, gjithashtu tek granti i performancës ku pritët të jetë ndoshta mbi gjysmë milion euro, sigurisht që nëse ky raport do të ishte negativ ne nuk do të mundnim të aplikojmë fare për këtë grant, prandaj po e them se këto janë ndikime shumë pozitive të cilat i ka raporti pozitiv i auditorit.

Sigurisht se ky raport i ka edhe të gjeturat për të cilat me të drejtë u diskutua këtu nga parafolësit, dhe shumë nga këto të gjetura janë të natyrës teknike por që të cilat ekziston mundësia të përmirësohen, ta zëmë plani për subvencionimin e OJQ-ve të dërgohet në Zyrën e Kryeministrit-Zyra për Qeverisje të Mirë, e që pa dyshim se është dashtë të dërgohet por sa unë jam në dijeni ka qenë i përgatitur por që nga Drejtoria përkatëse nuk e di përse nuk është dërguar, mirëpo që këtë vit dërgohet e që është një e gjetur teknike.

Gjithashtu janë edhe disa të gjetura tek regjistrimi i pasurive, por që në këto çështje ka edhe paqartësi ligjore dhe të gjithë jemi në dijeni se me vite të tëra janë disa problematika në regjistrimin e pasurive, bëhet fjalë edhe për disa pasuri të cilat janë të trashëguara dhe të ndërtuara pas luftës e që nuk ka një infrastrukturë ligjore të qartë se si do të regjistrohen ato, por edhe për disa lëshime teknike për regjistrimin e këtyre pasurive.

Ajo që ndoshta është e gjetura më shqetësuese që na shqetëson të gjithëve është tek çështjet e ekzekutimeve të buxhetit përmes vendimeve gjyqësore. Nga kontratat e prokurimit të lidhura në vitin 2021 dhe nga punët që ka kryer Komuna në vitin 2021 nuk është asnjë ekzekutim përmes procesit të vendimit gjyqësor, por të gjitha këto janë nga nënshkrimi i kontratave kolektive që kanë ndodhur nga niveli qendrorë nga Qeveritë e kaluara të cilat kanë nënshkruar kontrata kolektive pa mbulesë financiare dhe rrjedhimisht Komuna e Podujevës nuk ka buxhet as të planifikuar e as mënyrë se si t'i procedoj ato kontrata kolektive për pagesë dhe rrjedhimisht duke u bazuar në Kontratën Kolektive, kryesisht mësimdhënësit dhe mjekët i gjejnë rrugët e tyre përmes Gjykatave që t'i marrin ato mjete financiare e që është shumë shqetësuese mirëpo është diçka që nuk e ka shkaktuar Komuna e Podujevës e që de-facto e vuan edhe Komuna e Podujevës edhe pse ato mjete financiare janë paguar nga mjetet shitesë nga Qeveria e Republikës së Kosovës që do të thotë se nga ajo shumë nuk është prekur Komuna e Podujevës por si do që të jetë edhe ato mjete të qytetarëve kudo që merren.

Tek llogaritë e arkëtueshme, Komuna e Podujevës i trashëgon mbi 3 milion euro obligime që kanë qytetarët, kryesisht tek qiratë dhe tatimi në pronë, mirëpo edhe në bazë të këtij raporti vërehet se ka një rritje të ndjeshme të të hyrave nga tatimi në pronë, madje vitin e kaluar kemi pasë dyfishim të të hyrave nga tatimi në pronë, por që nuk kemi mundësi që ato mjete që janë grumbulluar për 20 vite të mblidhen për 1 vit, madje nuk ka as rrugë ligjore se si të mblidhen ato borxhe.

Ka pas raste që ka ndodhur Keq klasifikime, por kanë ndodhur kryekëput për të mirën e qytetarëve, dhe këtë e them duke marrë për bazë faktin ku ka raste kur është ofruar një donatorë për realizmin e ndonjë projekti të caktuar dhe ai donator ka kërkuar participim 10% të vlerës së Marrëveshjes, ne nuk e kemi pasë të planifikuar atë dhe nuk ka logjikë, as arsyeshmëri e as asgjë ta zëmë që të lëshohet një investim në shumë 100,000.00€ për një shumë prej 10,000.00€ nga ne si Komunë, dhe në këtë aspekt ne është dashtë të bëjmë ndonjë keq klasifikim në mënyrë që ai investim të shkoj në dobi të qytetarëve.

U përmenden edhe pasqyrat financiare dhe këtu absolutisht ashtu siç edhe e potencon raporti i auditorit janë në përputhje dhe paraqesin gjendjen reale të Komunës së Podujevës dhe janë të ndërtuara në raport me standardet ndërkombëtare të kontabilitetit në sektorin publik.

Përgjatë procesit ka ndodh një lëshim teknik i cili është përmirësuar përmes thesarit me rekomandim të Auditorit Gjeneral dhe në fund kemi pasqyra të drejta financiare.

Përveç anës pozitive, edhe diçka që është pozitive në raport me të gjeturat e vitit të kaluar, e mira është se nuk është asnjë e gjetur që i ka shkaktuar dëm financiar Komunës së Podujevës, përjashtimisht çështja e vendimeve gjyqësore e që nuk është diçka që e ka shkaktuar Komuna e Podujevës, për dallim nga viti i kaluar ku kemi anashkalime të procedurave të prokurimit 69,500.00€ blerje, pastaj tejkalim të kontratës kornizë që është konstatim i auditorit e që Komunës së Podujevës i është shkaktuar dëm financiar afër 40,000.00€, ka pas dobësi në menaxhimin e kontratave ku janë

paguar punë të pakryera, ka pas specifikime teknike jo të qarta dhe janë përmendur edhe emra tregtar që u janë drejtuar specifikimet teknike drejt operatorëve të caktuar, por fatmirësisht këto të gjetura nuk janë në vitin 2021 dhe duke shpresuar që të gjeturat e vitit 2021 të mos jenë në vitin 2022.

z.Arjant Topanica, theksoi, po nisem prej aty ku e la drejtori parafolës duke përmendur të kaluarën e që mendoj se ajo është e shkuar tash më dhe është bërë paksa e tepërt duke u kthyer të kaluarën sepse ne po flasim diçka çka është reale (ne po i themi shiko ku është rruga, drejtori po thotë shiko ku është gropa). Sa i përket asaj që u përmend se raporti i Zyrës Kombëtare të Auditimit është pozitiv dua ta potencoj se posa kanë ardhur në pushtet partia që këta përfaqësojnë e kanë ndërruar kryetarin e Zyrës Kombëtare të Auditimit, dhe për herë të parë dhe ndoshta prej rasteve më të rralla këtë raport e bënë dikush që është i këtij vendi, apo edhe i vendeve tjera për vendet prej nga vijnë, shembull raportin e Komunës së Podujevës e bënë dikush që është i anës tonë e që kjo nuk ndodh shpesh, madje ka pasë bujë edhe në media që kjo nuk është të lejohet.

Pastaj u përmend Kontrata Kolektive dhe u tha se nuk ka buxhet dhe nuk ka planifikim, atëherë do të doja ta di përse nëse nuk ka qenë e planifikuar dhe nuk ka buxhet përse ka qenë një prej premtimeve kryesore elektorale, këto dyja bashkë nuk shkojnë.

z.Fatlum Osmani, U.D. drejtor i DBF-së, theksoi, Komunën e Podujevës e kanë audituar tre auditor dhe kanë qenë të Komunave të ndryshme dhe pastaj Raporti i Auditorit kalon edhe disa filtra nga Zyra Kombëtare e Auditimit. Nuk dëshirova të lëshohem në detaje për këtë edhe pse më herët pati vërejtje për disa mostra të cilat nuk janë zgjedh, ka një procedurë teknike se si kjo Zyrë i përzgjedh mostrat, dhe ato mostra kanë qellu, ndoshta nëse ne do t'i zgjedhnim mostrat nuk do të ishin as këto 12 të gjetura ngase i kishim anashkaluar edhe këto, do të thotë ata i kanë zgjedh dhe sot kemi 12 të gjetura, po t'i zgjedhnim ne asnjë e gjetur nuk do të ishte.

Sa i përket ndikimit tek Zyra Kombëtare e Auditimit, unë nuk e di si mund të ketë ndikime të tilla kur ata kanë qenë për 1 muaj këtu dhe unë 2 herë i kam takuar, nuk kam shkuar unë me ta në Batllavë sikurse që kanë shkuar në të kaluarën, pra nuk ka kurrfarë mundësie të ndikimit, madje u cek ndikimi politik i LVV-së, mirëpo ka Ministri të ndryshme të cilat kanë dalë me raport jo pozitiv, andaj është absurditet logjik me mendu kështu, dhe tjetra unë nuk e di çfarë interesi ka Zyra Kombëtare e Auditimit që të hartoj një raport pozitiv të tillë për Komunën e Podujevës.

Prandaj është shumë pozitive që ky raport është pozitiv, janë edhe të gjeturat që cekën në raport por që nga asnjë e gjetur nuk paraqet asnjë cent dëmtim financiar të buxhetit të Komunës së Podujevës, përjashtoj ato vendime gjyqësore që nënshkruajshi Kontrata Kolektive pak para zgjedhjeve për me marrë ndonjë votë prej mësimdhënësve/arsimtarëve, pra kjo është e gjetura e vetme realisht, por sigurisht se edhe në vitin e ardhshëm do të ketë ndonjë të gjetur ngase asgjë nuk në perfeksion sepse po të mos ketë ndonjë gjë të tillë atëherë do të duhej të mbyllej i gjithë profesioni i auditimit, pra nuk ka mundësi asnjëherë të mos ketë asnjë të gjetur.

Edhe njëherë po e ritheksoi se dy çështje janë me rëndësi, 1-nuk ka asnjë cent dëm financiar të buxhetit të Komunës së Podujevës, dhe që 2-raporti është pozitiv ndër Komunitat e pakta.

z.Xhevdet Maloku, në emër të Grupit të LVV-së, theksoi, fillimisht do të doja nga administrata të shikohen se a punojnë edhe mikrofonat tanë që jemi ulur në anën e majtë apo jo sepse vetëm këta në anën e djathtë po shikohen, si dhe do të doja të ndalej gjuha e përdorur nga vendi prej në drejtim timin sepse nuk është mirë për qytetarët një gjuhë e tillë.

e kaluara nuk do të ishte e lehtë të harrohet ashtu siç po e kërkon opozita, po të mos ishte rëndësishme as tek raporti i auditorit nuk do të kishte të gjeturat të përsëritura apo të gjetura të cilat janë marrë për bazë dhe janë përmirësuar.

Është mirë të njoftohet opinioni dhe qytetarët se Komuna e Podujevës në vitin 2020 kishte lidhë Kontratë për blerjen e një kamioni për departamentin e zjarrfikësve në vlerë 69,500.00€ duke

anashkalar të gjitha procedurat e prokurimit publik, po ashtu kishte pagesa të avancit në kundërshtim me ligjin e buxhetit ku kishte paradhënie 20,850.00€ për blerjen e po këtij kamioni për zjarrëfikësit duke kaluar kështu 30% të vlerës së Kontratës kurse me ligj është deri në 15% të vlerës së kontratës. Gjithashtu kemi dobësi në procedura të prokurimit ku tek rregullimi i shtratis të lumit Llap-vazhdim është eliminuar oferta e operatorit ekonomik prej 136,666.00€, ndërsa kontrata e nënshkruar me operatorin ekonomik ishte 159,751.00€ apo 23,000.00€ më e madhe.

Po ashtu kemi të gjetura tjera ku është dëmtuar buxheti i Komunë me 31,000.00€ duke paguar kështu kompensimin e pagave të një punëtoreje të arsimit të lartë e larguar nga puna pa bazë ligjore, do të thotë kemi shkelje të ndryshme siç është edhe tek dhënia e subvencioneve te projekti për mullinj për prodhimin e ushqimit ku fermeri ka aplikuar me dokumentacion të një fermeri tjetër dhe përsëri ka përfituar subvencion.

z.Qëndrim Softolli, theksoi, fillimisht do të doja të ndërlihem me kolegun parafolës i cili nuk është hera e parë që po e mban rendin në Kuvend e që nuk është i thirrur për këtë gjë, pra në çdo seancë e jep nga një vërejtje por që nuk është detyrë e tij kjo. Sa i përket gjitha ato gjetje që parafolësi i ceku mendoj se vetëm i'a lehtësoj punën paksa drejtorit të DBF-së dhe nëse atij i duket se është dëmtuar buxheti më parë apo që auditori ka pasë gjetje të mëhershme për dëmtimin e buxhetit të Komunës atëherë edhe për Kontratat Kolektive është dëmtim i buxhetit sepse pagesat do të bëhen, madje disa prej tyre edhe përmes përmbaruesit e që ka edhe një lloj interesi ose kamate aty dhe rrjedhimisht është dëmtim. Pastaj është në prokurori edhe lënda tjetër për drunjtë dekorativ dhe nëse kjo i'u duket asgjë atëherë paraqiteni ashtu si të doni.

Drejtori goxha me injorancë i paraqiti të gjitha ato rekomandime dhe u mundua t'i zbus goxha shumë, por nuk janë ashtu asgjë fare siç i potencoj. Ka gjetje dhe pse është e vërtetë dhe nuk mund ta tjetërsoni që është ndikuar në raportin e auditimit, edhe pse drejtori e tha se nuk ka pasë interes për një gjë të tillë, ne e dimë këtë nga e kaluara se si shkojnë këto, e them këtë sepse drejtori e tha që keni qenë në Batllavë, kurse unë ju them se ju e keni pasë njeriun e fshatis Llapashticë të cilit i keni premtuar edhe rrugë edhe ndriçim, madje ai i'u ka premtuar banorëve të ati fshati duke i'u thënë se unë jua kryeva rrugët, e ceka këtë sepse drejtori më detyroi të lëshohem deri në këtë pikë.

z.Naim Çunaku, theksoi, pasi që diskutimet morën kahje tjetër e që edhe dje në mbledhjen e KPF-së apelova që institucioni është institucion kurse partitë politike janë parti politike, por që po tentohet të bëhet politikë gjegjësisht po involvohen edhe programet e partive politike edhe pse jam në dijeni se partitë politike funksionojnë dhe qeverisin në bazë të programeve të tyre politike, mirëpo sot të thirrresh në atë që ne e kemi dëmtuar buxhetin e Komunës për 500,000.00€ ngase dy partitë tjera që kanë qenë në pushtet e kanë nënshkruar Kontratën Kolektive, prandaj të mos harrojmë se ato parti që kanë qenë në pushtet nuk ka nënshkruar si parti dhe këtu nuk po mund ta bëjmë një dallim ngase ato kanë nënshkruar dhe kanë lehtësuar jetën duke i rritur pagat dhe mirëqenien e qytetarëve gjegjësisht punëtorëve të arsimit dhe shëndetësisë dhe kjo mua më bënë të ndjehem mirë, dhe çdo kush që arrin t'i'u përgjigjet kërkesave të arsyeshme të punëtorëve të vet për rritjen e mirëqenies më bënë të ndihem mirë, mirëpo ajo që nuk më bënë të ndihem mirë dhe që nuk po mund ta akceptoj është se pse gjithë ky averzion që të thuhet se një parti politike, në këtë rast duhet kush kanë qenë LDK-PDK që kanë nënshkruar, jo mor, Kontratën e kanë nënshkruar Institucionet e Republikës së Kosovës dhe ato Institucione e kanë shpallë edhe Republikën e Kosovës dhe çka tani të thuhet se ato e kanë shpall dhe nuk është e mirë, jo nuk mendoj kështu dhe konsideroj se duhet të lirohem nga këto sepse institucioni është institucion.

Meqë e mora fjalën dua të them se shqetësimi më i madh dhe kryesor për mua janë pagesat sipas Kontratës Kolektive që punëtorët i kanë realizuar në mënyrë të dhunshme me vendime gjyqësore në shumë 5000,000.00€ dhe e keqja është se shkak i mos azhurimit me kohë të atyre mjeteve që janë

paguar përmes vendimeve gjyqësore është dashtë të paguhet edhe interesi në shumë rreth 300,000.00€, dua të them se më e favorshme do të ishte që të parashiheshin me kohë në projeksione buxhetore dhe të paguheshin me kohë në mënyrë që të mos paguanim pastaj edhe kamata.

Për fund dua të them se shqetësuese është edhe një element, këto të gjetura në raport, qofshin të vogla apo të mëdha e që vazhdimisht na referohet se raporti nuk ka të gjetura dhe është në përputhje me këtë / atë, shqetësim për qytetarin e Komunës së Podujevës duhet të jetë që buxheti i Komunës së Podujevës i vitit të kaluar është shpenzuar 83.03%, dhe në vitin paraprak e që po duhet të merret referencë sepse po ndodh vazhdimisht të kritikohet një pushtet që ka qenë dhe të vazhdohet tutje, edhe ai e ka realizuar 83%, pra ndryshimi i vetëm është 0.3%, dhe krejt poenta ku dëshiroj të dal është se nga mos shfrytëzimi i buxhetit komunal qytetarët duhet ta dinë që Komunës së Podujevës në vitin 2021 i kanë mbete si të pashpenzuara rreth 2 milion e gjysmë euro, dhe a e kemi ne atë mirëqenie të ngritur të qytetarëve dhe a nuk ka pasë nevojë qytetari dhe Komuna se ku t'i adresoj dhe ku t'i shpenzoj si dhe cilat projekte t'i realizoj ato mjete për përmirësimin e jetës së qytetarëve, pra kjo është shqetësimi numër një.

Ndërsa tek pasqyrat vjetore financiare që janë prezantuar para Kuvendit, e potencova edhe në KPF dhe po përsërisë sërish, madje po e lexoj dhe nuk po e them diçka përmendësh, këtu në raport auditori konstatohet; *po ashtu procesi i raportimit në Komunë është përcjellë me mangësi, kjo është e vërejtur edhe me rastin e përgatitjes së pasqyrave vjetore financiare.*

z.Fatlum Osmani, U.D. drejtor i DBF-së, theksoi, ndoshta po e zgjatim paksa mirëpo dua t'i jap edhe dy përgjigje, u diskutua dhe ndoshta u shterë debati lidhur me çështjen e Kontratës Kolektive të cilën e vërtetë është se e kanë nënshkruar institucionet, mirëpo në institucione janë disa përfaqësues politik të cilët institucionin e kanë përdorë për përfitime elektorale dhe ajo Konstantë është nënshkruar në prag të zgjedhjeve dhe këtë e mbaj mend shumë mirë.

Tek çështja tjetër sa i përket raportit financiar, në vetë këtë raport thuhet se arsyeja përse ky raport është i pa kualifikuar dhe pozitiv, është se pasqyrat financiare paraqesin gjendjen materiale të sakt, në përputhje me standardet ndërkombëtare të kontabilitetit publik, dhe gjatë fazës së hartimit disa çështje teknike të cilat u lexuan nga parafolësi, janë përmirësuar, dhe nëse do të ishte ashtu siç e paraqiti parafolësi raporti nuk do të ishte pozitiv (romani nuk lexohet vetëm dy rreshta por duhet të lexohet komplet për ta ditë kuptimin).

Sa i përket asaj që u tha se këto të gjetura po paraqiten me injorancë, unë ju them se këto janë të gjetura dhe janë të sakta dhe ne kemi bërë një letër konfirmim sipas të cilës i kemi pranuar këto të gjetura si dhe e kemi ndërtuar një plan të veprimit që këto të gjetura t'i zbatojmë gjatë vitit 2022 e që shpresojmë dhe punojmë që t'i përmirësojmë.

z.Naim Çunaku, theksoi, pa dashur të zgjati debatin por që në fillim kur e thotë drejtori, Zyra Kombëtare e Auditimit kësaj radhe ka kriteret strikte, në një formë kalon prej kompetencës së tij dhe në një formë hynë dhe e kontrollon auditorin se kur paska rregulla strikte dhe kur paska "llastik", pra drejtori hynë në diçka që nuk na përket neve, as nuk kemi autoritet dh as nuk jemi ne ata.

Një qeverisje e mirë, naze e ka ligjin, llogaridhënien dhe transparencën, dhe tani e pyes drejtorin e DBF, a do të duhej që ne si anëtar të Kuvendit e në veçanti si Komitet për Politikë dhe Financa, dhe që është obligim ligjor ta kemi planin e punës së prokurimit, planin dhe raportin e punës së auditorit të brendshëm, raportin e performancës, e që po ti debatonim këto në Kuvend sigurisht se shumë lehtë do ta kuptonim dhe do të debatonim për raportin e Auditorit të jashtëm. Kështu që ajo kur e thotë drejtori i DBF-së, kriteret strikte, nuk po mund ta kuptoj çka nënkuptojmë me kriteret strikte, madje unë kam menduar se Auditori gjeneral ka kriteret të cilat vlejné për tërë territorin e Republikës së Kosovës, madje me këtë në një formë drejtori po del në kundërshtim sepse po e potencon se nuk ka

bërë asgjë ai (auditori) që ka qenë i anës tonë, në të njëjtën kohë po e thotë vazhdimisht kritere strikte.

z.Fatlum Osmani, U.D. drejtor i DBF-së, theksoi, e thash, kritere strikte sepse ka pas auditim në tërë Republikën e Kosovës shumë serioz, që ka zgjatë dhe që ka pas mostra më shumë qoftë tek pasqyrat financiare, qoftë tek keq klasifikimet qoftë tek regjistrimet e pasurisë, për herë të parë auditori i ka kualifikuar në raport, dhe në bazë të materialitetit që ka pasë për tërë Republikën e Kosovës dhe si rezultat i këtyre kritereve që kanë qenë të reja në një aspekt në procesin e auditimit e që pjesa dërmuese e Komunave për herë të parë kanë dalë me raport negativ, jo që në Kosovë është bërë ndoshta më keq se viteve të kaluara në ato Komuna, mirëpo për shkak të kritereve thuhet se kanë dalë me raport negativ të auditorit, pra kjo është çështja strikte.

Për pjesë të tjera të raportit të auditorit sigurisht se do të jenë pjesë e diskutimit në mbledhjet e ardhshme, por sot jemi duke diskutuar për raportin e Zyrës Kombëtare të Auditimit e që normalisht që auditim është bërë edhe tek çështjet e prokurimit.

Kryesuesi i Kuvendit, theksoi, urdhëroni nëse ndokush dëshiron fjalën, nëse jo atëherë kalojmë në pikën e tretë të rendit të ditës.

(Pra diskutimet përfunduan për këtë pikë të rendit të ditës dhe si pikë mund të konsiderohet e përfunduar)

3. Raporti Financiar janar - qershor 2022

z.Fatlum Osmani, U.D. drejtor i Drejtorisë së Buxhetit dhe Financave-DBF, e paraqiti Raportin në fjalë, ndër të tjera theksoi, raportin në fjalë e keni pranuar si material së bashku me thirrje e kësaj mbledhje, raport në të cilin janë paraqitur të gjitha shpenzimet e bëra përgjatë kësaj periudhe në bazë të planifikimit të buxhetit që ka qenë 23,449.521.00€, andaj janë paraqitur të gjitha shpenzimet e bëra për këtë periudhë kohore gjashtë mujore.

Për paga dhe mëditje janë shpenzuar 6,654,762.00€, për mallra dhe shërbime mbi 1 milion e 35 mijë euro, dhe kështu me radhë.

Diçka që ndoshta në pamje të parë mund të vërehet janë investimet kapitale ku nga rreth 6,949,000.00€ të planifikuara, janë shpenzuar vetëm 1,014,607.00€ e që sigurisht se në pamje të parë duket një trend jo i mirë i realizimit të investimeve kapitale mirëpo e vërteta është se kryesisht Komuna e Podujevës buxhetin për këtë vit nuk e ka pasë të miratuar deri në muajin prill e që normalisht se edhe procedurat e prokurimit për lidhjen e kontratave në këtë gjashtëmujor kanë zgjatur.

Ky raport është për gjashtëmujorin e parë të vitit, mirëpo sa për informimin e juaj vetëm në muajin korrik janë shpenzuar afër 1 milion euro tek investimet kapitale, do të thotë se komplet shuma e investimeve të bëra në gjashtëmujorin e parë tek investimet kapitale, janë investuar afërsisht vetëm në muajin korrik, pra përgjithësisht është trend i mirë në investimet kapitale por edhe tek kategoritë tjera dhe besojmë dhe punojmë që të kemi një balancim sa më të afërt të buxhetit.

z.Naim Çunaku, theksoi, sot po debatojmë për raportin financiar gjashtëmujor si një prej obligimeve ligjore që e ka Ekzekutivi i Komunës të paraqes para Kuvendit të Komunës si organ i cili mbikëqyrë gjegjësisht monitoron shpenzimet dhe menaxhimin e buxhetit.

Në mbledhjen e KPF-së e kam ngritur si shqetësim që për mendimin tim është i arsyeshëm, dinamikën e shpenzimit të buxhetit. Ne si anëtar të Kuvendit të komunës që jemi një prej mekanizmave të kontrollimit dhe monitorimit të shpenzimit të buxhetit, kur kemi para vetës raportet periodike financiare do ta ndihmonte shumë diçka që nuk e kemi, dhe atë, ne nuk e kemi planin e punës së Ekzekutivit, nuk e kemi një plan të punës së Zyrës së prokurimit dhe si rrjedhojë e kësaj ne nuk kemi se kujt t'i referohemi për dinamikën e zhvillimit të projekteve dhe shpenzimit të buxhetit, shtoj kësaj edhe raportimet e mangëta siç ishte raportimi i Kryetarit që ka qenë dy herë në vit, dhe nga ajo që kemi sot para vetës duhet ta trajtojmë vetëm duke bërë krahasimin e shifrave por jo pse kemi diçka tjetër të krahasojmë.

Shuma për investime kapitale në Komunën e Podujevës sipas buxhetit fillestar është rreth 7 milion euro, dhe kur ja shtojmë edhe të hyrat e bartura nga vitit i kaluar bëhet rreth 8 milion euro dhe sipas këtyre shifrave deri në këtë datë apo deri në fund të muajit korrik janë shpenzuar vetëm 14% e buxhetit, ndërsa nëse i referohemi buxhetit së bashku me të hyrat vetanake rezulton se për 7 muaj janë shpenzuar vetëm 12%, dhe kjo i bie se Ekzekutivi i Komunës po mburret me raportin, mirëpo vetëm në 5 muajt e ardhshëm duhet t'i shpenzoj edhe rreth 85% të buxhetit.

Me dinamikën e kësaj qeverisje, në vitin e kaluar kanë tepëruar buxhet afër 2 milion e gjysmë euro, kurse për këtë vit të shohim dhe shpresojmë të mos ketë mbetje të buxhetit sepse është në dëm të qytetarëve, dhe diçka që është në dëm të qytetarëve mua më bënë të preokupohem.

Tek kategoritë tjera buxhetore, për mallra dhe shërbime kemi rreth 40% të buxhetit të shpenzuar dhe kjo sigurisht se për këtë kategori zhvillimi i proceduarve janë tjera dhe më të lehta dhe ndoshta edhe mundësitë për t'u fshehur diçka nëpërmes tyre janë më të mëdha kështu që shkojnë përpara, pastaj për paga dhe mëditje nuk kemi çfarë të diskutojmë sepse ato janë fikse dhe s'ka si të mos shpenzohen.

Shqetësuese është edhe çështja e shpenzimit të buxhetit në fund të vitit, çështje kjo e cila edhe në raportin e auditorit për vitin e kaluar thuhet se në 4 mujorin e fundit të vitit janë shpenzuar më shumë se 4 milion euro, do të thotë për katër muaj janë shpenzuar më shumë se 4 milion euro, dhe atë me logjikën, të bëjmë çka të bëjmë por të mos mbetet buxhet (në një formë me “akshampazar”, me pagesa, avanse, pa mbikëqyrje të projekteve se a janë realizuar apo jo) dhe krejt më shqetësuese ka qenë tek bashkëfinancimi gjegjësisht tek donacionet, e që dihet se për të përfituar një donacion një OJQ ajo duhet të bëhet ose me shpallje publike në mënyrë që të garojnë OJQ-të ose përmes Kuvendit të Komunës, kurse neve na ka ndodh që për 12 orë i’u është bashkëngjitur bashkëfinancimi OJQ-së pa pasë vendim as të njëjës a tjetrës.

Ndoshta isha shumë sipërfaqësor dhe duhet të jem më konkret dhe t’iu referohem shifrave gjegjësisht shqetësimeve që kam dua të filloj t’i cekë në bazë të të dhënave që na janë ofruar kemi ndryshim të shpenzimeve krahasuar me vitin paraprak në një mori të kategorive dhe po e filloj nga faqe 5 e raportit ku më bëri përshtypje shpenzimi për kompjuter me më pak se 1000€ janë shpenzuar 21,355.00€ në këtë gjashtëmujor, mandej për pajisje tjera, e që për të qen një raport i kuptueshëm në rend të parë duhet ta ketë komponentën që ta bëjë të kuptueshëm atyre që duhet t’iu paraqitësh, në këtë rast neve anëtarëve të Kuvendit dhe në këtë aspekt ju lus që cili prej anëtarëve të Kuvendit mund ta kuptoj se në bazë të këtij raporti që e posedojmë të gjithë, pajisje tjera, shuma e shpenzuar 144,277.00€, çka pajisje tjera, përse nuk ka një sqarim tjetër, dhe kjo ka ngritje në krahasim me këtë periudhë të vitit të kaluar ku kemi pasë 50,000.00€, do të thotë kemi trefishim, pastaj furnizim për zyrë 31,134.00€ dhe sërish në krahasim me vitin paraprak ka shumëfishim të shpenzimeve sepse ka qenë rreth 18,000.00€, po ashtu kemi furnizimin me ushqim dhe pije në shumë 102,355.00€ ndërsa në vitin paraprak ishin vetëm 6,026.00€, unë nuk jam shumë profesional në matematikë dhe matematika ime nuk dinë të llogaritë se sa është përqindja e shpenzimit më e madhe, por si shifër di ta lexoj. Karburant për vetura shuma e shpenzuar 47,641.00€, dhe çka është interesant se për regjistrimin e automjeteve kemi 2,295.00€ dhe krejt në rregull, por për sigurim të automjeteve nuk kemi asnjë shumë të shpenzuar, çka i bie kjo.

Diçka që është duke i përcjellë raportet financiare qoftë periodike qoftë vjetore, qoftë të kësaj qeverisje qoftë të qeverisjeve të mëparshme meqë po kanë qejf t’i përdorin edhe ato të mëparshmet, është diçka shumë e dyshimtë që ne për çdo vit, pavarësisht kush është në pushtet, buxhetor krenohemi duke thënë vazhdimisht se në mandatin tonë kemi shtruar NN km asfalt, por çfarë na ndodh neve është se asnjëherë nuk janë duke u pakësuar rrugët që shtrohen me zhavorr dhe kjo do të ishte normale që sa më shumë rrugë shtrohen me asfalt aq edhe zvogëlohen rrugët me zhavorr, ndërsa krahasimi me vitin e kaluar është se deri tani në këtë vit kemi 141,581.00€ ndërsa në vitin paraprak 29,000.00€.

Ku e thash që raporti në rend të parë duhet të jetë i kuartit për neve ngase ai që e harton e di që e kupton, shembull, çfarë kuptoj unë me shpenzimin ku thuhet, rrethojat, dhe vlera e shpenzuar është mbi 15,000.00€, ku, çka, pse, dhe tani unë e di që mund të jepet shpjegim mirëpo është dashtë jepet shpjegim me raport, dhe kjo që e them nuk është referat ashtu siç po e quan nga vendi drejtori i DBF-së sepse për një raport financiar komponenta e parë e një raporti është se duhet të jetë i kuartit për atë që i’a paraqet, kurse ky që na është përcjellë, për mua nuk është i kuartit, dhe nuk jemi të gjithë ekonomistë këtu.

Pastaj kemi ndërtimin e rrugëve lokale, e që më parë e ceke një shifër tjetër kurse në një fa tjetër të raportit i është bashkëngjitur edhe një shifër tjetër shpenzuese ku thuhet ndërtimi i rrugëve lokale dhe shuma është 291,941.00€, po ashtu në vitin paraprak njëjtë ka qenë 372,000.00€.

Mandej për kanalizime, edhe këtu vazhdimisht ka lavdërime sepse punët e vogla ashtu janë për lëvdë, mirëpo kur nuk mendojmë se çfarë i kemi bërë ambientit, dhe sërish kanalizimet zënë një

vend prioritar në shpenzimet e këtij gjashtëmujori (lehtësim i ndokujt që ka nevojë për ndonjë kanalizim e taksirat për ata që janë afër lumenjve) dhe pse më doli kjo shprehje “taksirat” paska e pakontrolluar, dhe tani po nxitem paksa nga kjo dhe po e shtroj një pyetje të drejtpërdrejt për drejtorin e DBF-së, çka është bërë me kolektorin për të cilin mungon kodi buxhetor i ndërtimit të kolektorit që ka qenë i paraparë vite më parë dhe jeni në dijeni se Komuna e Podujevës ka hyrë në obligime financiare ndërkombëtare dhe çka është puna me atë kolektor, ne nuk po e shohim që është kryer dhe pyesim përse nuk është kryer si dhe a jemi ne tani të veprojmë apo të bëhet “sehirë” madje ta heqim edhe nga kodi buxhetor dhe ato mjete të cilat kanë hyrë në llogari dhe për të cilat kemi hyrë borxh e që duhet t’i paguajmë sepse janë borxhe ndërkombëtare për një projekt të cilit i kemi duartrokite të gjithë që rregullon çështjen e ambientit, dhe i njëjti të pezullohet në gjysmë, do të doja nga drejtori i DBF-së që pa politikë nëse ka sqarim të na tregoj se çfarë është puna këtij projekti sepse të paktën për mua është shumë shqetësuese.

Nuk po zgjati më shumë duke marrë për bazë dhe duke respektuar kolegialitetin, përkatësisht dikë nga Ekzekutivi i cili nga vendi po më thotë “bollë”, mirëpo nga kjo “bollë” që po e përfundoj tani, sigurisht se do ta vazhdoj pas diskutimeve të ë tjerëve.

Kryesuesi i Kuvendit, theksoi, falënderoj parafolësin mirëpo është mirë që në të ardhmen të deklaroheni se për jeni duke diskutuar në emër të Grupit që i takon. E them këtë ngase vërejta disa anëtar të Kuvendit të cilëve në një formë i’u pengoi diskutimi i gjatë i parafolësit pa u deklamuar se është duke diskutuar në emër të Grupit që i takon.

z.Naim Çunaku, lidhur me atë që Kryesuesi e ceku paraprakisht, theksoi, vetë fakti që dikush nga një Grup i anëtarëve të Kuvendit e merr fjalën i pari nënkupton se është duke diskutuar në emër të atij Grupi dhe kjo nuk ka dilemë. Edhe përkundër kësaj, Kryesuesi i Kuvendit është ai që duhet ta specifikoj në fillim këtë, përkatësisht të fton se kush dëshiron fjalën në emër të Grupit NN.

Kryesuesi i Kuvendit, duke i’u përgjigjur parafolësit, theksoi, mua nuk më pengon fare dhe shumë me kujdesë të dëgjova, mirëpo e vërejta se të tjerëve i’u pengoj kohëzgjatje e diskutimit dhe për këtë edhe e thash që të deklaroheni në fillim të diskutimit, përndryshe mua nuk më pengon fare dhe në asnjë moment nuk të pengova i nderuar Çunaku.

z.Artrit Mulliqi, theksoi, sa i përket kësaj teme ndoshta do të ishte mirë që kryesuesi i Kuvendit të mos shikon shumë disponim tonë si anëtar të Kuvendit por ta zbatoj Rregulloren e punës së kuvendit sepse shpeshherë po ndodh të ketë diskutime jashtë rendit të ditës, koha për përdoret pa nevojë si dhe po tejkalohet koha e lejuar si dhe gjithashtu po bëhen replika pa u përmendur emri, kështu krejt çka ka nevojë në këtë aspekt është që të zbatohet Rregullorja e punës.

znj.Donjetë Sheqiri, theksoi, kam disa pyetje për drejtorin e DBF-së, lidhur me disa rritje të shpenzimeve që janë bërë për të njëjtën periudhë gjashtëmujore që janë bërë në vitin 2021 dhe tani në vitin 2022, dhe atë, kemi kodin buxhetor 13250 që janë shpenzime telefonike e që në vitin 2021 kanë qenë 1,860.00€ kurse në vitin 2022 janë bërë shpenzime në shumë 2,446.00€, pastaj kemi kodin tjetër buxhetor 11900 që është për pagesa për vendimet gjyqësore ku në vitin 2021 kanë qenë 40,000.00€ kurse në vitin 2022 janë bërë shpenzime 334,000.00€ e që kjo dëshmon se si po qeveriset në këtë Komunë. Mandej kemi kodin buxhetor 13460 shërbime kontraktuese të tjera

(për shkak të problemeve të vogla shëndetësore me zërin, kërkon nga Kryesuesi që t’i jepet fjala sërish më vonë).

z.Arjant Topanica, theksoi, shkurtimisht do t’i cekë me përqindje disa rritje të shpenzimeve të cilat pothuajse mund t’i vëren gjithsecili besoj, dhe atë, tek shpenzimet për pagesat nga vendimet gjyqësore u përmend disa herë se për çfarë bëhet fjalë mirëpo si përqindje apo si vlerë që në këtë periudhë të vitit Komuna e Podujevës është dashtë të paguaj 838% vlerë të parasë më shumë se në vitin e kaluar, mandej kemi shpenzimet për ujë, që janë rritur mbi 80%, shpenzimet kontraktuese

janë rritur 50%, pastaj si kod që është shpenzimet tjera që janë shpenzime nën vlerën 1000.00€, kemi rritje 184%, furnizimet për zyrë janë rritur 70%, tek furnizimet për ushqim dhe pije kemi rritje 1600% në krahasim me vitin e kaluar dhe për këtë jemi në dijeni se në këtë vit ka inflacion dhe çmimet janë rritur mirëpo nuk ka inflacion 1600% te asnjë produkt. Gjithashtu tek derivatet për gjenerator nga 50€ që ka qenë periudhën e njëjtë të vitit të kaluar tani në vitin 2022 kemi të shpenzuara 5400.00€ apo 10000% rritje të shpenzimeve për derivate, andaj për të gjitha këto që janë në vlera më të mëdha do të doja sqarime dhe arsye përse janë rritur.

Tek shpenzimi i mjeteve buxhetore të destinuara për investime kapitale nga rreth 8 milion euro sa janë të parapara, deri në këtë periudhë të vitit janë shpenzuar vetëm rreth 1 milion euro.

znj.Donjetë Sheqiri, vazhdon, tek kodi buxhetor 13506 pajisje tjera mbi 1000€ e që në këtë periudhë të njëjtë kohore me vitin e kaluar ka rritje të shpenzimeve në vlerë 120,000.00€, andaj a mund të na tregoj përse dhe çfarë janë këto pajisje tjera.

z.Fatlum Osmani, U.D. drejtor i DBF-së, theksoi, duke bërë një përmbledhje të të gjitha këtyre që u ceken do të mundohem të japë të gjitha përgjigjet në formë të përmbledhur.

U cekë se suficidi për vitin e kaluar ka qenë 2.5 milion euro, edhe pse debati është për raportin financiar gjashtëmujor i vitit 2022, mirëpo meqë është e pa sakt atëherë më duhet ta them se suficid në vitin 2021 kanë qenë 921,000.00€ dhe kjo po lidhet me një çështje që në buxhetin e vitit 2021 ka qenë një klauzolë investive e që e kam sqaruar edhe më parë në vlerë 1,121,000.00€ që ka pasë të bëjë me kredinë me shtetin Austriak për ndërtimin e kolektorit të ujërave të zeza, projekt ky i cili edhe u përmend nga parafolësi, dhe rrjedhimisht për përmbylljen e asaj kontrate janë nevojitur vetëm rreth 363,000.00€, do të thotë se ato mjete nuk ka pasë mundësi të shpenzohen dhe që e vërteta tjetër është se edhe ajo shuma rreth 321,000.00€ nuk është shpenzuar në vitin 2021 për shkak të disa problemeve pronësore por që është duke u shpenzuar tani në këtë vit, pra ka filluar të shpenzohet nga muaji korrik dhe janë shpenzuar afër 100,000.00€ dhe pjesa tjetër po shpresojmë të shpenzohet gjatë këtyre muajve në vijim në mënyrë që të përmbyllet ajo kontratë për ndërtimin e kolektorit të ujërave të zeza deri në fshatin Lluzhan afërsisht aty ku, pra e kam cekë edhe më parë se kolektori ka qenë shumë i shtrenjtë dy herë mbi çmim dhe nuk është dashur t'i duartrokitesh në atë kohë (i drejtohet z.Naim Çunakut), por ne jse ndoshta nuk je mirë me matematikë ashtu siç e potencove dhe ndoshta për atë i ke duartrokitur.

Tek shpenzimet për mallra dhe shërbime po ashtu u tha një detaj, fshehje apo diçka të tillë që u tha se ka mundësi të fshehët diçka, mirëpo ti je asambleist që një kohë të gjatë (i drejtohet sërish z.Naim Çunakut) dhe trendi i shpenzimeve në mallra dhe shërbime kryesisht është trend linear për arsye se nevojat për mallra dhe shërbime janë të përditshme, ndërkohë që tek investimet kapitale është një logjikë paksa më tjetër për arsye se zakonisht periudha e parë shkon me proceduat e prokurimit që fillojnë nga fillimi i vitit dhe po ashtu është faza e dimrit ku në muajt janar, shkurt, mars dhe pothuajse gjysmën e prillit nuk mund të punohet, dhe për këtë e ceka se tani kemi filluar me një trend shumë të madh për arsye se siç e ceka sa është shpenzuar buxhet për 6 muaj, janë shpenzuar tani vetëm në muajin korrik, kështu që ajo që i përmenduri e potencoj, fshehje dhe të ngjashme, as nuk qëndrojnë dhe është paksa jo korrekte të thuhet pa asnjë argument, përndryshe nëse ke ndonjë argument thuaje konkretisht e jo në formë të përgjithësuar ashtu.

Tek pajisjet tjera, mund të them se kategorizimet se si bëhen për shpenzime dhe siç bëhet kodifikimi i tyre është në bazë të një plani kontabël e që e kemi diskutuar edhe më parë se për çdo shpenzim është një kod të cilin paraqet plani kontabël dhe e vërteta është se atë plan kontabël nuk bënë Komuna e Podujevës por është nga Ministria e Financave dhe ka disa shpenzime për të cilat shkojnë me një kod më të përgjithësuar, do të thotë nuk ka një kod specifik i cili e përcakton atë shpenzim në mënyrë shumë specifike, shembull, tek kodi pajisje tjera mund të blesh një aparat fotografik e të

ngjashme, por nuk ka një kod specifik që e vë atë aparat por e vë në kodin, pajisje të tjera, apo shembull, furnizimi me kabinete të shkencave natyrore që është bërë, nuk ka ndonjë kod specifik që mund të vëhet ky furnizim por kategorizohet tek kodi, pajisje të tjera.

Furnizimet me ushqim dhe pije, u tha se ka një rritje tepër të madhe e që është e vërtetë ajo, mirëpo në kuadër të kësaj është furnizimi me shujta për nxënësit e klasës I-rë deri në klasë të V-të, do të thotë në vitin 2021 nuk ka pasë por në vitin 2022 janë ato dhe normalisht ato e kanë koston dhe është afër 20,000.00€ në muaj.

Karburant për vetura, u cek shuma e shpenzuar mirëpo ne jemi dëshmitar të asaj se ka një rritje të çmimeve të naftës dhe ato i përcakton berza dhe normalisht ka pasë ngritje dhe kemi kosto tjera.

Lidhur me shpenzimet telefonike, kjo sigurisht se kur te marrim raportin përfundimtar për vitin 2022 kjo çështje do të jetë afërsisht e njëjtë me shpenzimet e bëra në vitin 2021 sepse kryesisht janë të ngjashme por arsyeja pse e kemi këtë është se ta zëmë në vitin 2021 fatura ka mund të paguhet në fillim të muajit korrik dhe nuk është përfshirë në raportin e gjashtëmujorit të parë për ata edhe kemi këtë diferencë mirëpo në fund do të jenë shpenzime të ngjashme sikurse në vitin 2021.

Për shpenzimet sipas vendimeve gjyqësore konsideroj se u konsumua kjo temë në diskutimet e mëparshme. Pra këto ishin disa përgjigje në mënyrë të përgjithshme për çështjet e ngritura nga parafolësit, shpresoj se nuk kam harruar ndonjë çështje.

z.Naim Çunaku, theksoi, falënderoj drejtorin parafolës për disa shpjegime që i bëri e në veçanti falënderoj që po tregon aq miqësi duke më treguar se kur të duartrokas e kur jo, mirëpo kur e potencova se projektit në fjalë i kam duartrokitur është se në të gjitha hulumtimet që bëhen në tregun e Komunës tonë për gjitha këto vite nga paslufta e deri tani, një prej problemeve kryesore që e rëndon jetën qytetare, përjashtoj këtë fazën e fundit me pandemi dhe me këto ngritje çmimesh që po ndodhin, ka qenë çështja e degradimit të ambientit jetësorë, dhe kur e potencova atë e pata parasysh sysh edhe historinë ku gjyshërit tanë na kanë mësuar që nuk bënë t'i ndotim në asnjë formë lumenjtë por duhet të përkujdesemi për ato, mirëpo në këto vitet e pasluftës, sigurisht ka shumë prej neve këtu që jetojmë në brigjet e lumenjve dhe jeni në dijeni se në çfarë gjendje ka qenë atëherë dhe çfarë është tani, prandaj kur është në shprehje një plan për ndërtimin e një kolektori të jeni të bindur se nuk më ka bërë përshtypje fare çmimi sepse nuk kam qenë njëri prej atyre që vendos për çmim, por si projekt ka qenë i mirëseardhur dhe për këtë e vendosa aksentin, madje i nderuar drejtor i DBF-së, sa për njohurinë tënde e që sigurisht të tjerët janë në dijeni që unë nuk kam qenë pjesë e asaj partie që e ka bërë atë projekt, do të thotë unë nuk kam telashe që projekteve të mira t'iu duartrokas kurdo herë që paraqiten, madje me qejfe do t'iu duartrokisja edhe ty (i drejtohet drejtorit të DBF-së) mirëpo nuk po më jep mundësinë sepse nuk je në nivel të duartrokitjeve.

Vazhdimisht po ndodh që drejtori i DBF-së paraqet shifra tjera dhe pastaj jep arsyetime jo ashtu jo kështu, unë nuk po shpikë asgjë por vetëm po i referohem Zyrës Kombëtare të Auditimit si një prej autoriteteve më kredibile që mendoj se është, dhe mbetjet e pashpenzuara në vitin 2021 e pranuan apo jo ne mund të renditet vit kampion i mos shfrytëzimit të buxhetit.

Po ashtu drejtori i DBF-së e potencoj se buxhetin për vitin 2022 e kemi miratuar në prill, nuk qëndron kjo sepse buxheti është miratuar në muajin janar dhe atë në një seancë të jashtëzakonshme, madje edhe në atë kohë ju kam pyetur përse po e miratoni me procedura të jashtëzakonshme kur kemi mundësi deri në muajin prill, por ne në janar e kemi miratuar dhe mos na e thuaj se e kemi bërë në prill, mos na thuaj se nuk kanë mbetur afër 2 milion e gjysmë euro prej shpenzimeve kapitale të pashpenzuara duke e cekur klauzolën investive, e them këtë sepse këtu kemi buxhetin fillestar, buxhetin final dhe buxhetin e shpenzuar, dhe këtë po e potencon auditori, jo unë, dhe jam i prirur t'i besoj një institucioni sikurse që është auditori i jashtëm, plus shtoj kësaj që sipas juve ka punuar në mënyrë strikte, skam si të mos i besoj.

z.Qëndrim Softolli, theksoi, gjithashtu edhe unë dëshiroj të ndërlihem te suficidi buxhetor ngase drejtori i DBF-së deklaroj se vetëm 900,000.00€ janë suficid, mirëpo i nderuar drejtor 900,000.00€ janë suficid vetëm tek grandi qeveritar, 800,000.00€ janë tek të hyrat vetanake dhe mbi 1 milion euro donacione dhe suficidi total po arrin shumë mbi 2 milion euro dhe këtë çështje e keni të paraqitur edhe në raportet e mëhershme financiare.

Pra ju drejtor kërkuat argumente, por argumente janë vetë numrat dhe kolegu parafolës i ceku vetëm numrat që ju na i keni sjellë me raportet e mëhershme.

Tek kategoria mallra dhe shërbime ju e potencuat se janë shpenzime ditore dhe është shpenzuar buxheti mbi 40%, kurse tek projektet kapitale vetëm 15% dhe u arsyetuat se deri në muajin prill nuk po mund të fillohet me fillimin e punëve për realizimin e projekteve shkaku i kushteve atmosferike, atëherë ne e dimë se vetëm në muajin nëntor mundemi të punojmë në realizimin e projekteve dhe tani po mbetet që 85% e buxhetit për investimet kapitale duhet të realizohet brenda këtyre tre muajve që kanë mbetur, dhe për këtë do të doja të dija se si do ta arrini këtë kur kanë mbetur vetëm edhe tre muaj. Ishte edhe një kod për ujësjellës e që në vitin 2022 është afër 80,000.00€ kurse në vitin 2021 ka qenë 12,000.00€, çfarë arsyetimi mund të më jepni për këtë.

Kryesuesi i Kuvendit, theksoi, edhe njëherë po e përsërisë, kur jepen përgjigjet e fundit nga drejtori atëherë më nuk ka çfarë të diskutohet tutje ngase pastaj po kalohet në replika.

z.Fatum Osmani, U.D. drejtor i DBF-së, theksoi, po ndërlihem sërish me çështjen e kolektorit që ka qenë ngase kjo po ndërlihdh tri çështje, suficidin, votimin në atë kohë si dhe çështjen e duartrokitjes që po përmendet. Fillimisht dua të them se është dashtë të duartrokitet kur është votuar Korniza Afatmesme Buxhetore sepse ky projekt tani realizohet me 1.5 milion euro e jo me 5 milion euro, do të thotë më mirë ka qenë t'i duartrokitet kësaj dhe besoj se është më e arsyeshme. Për çështjen e suficidit ju sqaroj se kanë qenë të planifikuara në buxhet 1 milion 125,000.00€ dhe në bazë të kontratës që ka qenë me Qeverinë Austriake për tu përmbyllur ai projekt janë nevojitur vetëm 321,000.00€, andaj ato mjete vetëm kanë qenë të planifikuara në buxhet por nuk kemi pasë të drejtë t'i shpenzojmë ato sepse ato mjete që kanë qenë të planifikuara përmes marrëveshjes së kredisë me Qeverinë Austriake të shpenzohen për çështje të tjera, dhe fillimisht ka qenë e ditur se ato mjete kanë figuruar vetëm si numër rrjedhimisht dhe nuk e di përse është futur në atë mënyrë sepse buxheti i vitit 2021 është miratuar në vitin 2020 dhe ne nuk kemi qenë në atë kohë në pushtet prandaj edhe nuk e di arsyen përse ka ardhur deri në këtu, andaj e them se për mua ka qenë e çuditshme.

Te çështja e investime kapitale, u përmend edhe çështja e planit të prokurimit, për këtë vit mund të them se kanë mbetur vetëm edhe një ose dy projekte të pa proceduara në prokurim, të gjitha projektet janë në fazën e lidhjes së kontratës ose në fazën e vlerësimeve, do të thotë janë në përfundim dhe tani jemi në muajin korrik dhe po besojmë se muaji gusht do të na gjej me ët gjitha kontratat e nënshkruara dhe do të fillojnë punët. Tani nuk ka shumë projekte, madje 2-3 projekte janë milionëshe kurse të tjerat janë me vlera më të vogla 70,000.00€ 80,000.00€ dhe janë projekte të cilat fazën e realizimit dinamik e kanë 30 ditë, 60 ditë nga momenti i lidhjes së kontratave, përjashtimisht ndonjë çështje që mund të ketë ndikim të jashtëm apo që ndonjë operator mund të jetë i pa përgjegjshëm që nuk i kryen punët apo çështje të tjera, përndryshe të gjitha këto kontrata të investimeve kapitale janë të realizueshme.

Sa i përket çështjes së ujësjellësit, ju them se edhe këto shpenzime të ujit kryesisht janë proporcionale, por në këtë raport financiar reflektohen në raport se kur janë likuiduar pagesat, kështu që për këtë më saktësisht përse është kjo diferenca mes vitit 2021 dhe këtij viti ka të bëjë vetëm me këtë çështje.

z.Artrit Mulliqi, theksoi, në qoftë se ka mundësi meqë sot është e premte dhe shumë asambleistë e falin Xhumanë, t'iu mundësohet që nga 12:00 deri në 13:30 të marrim pauzë, dhe për këtë kërkoj mirëkuptimin e juaj.

Kryesuesi i Kuvendit, theksoi, e hedh në votim kush jeni që të shkojmë në pauzë nga ora 12:30 deri në ora 13:30.

z.Qëndrim Softolli, theksoi, i nderuar Kryesues, ne patëm një propozim për pauzë që e ceku kolegu z.Naim Çunaku, e që ishte nga ora 12:00 deri në ora 13:00 ose 13:30, andaj meqë ishte propozim i parë do të duhej të hedhet në votim sipas radhës.

Kryesuesi i Kuvendit, theksoi, kolegu z.Naim Çunaku e bëri propozimin për pauzë dhe doli jashtë kështu që nuk di tani se si të veprojmë. Ne shpesh herë duhet të gjejmë gjuhë të përbashkët mes vete dhe as unë e askush nuk jemi që ta pengojmë ndokënd që të shkon dhe at kryen një rit fetar që e pëlqen dhe që është i interesuar të shkoj. Pra të bëhemi më kolegial dhe ta mirëkuptojmë njëri tjetrin. Unë e hedha në votim një propozim dhe sërish e propozoj që të shkojmë në pauzë nga ora 12:00 deri në ora 13:30.

Me mbështetjen e shumicës së anëtarëve, Kuvendi shkon në pauzë për një orë e gjysmë dhe atë deri në ora 13:30

Pas pauzës, mbledhja vazhdon në ora 13:45

Kryesuesi i Kuvendit, konstatoi kuorumin ku aktualisht prezent në sallë ishin 25 anëtarë/e të Kuvendit, dhe në vazhdim para se të vazhdohet me punë sipas rendit të ditës, me kërkesë të anëtares së Kuvendit znj.Tringa Sfishta, i jepet fjala jashtë rendit të ditës.

znj.Tringa Sfishta, theksoi, i nderuar Kryesues i Kuvendit dhe gjithë Ju të pranishmit tjerë, për shkak të ngjarjes që ka ndodhur sot kërkoja fjalë rasti dhe ju lus për vëmendje.

Edhe sot në vazhden e aksidenteve me keqardhje shumë herë me fatalitet sikurse rasti i ditës së sotme që sa i dhimbshëm aq tronditës humbja e 2 bashkatdhetarëve tanë në këtë aks rrugorë magjistrallja Podujevë-Prishtinë të cilën dikur faktori ndërkombëtar e quanin “rruga gjarpri”, me të vërtetë është bërë më e rrezikshme se vetë gjarpri dhe lirshëm mund ta quajmë “rruga e vdekjes”, deri kur, pse ndodh kjo dhe a mjafton të shikojmë dhe të bëjmë sehire apo të ndërmarrim ndonjë veprim në shenjë solidariteti dhe proteste, solidaritet me atë që e pësuan dhe protestë ndaj mos gatishmërisë për përfundimin e kësaj rruge.

Me sinjeritetin më të madh njerëzor ky shqetësim nuk do të duhej të merr ngjyrim politik e as të adresoj fajësi askujt sepse vdekjet nuk kanë ngjyrim politik, nuk kanë parti, andaj pa parti dhe pa ngjyrim politik ju ftoj 1 minutë heshtje për të rënë e fundit, atyre dje e që me keqardhje kjo do të vazhdoj deri sa nuk bëhet asgjë në këtë rrugë.

Mbahet 1 minutë heshtje në shenjë solidariteti me familjen e dy viktimave – mërgimtar nga aksidenti i ndodhur në mëngjesin e datës 29.07.2022 në magjistrallen Podujevë-Prishtinë.

znj.Tringa Sfishta, vazhdoi, në shenjë revolte lidhur me mos veprimin e drejt finalizimit të këtij projekti, të dielën duke filluar nga 12:00 tek rrethi i fshatit Siboc do të organizojmë protestë prej 30 minutave duke bllokuar qarkullimin në këtë magjistrale, andaj ftojme të gjithë anëtarët e Kuvendit, Deputetët Llapjan të Kuvendit të Republikës së Kosovës dhe qytetarët e Komunës së Podujevës, të na bashkohen në këtë revoltë të dielën në ora 12:00 tek rrethi i fshatit Siboc në magjistrallen Podujevë-Prishtinë.

z.Artrit Mulliqi, theksoi, para se të fillojmë me rendin e ditës, unë në emër të Grupit të LVV-së shpreh shqetësimin për sulmin që i është bërë asambleistit të Grupit tonë Xhevdet Maloku gjatë pjesës së parë të seancës nga asambleisti i Grupit të LDK-së Ekrem Rrahmani.

Kërkoj nga Grupi i LDK-së që të distancohen nga këto sjellje, do të thotë nga sulmi verbal dhe fyerjet që i ka pësuar si dhe gjithashtu kërkoj të kërkoj falje sepse në njërën anë në disa seanca po përdoren disa fraza të nxjerra nga disa kontekste sikurse që janë “bishti i sakicës” , “dhuna” e të ngjashme, ndërsa në anën tjetër në vazhdimësi është duke u zhvilluar dhunë ndaj asamblistëve tanë.

Kryesuesi i Kuvendit, lidhur me çështjen e ngritur nga parafolësi, theksoi, sigurisht që e keni parë se unë si Kryesues i Kuvendit gjithherë kam qenë që të mos kalohet në probleme private dhe personale por gjithherë të diskutohet për tema të cilat na takojnë.

Gjithashtu falënderoj anëtarin e Kuvendit znj.Tringa Sfishta e cila na e përkujtoj një rast jo të mirë dhe tragjik e që po ndodhin raste të tilla shpeshherë në rrugën Podujevë-Prishtinë. Ndjejë shumë keqardhje për atë familje ku dy prindër kanë vdekur dhe janë lënduar fëmijët e tyre në aksident të mëngjesit të sotëm, shprehim ngushëllime familjes. Jemi në dijeni se rruga Podujevë-Prishtinë është shumë në gjendje të keqe dhe si pasojë ka sjellë shumë viktima e sidomos gjatë sezonit të verës kur bashkatdhetarët kalojnë nëpër këtë rrugë e cila për ata është pothuajse e panjohur sepse janë bërë riparime dhe po shkakton viktima pothuajse për çdo vit, kështu që shprehim ngushëllime dhe ndajmë dhimbje bashkë me familjen që ka humbur dy anëtarë dhe fëmijëve të lënduar i'u dëshirojmë shërim sa më të shpejt.

4. Propozim vendimi për caktimin e normave të tatimit në pronë për vitin 2023

z.Fatlum Osmani, U.D. drejtor i Drejtorisë së Buxhetit dhe Financave-DBF, e paraqiti propozimin në fjalë, ndër të tjera theksoi, caktimi i normave tatimore sipas këtij propozim vendimi është bërë në bazë të Ligjit për tatim në pronë dhe në këtë ligj janë të përcaktuara minimumet dhe maksimumet e normave tatimore për çdo kategori të pronave për të cilat ne mund ti tatimojmë dhe normalisht këto janë tek të hyrat vetanake por që përcaktohen me Ligjin për tatimin në pronë.

Normat tatimor sipas këtij propozim vendimi pothuajse janë në minimumin e tyre që përcaktohen me ligj, përjashtimisht tek një kategori, dhe janë të njëjta me vitin e kaluar përjashtimisht tek kategoria për objekte industriale ku tatimi në pronë është ulur nga 0.2% në 0.15% me qëllimin që sa do pak të stimulohen bizneset prodhuese Llapjane.

z.Burim Hasani, nga Grupi i këshilltarëve të AAK-së, theksoi, pasi që jemi në një gjendje të rëndë ekonomike dhe sociale, kërkoj që pika 4 e rendit të ditë, tek neni i propozim vendimit të lirohen nga tatimi në pronë të gjithë qytetarët e Komunës së Podujevës, përkatësisht tek pika 1.1 për njësi të parcelës bujqësore, pika 1.2 për njësi bujqësore të objekteve, pika 1.3 për njësi pyjore, po ashtu edhe pika 1.4 për njësi rezidenciale. Prandaj sërish po e përsërisë që pasi jemi në një gjendje të rëndë ekonomike-sociale, do të kërkoja nga të gjithë anëtarët e Kuvendit që të më përkrahin dhe që viti 2023 të mos tatimohet për këto pika që i ceka.

z.Naim Çunaku, theksoi, në emër të këshilltarëve të Grupit të LDK-së shprehë gatishmërinë në mbështetjen e plotë të propozimit të kolegut parafolës nga radhët e AAK-së. Pra si Grup i këshilltarëve e mbështesim në plotni.

Duke pasë parasysh se drejtori i DBF-së i ceku disa tarifa të cilat janë të caktuara nga një instancë tjetër dhe e vërteta e madhe është se a jemi ne në minimumin e asaj tarife, si dhe bazuar në atë që e shprehu kolegu parafolës se në gjendjen e tanishme në Kosovë dhe me vetë orientimin e partisë në pushtet unë besoj se duhet të mbështetet kjo çështje për lehtësimin e sa do pak të jetës së qytetarëve, gjegjësisht në ruajtjen e mirëqenies së tyre.

z.Kasib Bashota, në emër të Grupit të këshilltarëve të LVV-së, theksoi, e mbështesim këtë pikë të rendit të ditës për të cilën edhe drejtori i DBF-së në fjalën hyrëse e ceku se këto tarifa janë të përcaktuara në bazë minimale nga niveli qendrorë, andaj si Grup i japim mbështetje.

z.Gazmend Islami, theksoi, natyrisht se jemi në dijeni se Komunës i duhen mjetet buxhetore për të mbijetuar, por duke marrë parasysh edhe gjendjen e rëndë ekonomike që janë qytetarët Llapjan dhe e gjithë Kosova, pra kemi një rritje enorme të çmimeve, është mirë që drejtori i DBF ta bëjë edhe njëherë kalkulimin e normave në mënyrë që ky vit të jetë më shumë solidar në mbështetje të qytetarëve tanë sepse ashtu e kështu gjendjen e kanë shumë të rëndë, prandaj e them që është mirë drejtori ta shqyrtoj edhe njëherë këtë propozim vendim, përndryshe e mbështesë propozimin e anëtarit të Kuvendit nga radhët e AAK-së.

z.Fatlum Osmani, U.D. drejtor i DBF-së, theksoi, tatimi për pronën e paluajtshme përcaktohet Ligji për tatimin në pronë dhe dihet qartë se ligjet miratohen nga Parlamenti i Republikës së Kosovës, do të thotë se ne si asamble komunale nuk jemi kompetent ta hedhim poshtë një ligj.

Përveç dispozitave tjera që i përmban Ligji për tatimin në pronë, përcakton edhe limitet minimale dhe maksimale të cilat duhet të tatimohet prona.

Për njësitë e parcelave bujqësore, edhe pse është e përcaktuar me ligj, kjo normë tatimore nuk është duke u aplikuar tatimi, do të thotë bëhet fjalë për parcelat bujqësore që shërbejnë për të mbjella, ndërsa për njësitë tjera përcaktohet norma tatimore dhe ne në bazë të vendimit të vitit të kaluar tek objektet e njësive industriale ka qenë 0.2 kurse ne e kemi ulë në minimum 0.15 dhe për bindjen time dhe ndoshta për bindjen e shumë të tjerëve për objekte industriale me qëllim që ta stimuluar

prodhimin ndoshta do të ishte ideja që ta ulim në 0.1 ose 0.5, mirëpo ligji e ka këtë minimum nga 0.15 deri në 0.5, dhe është në kompetencën tonë që të propozojmë dhe e Kuvendit të Komunës që të miratoj normat tatimore dhe të përcaktoj minimumin apo maksimumin, e që ne jemi në minimum.

Po ashtu edhe një sqarim tjetër që besoj se është i vlefshëm, në rast se nuk miratohet ky propozim vendim, Ministria e Financave i aplikon normat tatimore të cilat janë aplikuar në vitin e kaluar, do të thotë në momentin që nuk miratohet deri më 31 dhjetor 2022, fillojnë aplikohen normat tatimore sikurse në vitin e kaluar, e që i bie se janë më të larta, përkatësisht tek kategoria e objekteve industriale për 0.05% e që tani është 0.2, kështu që vetëm është në kompetencën e Komunës se a dëshiron t'i lë normat tatimore sipas vendimit të vitit të kaluar apo dëshirojmë të miratojmë këtë propozim vendim, për tjera gjëra nuk ekziston mundësi.

z.Gazmend Islami, theksoi, nuk kuptova drejtorin parafolës për normat e përcaktuara tek parcelat bujqësore, çfarë deshi të thotë, a është detyrim që duhet të paguhet sepse parashihet në vendim, dhe këtë e them sepse mund të thuhet tani se nuk paguhet por pastaj mund të futemi në borxhe si qytetar, pra a është i liruar apo jo qytetari për këtë kategori.

z.Fatlum Osmani, U.D. drejtor i DBF-së, sqarim parafolësit, theksoi, këto i përcakton ligji, mirëpo tek çështjet e parcelave bujqësore edhe pse është e përcaktuar me ligj ky minimum prej 0.15 dhe ne duhet ta inkuadrojmë në propozim vendim, Ministria e Bujqësisë në bashkëpunim me Ministrinë e Financave nuk është duke e aplikuar ende tatimin për toka bujqësore që janë të mbjella. Do të thotë në vitin 2022 nuk ka tatim për toka bujqësore e nuk do të ketë besojmë as në vitin 2023, mirëpo meqë është e përcaktuar me ligj edhe ne është dashtë ta parashohim në propozim vendim, por besojmë se nuk do të aplikohet.

Kryesuesi i Kuvendit, theksoi, ne kemi një propozim të dhënë nga anëtar i Kuvendit z.Burim Hasani, mirëpo sipas asaj që e ceku drejtori i DBF-së, ne nuk kemi të drejtë ligjore që ta heqim krejt tatimin në pronë, do të thotë ne duhet të angazhohemi që normat tatimore t'i përcaktojmë në minimumin e limiteve të përcaktuara me ligj si hapësirë se si dëshirojmë të caktojmë.

z.Fatlum Osmani, U.D. drejtor i DBF-së, sqarim shtesë, theksoi, meqë po insistohet tani të vëhet në votim propozimi i anëtarit të Kuvendit z.Burim Hasani, në qoftë se ky Kuvend merr një vendim të tillë krejt çka mund të arrihet është ngjallja e konfuzionit tek tatim paguesit dhe ata ta konsiderojnë veten se janë të liruar nga tatimi në pronë, ndërkohë që atyre do t'u aplikohet tatimi në pronë e që është sistem tatimor të cilin e menaxhon Ministria e Financave, pro krejt çka është e Komunës është delegimi i të drejtës që të mbledh këtë tatim dhe ta konsideroj si të hyrë vetanake dhe ta përdorë për qëllime të vet Komunës, andaj në rast se ngjallet ai konfuzion dhe qytetarëve i'u ngarkohet tatimi do të ndodh që nuk do ta paguajnë dhe pastaj do të marrin edhe penalitete e të cilat janë shumë të mëdha të cilat i përcakton Ministria e Financave e që janë deri në 20% të borxhit për një vit.

Prandaj me këtë që u propozua ne vetëm mund t'u ngjallim konfuzion qytetarëve dhe t'i fusim në borxhe, obligime dhe penalitete deri në 20% të vlerës së tatimit, kështu që unë e them që këtë çështje nuk do të duhej t'ju bëhet qytetarëve, për të mos thënë politike.

Kryesuesi i Kuvendit, theksoi, t'ju them të drejtën unë nuk jam që të krijohet konfuzitet tek qytetarët, pra as nuk jam që të mbrohet as drejtori parafolës dhe askush tjetër, mirëpo nëse është ashtu siç u tha ne nuk kemi nevojë të veprojmë në kundërshtim me ligjin.

z.Naim Çunaku, theksoi, e dëgjova Kryesuesin e Kuvendit se në cilësi të pozitës që ka deklaroi se nuk është që të krijoj konfuzion, por unë i them se nëse Kryesuesi është që të mos krijohet konfuzion, atëherë aplikojë Rregulloren e punës së Kuvendit dhe nuk ka kurrfarë konfuzioni.

Kryesuesi i Kuvendit, theksoi, nëse është e mundur të takohen shefat e Grupeve të këshilltarëve dhe të konsultohen mes veti se si të veprojmë tutje ngase askush nuk e besoj që është për shkeljen e ligjeve, kjo është me rëndësi.

z.Valon Demolli, theksoi, nuk e shoh të arsyeshme të takohen shefat e Grupeve të këshilltarëve, por vetëm kërkoj ta vëni në votim propozimin e kolegut z.Burim Hasani, kaloj, nuk kaloj.

Kryesuesi i Kuvendit, theksoi, sigurisht jeni në dijeni se çdo vendim i Kuvendit të Komunës vlerësohet nga Ministria e Pushtetit Lokal në aspektin e ligjshmërisë, dhe në këtë aspekt nuk dëshiroj që të na kthehet ky vendim dhe asnjë tjetër shkak i mos ligjshmërisë, pra edhe neve na kontrollon Ministria.

z.Fatlum Osmani, U.D. drejtor i DBF-së, theksoi, tek pjesa hyrëse e këtij propozim vendimi është se në çka është i bazuar e që janë Ligji për vetëqeverisje lokale, ligjin për tatimin në pronën e paluajtshme, andaj nëse ndokush ma shpjegon mua se si ka mundësi që asambleja komunale ta hudhë poshtë një ligj, të na e shpjegoj. Kjo po dihet se është lojë politike ku pastaj të dilet tek qytetarët dhe t'iu thuhet se ne po dëshirojmë t'ju lirojmë prej tatimit.

znj.Donjetë Sheqiri, theksoi, i nderuar Kryesues i Kuvendit, në bazë të rregullores së punës së Kuvendit secili propozim, çfarëdo qoftë ai duhet të vëhet në votim, nëse kalon është në rregull.

Sa i përket asaj që e ceket se e kthen Ministria përkatëse këtë vendim për jo ligjshmëri, nuk është hera e parë që Ministria i kthen vendimet këtij Ekzekutivi si të paligjshme.

z.Gazmend Islami, theksoi, i bëjë thirrje propozuesit që të konsultohet edhe njëherë me zyrën ligjore, dhe mos të bëhet politike kjo çështje si dhe të mos e marrim ne si modalitet LVV-së gjithëherë kundër, kundër çështjeve të partisë tjetër, dua të them se ne duhet të jemi pak më të mençur, kur është mirë duhet t'i përkrahim e jo si këta (LVV) dhe mos ta marrim një metodologji të tyre të punës sepse nuk është mirë për neve. Kështu që i nderuar asambleist (i drejtohet z.Burim Hasanit) konsultohuni edhe njëherë me zyrën ligjore në mënyrë që të mos dalim ndesh me ligjin.

Kryesuesi i Kuvendit, theksoi, për çdo propozim që japim natyrisht se duhet të jetë i bazuar në ligj.

z.Burim Hasani, theksoi, unë e pata si ide dhe si kërkesë për Kuvendin e Komunës që të merret një vendim i tillë, pra nuk ishte fjala për vendimin si tërësi por vetëm pikat që i specifikova në fillim të debatit për këtë pikë të rendit të ditës, pra nuk propozova për objektet biznesore por vetëm për pikat që kanë të bëjnë me tokat bujqësore dhe ato pyjore.

Nëse lejohet me rregulla dhe me ligj si dhe në konsultim edhe me drejtorin e DBF-së dhe zyrën ligjore, nëse lejohet me ligj do të ishte mirë për qytetarët të mos tatimoheshin ato prona pasi që jemi në një gjendje të rëndë ekonomike, nëse nuk lejohet atëherë të vazhdohet sipas propozim vendimit ngase edhe ashtu kemi përqindjen më të vogël të tatimit.

z.Fatlum Osmani, U.D. drejtor i DBF-së, theksoi, tatimi për tokat bujqësore është në ligj por nuk janë tatimuar në vitin 2022 dhe besojmë se nuk do të tatimohen as në vitin 2023, ndërsa tokat pyjore janë tatimuar në vitin 2022 e besojmë se do të tatimohen edhe në vitin 2023, kurse kategoritë tjera po e them me sinjeritetin më të madh nuk mund të ndërhyjmë, krejt çfarë kemi mund të bëjmë është se këtë propozim vendim të mos e sjellim fare në Kuvendin e Komunës, por ideja jonë ka qenë që t'i ulim normat tatimore në limitin e lejuar me ligj e që janë për objektet industriale.

Pra në rast se nuk miratohet ky propozim vendim apo në rast se nuk do ta propozonim në Kuvend, nga muaji janar 2023 aplikohen normat tatimore të cilat janë aktuale sipas vendimit të Kuvendit të Komunës që është miratuar në vitin 2021, por madje edhe nëse fare nuk ka vendim të Kuvendit të Komunës këto norma tatimore aplikohen në bazë të ligjit dhe atë në minimumin e tyre.

z.Burim Hasani, theksoi, atëherë unë e tërheqë propozimin në mënyrë që të mos aplikohen vlera / norma më të larta në vitin që vjen.

z.Fatlum Osmani, U.D. drejtor i DBF-së, theksoi, ndoshta harrova të cekë se tokat bujqësore janë të liruara dhe nuk tatimohen kurse objektet bujqësore po. Megjithatë falënderoj parafolësin për propozimin e dhënë e që ndoshta edhe ne do ta përkrahim lirimin e ndonjë tatimi, mirëpo ligji e kufizon kështu dhe në një aspekt nuk kemi rrugë tjetër.

z.Burim Hasani, theksoi, i nderuar Kryesues i Kuvendit nëse veç ashtu thuhet me ligj, unë e tërheqë propozim e dhënë në fillim të diskutimeve për këtë pikë të rendit të ditës.

Kryesuesi i Kuvendit, theksoi, falënderoj këshilltarin parafolës për konstruktivitetin e treguar, andaj meqë nuk ka këshilltarë tjerë të lajmëruar për të marrë fjalën, unë e hedh në votim propozim vendimin sipas materialit përkatës të kësaj pike të rendit të ditës përfshirë edhe konstatimet e rekomanduara nga mbledhja e KPF-së.

Pas votimit, Kryesuesi i Kuvendit konstatoi se nga 27 anëtarë/e të Kuvendit sa ishin prezent aktualisht në sallë, me 15 vota PËR, asnjë votë Kundër dhe 11 vota të PËRMBAJTURA (1 nuk mori pjesë në votim), miratohet propozim vendimi sipas materialit përkatës të dërguar me thirrjen e kësaj mbledhje.

5. Propozim Rregullorja për përcaktimin e procedurave të dhënies në shfrytëzim më pak se një (1) vit të pronës së paluajtshme të Komunës

znj.Saranda Stublla, U.D. drejtoresh e Drejtorisë së Pronës Kadastrit dhe Gjeodezisë-DPKGJ, e paraqiti fjalën hyrëse rreth kësaj pike të rendit të ditës, ndër të tjera theksoi, dokumenti i rregullores në fjalë është i njëjti me draft rregulloren e përgatitur nga Asociacioni i Komunave të Kosovës dhe ka qenë model për Komunitat dhe si draft i ka kaluar të gjitha procedurat e diskutimit publik ku edhe keni mund të shihni raportet nga diskutimet publike.

Dokumenti është i përgatitur në përputhje të plotë me legjislacionin në fuqi për dhënien e pronave të paluajtshme të Komunës në shfrytëzim, prandaj i propozoj Kuvendit të Komunës për miratim të kësaj propozim rregulloreje.

znj.Sebastina Vokri, në emër të Grupit të LVV-së, theksoi, e mbështesim dhe e përkrahim propozim rregulloren për përcaktimin e procedurave të dhënies në shfrytëzim më pak se një (1) vit të pronës së paluajtshme të Komunës.

z.Valon Demolli, në emër të Grupit të LDK-së, theksoi, meqë drejtoresha e DPKGJ e ka fjalën e parë në Kuvend, edhe ne si Grup i këshilltarëve e përkrahim propozim rregulloren në fjalë.

z.Gazmend Islami, në emër të subjektit OBKD, theksoi, e përkrahim dhe mendojmë se çdo herë kur është diçka mirë për Komunën duhet përkrahim dhe duhet të jemi pozitiv.

z.Xhevdet Maloku, theksoi, kam një propozim, tek neni 14 pika 5 ku thuhet, *publikimi i listës së pronave të paluajtshme të Komunës të dhëna në shfrytëzim bëhet brenda 7 ditëve nga dita e nënshkrimit të kontratës*, të ceket edhe vendi i publikimit, pra në ueb faqen e komunës, në objekt të Komunës, për shkak se të jetë më transparent.

znj.Donjetë Sheqiri, theksoi, në seancën e muajit shkurt nëse ju kujtohet ish drejtoresha e DPKGJ ka dhënë premtim publik në këtë foltore të këtij Kuvendi që listën e të gjitha pronave dhe gjendjen e tyre në Komunën e Podujevës do ta publikoj deri në fund të muajit mars, por kjo nuk ka ndodhë, andaj dëshiroj ta pyes drejtoreshën aktuale të DPKGJ se a mund të zotohet që atë listë të plotë e jo vetëm të atyre pronave që janë shfrytëzim ta publikoj, pra të na jep këtu një premtim publik, dhe përse nuk është mbajtur premtimi i kaluar.

znj.Saranda Stublla, U.D. drejtoresh e DPKGJ, theksoi, tani për tani nuk jam e informuar se a është publikuar apo jo lista e cekur dhe për këtë do të konsultohem me zyrtarët përkatëse nëse është publikuar, nëse jo atëherë do të fillojmë me procedurat përkatëse për publikim.

znj.Donjetë Sheqiri, theksoi, falënderoj drejtoreshën për përgjigjen, mirëpo në bazë të ligjit, të gjitha pronat, qoftë ato që janë në shfrytëzim qoftë ato që nuk janë si dhe gjendje e tyre duhet të jenë transparente në ueb faqen e Komunës, andaj a mund ta marrim një afat kohor të caktuar se kur DPKGJ do t'i publikoj këto të dhëna në ueb faqen e Komunës.

znj.Saranda Stublla, U.D. drejtoresh e DPKGJ, duke i'u përgjigjur parafolëses, theksoi, nuk mund të jap afat të caktuar për shkak se nuk jam e informuar se a është publikuar apo jo lista e cekur. Unë do të marrë informata dhe nëse nuk është publikuar atëherë diskutojmë pastaj se kur mund të përgatitet dhe publikohet ajo listë.

znj.Donjetë Sheqiri, theksoi, i kam parë disa prona që janë publikuar, mirëpo ne nuk kemi kërkuar që të publikohen vetëm ato prona që i keni dhënë në shfrytëzim por kemi publikimin e të gjitha pronave të Komunës së Podujevës, jo vetëm ato që janë në shfrytëzim, por edhe ato që nuk janë dhënë fare në shfrytëzim dhe që nuk dihet fare se si është gjendja e tyre sot.

z.Vigan Salihu, U.D. drejtor i Drejtorisë së Planifikimit dhe Zhvillimit Ekonomik-DPZHE, theksoi, sa i përket pronave për dhënie në shfrytëzim është online katalogu i tyre dhe ato prona që janë aty nuk është se janë dhënë në shfrytëzim por janë të paraqitura si mundësi për t'i dhënë në shfrytëzim dhe përveç kësaj ato prona janë të cekura edhe me vendim të këtij Kuvendi.

znj.Donjetë Sheqiri, theksoi, faleminderit drejtor mirëpo besoj se është kompetente që të përgjigjet drejtoresha e DPKGJ. Jam duke e cekur shumë kjo, nuk po kërkoj listë për pronat që do të jepen apo që janë dhënë në shfrytëzim, por po kërkoj të gjitha pronat në pronësi të Komunës së Podujevës, të publikohen në faqen e Komunës së Podujevës.

z.Naim Çunaku, theksoi, jemi duke diskutuar për diçka që është potencuar X herë në këtë Kuvend, madje qysh nga fillimi i funksionimi të këtij Kuvendi dhe problemet me pronat komunale e që edhe Ligji për vetëqeverisje lokale në një prej shtyllave kryesore të Kuvendit përkatësisht Kryetarit të Komunës e ka përkujdesjen për pronat komunale, dhe atë që po e kuptoj nga anëtarja parafolëse kolege znj.Donjetë Sheqiri kërkesë e saj është se a mund ta merre një datë të publikimit të pronave komunale, edhe pse kur janë miratuar këto prona gjegjësisht pronat për këtë vit kalendarik, e kemi marrë një premtim prej një drejtoreshë që ka qenë aktuale në DPKGJ e cila ka bërë një premtim publik në foltore se do të bëjë përpjekje dhe na ka siguruar që të gjitha pronat komunale do të jenë të publikuara në ueb faqen e Komunës, në çfarë gjendje janë, kush dhe me çfarë autorizimi i shfrytëzon, pra sa e kuptova këtë e dëshiroj znj.Donjetë Sheqiri. Pra të mos kthehemi tek ato prona që janë të publikuara sepse janë po ato që ky Kuvend ka vendos t'i jap në shfrytëzim, mirëpo propozimi i znj.Donjetë Sheqiri është i një natyre më të gjerë, pra ka të bëjë me publikimin e të gjitha pronave komunale.

z.Florent Hasani, theksoi, pyetje për drejtoreshën e DPKGJ, a është bërë ndërrimi i tokës bujqësore në tokë ndërtimore në fshatin Lluzhan aty ku është ndërtuar një betonjerkë.

znj.Saranda Stublla, U.D. drejtoresh e DPKGJ, përgjigje parafolësit, theksoi, nuk kam informacione lidhur me këtë por mund të marrë informacione deh t'ju njoftoj për këtë.

Kryesuesi i Kuvendit, theksoi, përgjigjet mund të jepen edhe në mbledhjen e radhës, nuk është e obliguar t'i përgjigjeni domosdo sot.

z.Naim Çunaku, theksoi, lidhur me ndërrimin e destinimit të pronave nga pronë bujqësore në ndërtimore, varësisht prej klasës së tokës, nuk është askush kompetent përveç Kuvendit të Komunës dhe nëse nuk e kemi votuar ne nuk ka pas se si të shndërrohet ajo pronë nga bujqësore në ndërtimore. Jam në dijeni se ka ndodhur ndërtimi dhe është ashtu siç e cekur kolegu z.Florent Hasani, mirëpo më bëri përshtypje përgjigja, nuk e di a është shndërruar apo jo,

Kryesuesi i Kuvendit, theksoi, të gjithë nga pak kemi përvojë në Kuvend, mirëpo ndryshimi i destinimit të tokave nga bujqësore në ndërtimore duhet të kalojë në Kuvendin e Komunës, mirëpo për sqarime tjera shtesë fjalën e ka drejtori i Drejtorisë përkatëse.

z.Leutrim Krasniqi, U.D. drejtor i Drejtorisë së Planifikimit Urban dhe Mbrojtjes së Mjedisit-DPUMM, theksoi, sa i përket pyetjes për shndërrimin e tokës nga bujqësore në tokë ndërtimore, para rreth një muaji ju si Kuvend e keni votuar Hartën Zonale e cila përcakton për çdo parcelë se për çfarë do të shfrytëzohet, banim, bujqësi, ndërtim, pylltari apo çfarëdo qoftë tjetër.

Në qoftë se është brenda zonës ndërtimore, ndërrimi i destinimit jepet me pëlqim urbanistik, pra DPUMM e jep pëlqimin, pastaj në procedurë pagesën e lëshon Drejtoria e Bujqësisë Pylltarisë dhe Zhvillimit Rural kurse pjesën e ekzekutimit e kryen Drejtoria e Pronës Kadastrit dhe gjeodezisë, do të thotë është një procedurë këtu por pa qenë në zonën e ndërtimit nuk mund të kryhet ndërrimi i destinimit i tokës bujqësore.

Përndryshe sa i përket veprimeve të ndryshme që mund të merren pa i kaluar procedurat e tilla nuk i takojnë DPUMM. Pra besoj se isha i kjo kjo në sqarimin rreth procedurave.

z.Florent Hasani, theksoi, unë kërkoj përgjigje kurdo që është e mundur nga ndokush prej Ekzekutivit të Komunës ngase ndërtimi i cekur më herët ka ndodhur në tokë bujqësore.

z.Naim Çunaku, theksoi, i nderuar drejtor i DPUMM, ndërtimi në fjalë ka ndodhur para se të miratohet Harta Zonale, do të thotë Harta Zonale e ka gjete fakt të kryer atë ndërtim.

z.Gazmend Islami, theksoi, kam kërkesë për drejtorët e drejtorive që këto punë t'i marrin shumë seriozisht për shkak se për çdo gjë dhe për çdo shkelje do të paditen në prokurori dhe për këtë jua jap fjalën se për çdo gjë që jemi duke parë sikurse që po ndodh me këto ndërtimet pa leje sikur për ndërtimet e hoteleve që kanë filluar në fshatin Batllavë, edhe në fshatin Shamalluk, do të thotë pa leje ndërtimore, mos mendoni se ne do të heshtim, madje unë personalisht ju garantoj se çdo shkelje që do të bëhet do t'i ndjekë penalisht ata të cilët po i mbyllin, qoftë Drejtoria e Inspeksionit e cila ka për detyrë të dalë të bëjë inspektime. Ligji është i barabartë si për të pasurit ashtu edhe për të varfrit, prandaj duhet të jemi të njëjtë, qoftë ai që është milioner qoftë ai që nuk ka asnjë cent.

Unë ju them drejtorëve të Drejtorive që ta marrin seriozisht punën e tyre, unë i respektoj secilin për punën që bëjnë dhe për punë të mira jua heqë kapelën, por nuk jeni vasal të askujt dhe nuk duhet të mbyllni sytë nëse e vëreni se diçka nuk është në rregull, e them këtë sepse këto ndërtimet që janë bërë e të cilat i kam publikuar edhe para 2 - 3 javëve për rastin e Batllavës, madje kam bërë kërkesë zyrtare edhe në Ministrinë përkatëse dhe pres përgjigje nga ata. Ne nuk do të heshtim për këto rate dhe mos të mendoj askush se ndokush që është milioner ka edhe të drejtë të ndërtoj pallate pa leje duke diskriminuar rajonin e Batllavës duke e bërë qendër të peronave të cilët janë bërë superfuqi të parasë. Prandaj ju lus të jeni të sqartë dhe të jeni të drejtë sepse për këtë jeni zgjedh, por nuk jeni zgjedh këtu as për humor as për të thënë këtu nuk e di, e di, se di a ka, a ka leje, llogaridhënien do ta jepni ju në fund.

z.Leutrim Krasniqi, U.D. drejtor i DPUMM, theksoi, meqë nga parafolësi u përmenden ndërtimet që janë duke u bërë në pjesën e Batllavës, ju them se së bashku me drejtorin e Drejtorisë së Inspeksionit ne kemi mbajtur takime të shumta me Ministrinë përkatëse. Është një Udhëzim Administrativ sipas të cilit vëhet liqeni i Batllavës dhe pjesa përreth si zonë e mbrojtur, konkretisht është kompetencë edhe Drejtorisë së Inspeksionit normalisht, mirëpo pjesë e përgjegjësisë e që ndoshta është pjesa dërmuese është e Ministrisë së Mjedisit dhe Planifikimit Hapësinor sepse në momentin që shpallet zonë e mbrojtur, kompetencat kryesore i marrin Ministria e cekur.

z.Gazmend Islami, theksoi, i nderuar drejtor i DPUMM, personi i cili ka ndërtuar hotelin aty lartë që është ndërtuar është i njëjti që ka ndërtuar betonjerkën në ato prona që u diskutuan, prandaj nuk guxojmë që ne t'i mbyllim sytë dhe herë t'ia hedhim fajin Ministrisë e herë Komunës.

Ne e dimë se kah e ka shtrirjen territori i Komunës së Podujevës dhe Batllava është pjesë e Komunës së Podujevës, pjesa në fjalë është zonë e mbrojtur dhe këtë e dimë, mirëpo nuk ka fuqi që e ndal Inspeksionin e Komunës së Podujevës që të shkoj dhe të inspektoj çdo rast dhe çdo shkelje sepse edhe ashtu i ngarkon ligji, prandaj unë vetëm ju bëra thirrje si miq e koleg që jemi që të mos bini desh me ligjin ngase nuk kam qejf që asnjërin prej juve t'iu shohë prapa grilave.

z.Naim Çunaku, theksoi, më bëri ta marrë fjalën përgjigja e drejtorit të DPUMM, mirëpo drejtori në fjalë në një pyetje pak përpara iu referua Hartës Zonale, ndërsa në pyetjen tjetër për ndërtimet që i potencoi kolegu iu referua një diçka të Ministrisë sipas të cilës është zonë e mbrojtur, andaj dëshiroj ta di se a është shpall zona ku janë duke u ndërtuar, zonë e mbrojtur, si dhe ajo pjesë ku janë duke u bërë ndërtime a është e rregulluar me Hartën Zonale, e mos ta bëjmë edhe kështu edhe ashtu, por nëse është zonë e mbrojtur dihet kush e përcakton që është zonë e mbrojtur, dhe dihet deri në sa metra është zonë e mbrojtur, nëse nuk i përket asaj zone dhe është e rregulluar me Hartë Zonale a ka tejkalime që i parasheh Harta Zonale, pra kjo është ajo që duhet të japësh përgjigje.

z.Leutrim Krasniqi, U.D. drejtor i DPUMM, theksoi, sa i përket ndërtimeve mund të ketë tejkalime të caktuara, kurse sipas Hartës Zonale është e përcaktuar një pjesë përreth liqenit të Batllavës si zonë e banimit, jo zonë turistike. Normal është se lejet ndërtimore lëshohen prej DPUMM çdo herë duke respektuar Hartën Zonale që ju e keni miratuar. Konkretisht në zonë e parë dhe të dytë janë rregulla më strikte për ndërtim, kurse në raste eventuale në parcelat që janë në zonën e tretë dhe brenda zonës së ndërtimit normalisht se lëshohet leja duke i respektuar kushtet.

Tek pjesa e inpektimeve nuk do të doja të ndalesha sepse nuk është kompetencë e imja, por për hir të transparencës dhe për shkak të takimeve që kemi mbajtur me të vetmin qëllim me drejtorin e Drejtorisë së Inspeksionit që ta mbrojmë sa më shumë që mundemi atë hapësirë.

z.Qëndrim Softolli, theksoi, pyetje për drejtorin e DPUMM ngase kam marrë shumë ankesa rreth kthimit të përgjigjeve palëve e që është afati ligjor 30 ditë dhe ka shumë ankesa që nuk po iu kthehet përgjigje brenda afatit ligjor. Pra palët të cilat drejtohen tek DPUMM po ankohen sepse nuk po i'u kthehen përgjigje për kërkesat e tyre, afati ligjor është 30 ditë kurse ju drejtor nuk po i'u kthen përgjigje brenda atij afati ligjor.

z.Leutrim Krasniqi, U.D. drejtor i DPUMM, përgjigje parafolësit, theksoi, zakonisht të gjitha lëndët shqyrtohen në afatin kohorë që janë, ndoshta ndokujt mund të mos i pëlqej përgjigja e DPUMM dhe mund të ankohet në procese tjera, mirëpo fundja unë jam organ ekzekutiv, Hartën Zonale ju si Kuvend e keni miratuar dhe unë atë jam duke e aplikuar për qytetarët, dhe nuk është se unë mund të bëjë diçka dallime në këtë aspekt.

z.Florent Hasani, theksoi, Inspektorati i Komunës duhet të deklarohet përse nuk ndërmerr masa ndaj mbindërtimeve dhe ndërtimeve pa leje.

z.Leutrim Krasniqi, U.D. drejtor i DPUMM, theksoi, për këtë pjesën që e ceku parafolësi nuk është në kompetencë timen. Mirëpo edhe njëherë i them këshilltarit z.Qëndrim Softolli besoni se lëndët shqyrtohen në afatin përkatës kohor, normal ka edhe punë të mëdha në DPUMM sepse është një prej drejtorive më të ngarkuara ndoshta, andaj kjo mund edhe të jetë arsyeja që mund të vonohet ndonjë lëndë 1 javë, mirëpo çdo lëndë shqyrtohet.

Kryesuesi i Kuvendit, theksoi, meqë nuk ka të lajmëruar tjerë për të marrë fjalën rreth kësaj pike konsiderojmë se debati përfundoj, mirëpo ishte një propozim konkret nga anëtari i Kuvendit z.Xhevdet Maloku të cilin e ftoj ta saktësoj edhe njëherë propozimin tij para se ta hedh në votim.

z.Xhevdet Maloku, theksoi, propozimi ishte që te nenin 14 pika 5 të saktësohet se ku bëhet publike listat përkatëse, në ueb faqe, në objekt të Komunës apo kudo që parashikohet.

Kryesuesi i Kuvendit, theksoi, atëherë e hedh në votim propozim rregulloren përkatëse sipas materialit përkatës të dërguar me thirrjen e kësaj mbledhje si dhe duke përfshirë edhe propozimin e dhënë nga parafolësi z.Xhevdet Maloku.

Pas votimit, Kryesuesi i Kuvendit konstatoi se nga 25 anëtarë/e të Kuvendit sa ishin prezent aktualisht në sallë, me 24 vota PËR, asnjë votë Kundër dhe asnjë votë të Përmbajtur (1 nuk mori pjesë në votim), miratohet propozim Rregullorja sipas materialit përkatës të dërguar me thirrjen e kësaj mbledhje me plotësim ndryshimin, që paragrafit 5 të nenit 14 t'i shtohet edhe pjesa e fjalisë që specifikon se ku publikohen dokumentet e tilla, në këtë rast ueb faqen zyrtare të Komunës.

6. Propozimet për zëvendësimin e 2 (dy) anëtarëve të Komitetit për Komunitete (pas dhënies së dorëheqjes nga dy ish anëtar/e të Komitetit nga radhët e Komuniteteve jo shumicë)

z.Hilmi Hoxha, Kryesues i Kuvendit, e paraqiti fjalën hyrëse rreth kësaj pike të rendit të ditës, theksoi, pra kemi të bëjmë me zëvendësimin e dy anëtarëve të Komitetit për Komunitete pas dhënies së dorëheqjes së dy anëtarëve nga radhët e komuniteteve jo shumicë, përkatësisht për shkaqe të ndryshme nga komuniteti ashkali ish anëtarja znj.Albina Avdiu ka dhënë dorëheqje dhe është propozuar të zëvendësohet me znj.Naile Ahmeti, kurse nga komuniteti rom z.Muhamet Sadiku ka dhënë dorëheqje dhe është propozuar të zëvendësohet me z.Selver Rama, andaj urdhëroni nëse ndokush dëshiron fjalën, nëse jo atëherë e vë në votim këtë propozim për zëvendësimet sipas asaj që e paraqita.

znj.Donjetë Sheqiri, theksoi, pyetje rreth procedurës së zëvendësimit përkatësisht rreth këtyre dy emrave të rinj, a kanë aplikuar në Komunë apo vetëm i kanë sjellë emrat.

Kryesuesi i Kuvendit, sqarim parafolëses, theksoi, nuk është që vetëm i kanë sjellë emrat mirëpo kanë aplikuar dhe i kanë nënshkruar e komuniteteve përkatëse dhe kush do që dëshiron mund të vije në zyrë dhe ti shikoj por të njëjtat ju janë përcjellë edhe materialin e kësaj pike.

z.Gazmend Islami, theksoi, tek komunitetet jo shumicë, Komuna e jonë e shohë si një diskriminim të madh që i bëhet komuniteteve jo shumicë dhe këtë e ndjejmë shpirtnisht sa herë që kalojmë në ato lagje ku ata jetojnë. Për këto shakat sikur kjo tani erdhën dy të tjerë sepse janë dorëhequr dy të tjerë, unë nuk e di a konsultohet ndokush me atë komunitet dhe këtë e them ngase kam qenë 2-3 herë tek ato shtëpi dhe ata persona, madje këtë e ndërlidh edhe me veten sepse si fëmijë kam qenë refugjat në Gjermani dhe mbajë mend mirë si më kanë shkolluar, dhe si më kanë trajtuar, prandaj në këtë aspekt Komuna jonë duhet të jetë shembull dhe sigurisht se do ta ketë përkrahjen qoftë edhe nga unë që ta ketë një komision i cili kontakton më shpesh me ato komunitete në mënyrë që ata ti integrojmë që të jenë sa më aktiv në jetën publike në Komunën e Podujevës, qoftë në Komunë, qoftë me punësime në shëndetësi dhe të mos i shohim vetëm si “sharragji” sepse edhe ata janë njerëz, kanë gjak kanë mendje, edhe ata e falsin gjuhën Shqipe, prandaj është mirë që si Komunë të veprojmë sepse kjo na qetë faqe të bardhë të gjithëve.

Do të kisha shumë dëshirë që pushteti të formon një komision i cili do të ndihmonte në integrimin e komuniteteve jo shumicë, ngase integrimet që bëhen ad-hoc vetëm sa për të parë ndokush se i kemi të integruar në rregull është, mirëpo unë e përsërisë që ndihem keq sa herë që shohë me sharrë duke shkuar të prajnë dru, pra të pa integruar, të pashkolluar, fëmijët e tyre bredhin rrugëve, andaj si Komunë është në nderin tonë t’iu ndihmojmë.

Kryesuesi i Kuvendit, theksoi, Komiteti për Komunitete është organ i këtij Kuvendi sikurse që është Komitetit për Politikë dhe Financa. Në Komitetin për Komunitete përfaqësohen të gjitha komunitetet jo shumicë dhe shumica e Komitetit është nga radhët e komuniteteve jo shumicë, në këtë rast 5 prej 9 anëtarëve të Komitetit janë nga radhët e komuniteteve jo shumicë, kështu që shqetësime e komuniteteve janë ata që i shprehin në Komitet për Komunitete.

Po ashtu Komuna e Podujevës e ka edhe Zyrën për komunitete dhe kthim dhe shëf i Zyrës është z.Liman Zeqiri, kështu që nuk besoj se Komuna ka lënë anash ashtu siç u tha këto komunitete dhe që nuk e besoj se nuk është në kontakt të vazhdueshëm, mirëpo edhe unë pajtohem që ndoshta nuk kemi bërë aq sa duhet sepse janë një komunitet që jetojnë në gjendje të rëndë ekonomike, “sharragji” ka shumë prej tyre por binduni se të tillë ka edhe shumë prej komunitetit shumicë-Shqiptar dhe për këtë jemi në dijeni të gjithë thajse.

z.Gazmend Islami, theksoi, të mos merret për të keq ajo që e potencova sepse unë e përmenda jetën time se si jam trajtuar në një shtet normal dhe e ndërlidha me shtetin tonë ku jemi rreth 99% Shqiptar e që kërkoja të trajtohen komunitetet jo shumicë që në një të gjitha aspektet jemi të barabartë.

Me sharrë “sharriti” dhe unë, mirëpo është mirë të trajtohen qoftë në shkollim, qoftë në përparësi tjera në mënyrë që të sa do pak të integrohen dhe t’i shohim edhe at ndokund qoftë profesor, qoftë mësues dhe t’i frymëzojmë paksa sepse si do që të jetë është një komunitet që jeton me neve.

Kryesues i Kuvendit, theksoi, besoj se të gjithë pajtohemi që të gjithë së bashku duhet të bëjmë më shumë për komunitetet jo shumicë.

Meqë nuk ka të lajmëruar tjerë për të marrë fjalën, e hedh në votim propozimin për zëvendësimin e dy anëtarëve në Komitetin për Komunitete, dhe atë sipas prezantimit në hyrje të kësaj pike të rendit të ditës. Vlen të theksohet se znj.Albina Avdiu e cila ka dhënë dorëheqje punon si gazetare në Radio Televizionin e Kosovës është një vajzë e cila është e ngritur shumë në aspektin profesional dhe shkollor kështu që për shkak të angazhimeve ka dhënë dorëheqje e që ndoshta do të ishte dëshirë e imja që ajo të vazhdonte të jetë anëtare e Komitetit për Komunitete po për shkak të angazhimeve dhe punëve që ka nuk ka mundur të vazhdoj.

Pas votimit, Kryesuesi i Kuvendit konstatoi se njëzëri nga 23 anëtarë/e të Kuvendit sa ishin prezent aktualisht në sallë, me vendim miratohet ndryshimi dhe plotësimi i përbërjes së Komitetit për Komunitete sipas Vendimit nr.prot.01-020/02-0030731/22 për themelimin dhe përbërjen e Komitetit për Komunitete, të datës 29 prill 2022, dhe atë:

znj.Naile Ahmeti, (komuniteti ashkali) emërohet në vend të znj.Albina Avdiu, e cila ka dhënë dorëheqje nga cilësia e anëtares së Komitetit për Komunitete, dhe

z.Selver Rama, (komuniteti rom) emërohet në vend të z.Muhamet Sadiku, i cili ka dhënë dorëheqje nga cilësia e anëtarit të Komitetit për Komunitete.

7. Informatë e Drejtorisë së Arsimit për përfundimin e vitit shkollor 2021/2022

z.Avni Fetahu, U.D. drejtor i Drejtorisë së Arsimit-DKA, e paraqiti informatën në fjalë, ndër të tjera theksoi, në bazë të Planit të punës së Kuvendit, keni kërkuar një informatë të përgjithshme për arsim, përkatësisht për periudhën e vitit shkollor 2021/2022. Duke u bazuar edhe në informatat paraprake për periudhën kalendarike të vitit shkollor, po ju paraqesim një informatë përmbledhëse e cila e ka bazën tek plani i punës në bazë të të cilit edhe kemi zhvilluar aktivitete të Drejtorisë së Arsimit, Drejtori e cila në funksion të përgatitjes për çdo periudhë të fillimit të fillim vitit të ri shkollor ka ndërmarrë të gjitha masat e nevojshme për të krijuar kushtet për mbarëvajtjen e procesit mësimor në përdhën e parë dhe të dytë të vitit shkollor.

Shikuar në përgjithësi periudhat e vitit shkollor 2021 dhe 2022 në Komunën e Podujevës kanë përfunduar me sukses dhe gjatë kësaj periudhe kohore janë realizuar të gjitha punët dhe detyrat e planifikuara sipas dinamikës së paraparë në të katër nivelet e arsimit parauniversitar, por edhe punët dhe detyrat e tjera të paraqitura gjatë këtij vitit në këtë interval kohor.

Duke marrë parasysh informatat e detajuara nuk dëshiroj t'ju marrë kohë shumë për arsye se planifikohen të gjitha aktivitetet e realizuara, çështja e bursave për studentë, investimet në shkollë, realizmi i projekteve të cilat janë prezantuar edhe nga vetë Kryetari i Komunës në këtë gjashtëmujor të parë të këtij viti, siguri i transportit të nxënësve, shërbimi psikologjik dhe pedagogjik nëpër shkollë, ndërtimi dhe renovimi i objekteve shkollore, rregullimi i rrethojave të oborreve të shkollave, bashkëpunimi me Policinë e Kosovës, instalimi i kamerave të sigurisë, pastaj sfidat me të cilat jemi ballafaquar ka qenë sërish Pandemia në fillim të vitit shkollor, incidentet dhe zënkat ndërmjet nxënësve që janë të rëndomta, dëmtimet e objekteve të disa shkollave nga perona të panjohur pas përfundimit të orarit mësimor, lokalet afër shkollave, qentë endacak, komunikacioni e kështu me radhë. Megjithatë Drejtoria e Arsimit në bashkëpunim me të gjitha organet relevante me aq sa ka pasë mundësi ka ndërmarrë masat e nevojshme. Në kuadër të shumë aktiviteteve janë organizuar edhe gara komunale dhe ndërkombëtare dhe për fat të mirë Komuna jonë në shumicën prej tyre ka treguar sukses të veçantë.

Pa dashur t'ju marrë kohë më shumë pres vërejtjet dhe sugjerimet e juaja, në vazhdim.

z.Qëndrim Softolli, në emër të Grupit të LDK-së, theksoi, të them se jam i kënaqur që në pretendimet tona që i kemi ngritur në seancën e jashtëzakonshme po merren dhe i potencojnë institucionet e shtetit, nuk po mundem sepse as unë si asambleist i opozitës nuk ndihem mirë kur për çdo javë e kemi nga një shkrim për shkallëje, parregullsi, ndikime politike dhe anulim të konkurseve nga Drejtoria e Arsimit. Më vie mirë se pretendimet tona të ngritura në atë seancë dolën të vërteta sepse me to po merret prokuroria e shtetit dhe disa prej tyre janë potencuar edhe në raportin e auditorit, po gjithashtu më vie keq për gjendjen në të cilën është katandisur Komuna e Podujevës dhe Drejtoria e Arsimit në këto dy vite. Drejtori goxha trim por edhe recidivist në shkeljen e ligjeve, ja kam thënë në atë seancë se është duke bërë shkelje të proceduarve në konkurse dhe me ligje jo adekuate, nuk po i lë zyrës së personelit procedurat por ato po i udhëheqë vetë, dhe a dini përse, sepse vetë i bënë komisionet, vetë jua cakton pikët, vetë e bënë komisionin e ankesave dhe vetë e cakton listën e pritjes, listë kjo e cila është sikurse lojërat e kurdisura. Nga këto janë bërë minimum 100 punësime jo ligjore nga kjo Drejtori, shembull, në Raportin e Auditorit në të cilin ka marrë pjesë një (shok) mik i drejtorit dhe i cili është bërë komplet për qejf të pushtetit, tema e arsimit është prekur krejt sipërfaqësisht, por një fakti nuk ka mundur t'i ikë dhe e ka potencuar duke thënë se janë bërë 141 punësime, dhe për këtë unë e pyes drejtorinë Drejtorisë së Arsimit, sa procedura të konkursit janë zhvilluar gjatë kësaj periudhe dhe sa persona janë punësuar, e që sipas neve janë rreth

40, do të thotë 100 persona kanë hyrë në punë sipas asaj listës që e ka bërë drejtori me komisionet e veta të dëgjueshëm.

Si mund të flitet për cilësi në arsim kur politizohen dhe pastaj anulohen edhe konkurset për punëtorë në Çerdhe, deri në atë nivel bie ndikimi politikë i qeveris aktuale. Si mund të flitet e proklamohet infrastrukturë kur shkelen kriteret të cilat i vë vet në konkursin për tutorë e që këtu ka qenë një Organizatë partnere dhe paramendojeni se duke parë shkeljet, përfaqësuesja e asaj organizate është tërheqë nga komisioni dhe nuk e ka nënshkruar listën e të pranuarve.

Si mund të flitet për arsim të lartë cilësor kur dihet se në çfarë gjendje e ka sjellë drejtori në fjalë me të gjitha ato shkelje që u potencuan më lartë, paramendojeni profesori i shkollave të mesme nuk mund të fokusohet në cilësi kur ju jua keni përgjysmuar norma, për dy vende të lira orët ndahen në 4 vende kurse ata mbesin as të punësuar e as të papunë, por mbesin të lidhur me drejtorin dhe të shantazhuar politikisht me ato pak orë që i kanë.

Në Komunën e Podujevës mjerisht dhe fatkeqësisht në krye të ekzekutivit i kemi dy mësimdhënës dhe në vend që të jenë shembull i mirë ata po e bëjnë të kundërtën, pra janë shembull i keq. Ku është vlера e një mësimdhënësi sot kur për mësimin e tij vendosni ju dhe përmes politikës e degradoni një mësimdhënës të mirëfilltë, madje edhe duke i ndërhyrë në punën e tij profesionale.

Po kthehem edhe njëherë tek raporti i Auditorit ku përgjigja e Kryetarit të Komunës z. Shpejtim Bulliqi ishte se i pranon të gjeturat e Zyrës Kombëtare të Auditimit, me shkeljet në fjalë, mirëpo tani shtrohet pyetja se a janë duke vazhduar shkeljet e njëjta e që faktet tregojnë se po. Këtu kam një konkurs të shpallur javë më parë nga Drejtoria e Arsimit (prezanton konkursin) i cili është në kundërshtim të plotë me rregullativën ligjore në fuqi, dhe këtë mund ta fokusoj edhe kamera, e para ka të bëjë me bazën ligjore konkretisht me nenin 17 ku një institucion është i obliguar që proceset, veprimet dhe procedurat përmes Sistemit të Menaxhimit të Burimeve Njerëzore, në rastin konkret kemi të bëjmë me Zyrën e personelit të Komunës së Podujevës ku konkursi në fjalë nuk është shpallur nga zyra e personelit. Për kualitetin e investimeve në cilësi e digjitalizim fakt i gjallë është që tani testi Pisa ka dështuar dy herë sepse nuk kanë qenë funksional kabinetet.

Janë vendosur kënde të lojërave nëpër shkolla aq kualitet sa që janë dëmtuar ende pa u përruar, është një kontratë rreth 35,000.00€ për këto lodra të rrethuara me goma të qitura jashtë përdorimit e që ka akte ligjore që e ndalojnë këtë.

Për fund, ne jemi në mbështetje të secilit projekt në arsim, por mbi të gjitha jemi për meritokraci në punësim sepse vetëm ashtu ngrisin cilësinë e që dorën në zemër kjo ishte edhe kërkesë e juaja deri sa erdhët në pushtet, por tani e keni harruar dhe po e shkeleni çdo ditë e që fatkeqësisht nuk kam besim që kjo mund të arrihet me një drejtor i cili i fut duart në menaxhimin e shkollave, në pranimin e nxënësve në Gjimnaz, e deri tek vlerësimi dhe notimi i tyre, transferimi i nxënësve e që është skandal në vete.

Edhe një kërkesë e kam që ditarët mundësisht t'i sjellëni me kohë e jo sikurse në vitin e kaluar deri në gjysmë të vitit shkollor.

znj. Qëndresë Hajrizi, në emër të Grupit të LVV-së, theksoi, Lëvizja Vetëvendosje dhe subjekti ynë politik, informatën e sjellë për arsim me planin e punës e konsideron një informatë reale dhe të domosdoshme për të na mbajtur të informuar neve si asambleistë dhe qytetarët tanë. Drejtoria e Arsimit e ka të publikuar në fillim vit planin e punës në bazë të të cilit zhvillon aktivitete nga sfera e saj, shikuar në përgjithësi periudha e vitit 2021/2022 në Komunën e Podujevës ka filluar me sfida dhe me gjendjen e pandemisë duke u përfunduar me sukses. Na gëzon fakti për të arriturat në të gjitha fushat, por posaçërisht në fushën e arsimit pasi kjo sferë na prek të gjithëve dhe duhet të punojmë të gjithë së bashku në ngritjen e cilësisë në arsim.

Aktivitetet e planifikuara dhe të realizuara gjatë kësaj periudhe kohore i potencoj edhe drejtori i DKA-së dhe inkurajojmë të vazhdohet edhe investime tjera duke përfshirë çdo shkollë të Komunës tonë, të shtohet numri i vizitave nga zyrtarët përkatës me qëllim të monitorimit të procesit arsimor, me theks të veçantë hartimi i planit komunal për parandalimin dhe reagimin ndaj braktisjes së shkollës, të vazhdoj edhe më tutje bashkëpunimi me partner ndërkombëtar me qëllim të përfitimit të shumë projekteve që ofrojnë partnerët ndërkombëtar, të bëhet fuqizimi dhe funksionalizimi i plotë i organeve qeverisëse, udhëheqëse dhe profesionale të shkollave duke u bazuar në Rregulloren e re tani më të miratuar nga asambleja komunale, të vazhdohet me ofrimin dhe zgjerimin e shërbimit psikologjik dhe pedagogjik nëpër shkolla, të koordinohen Drejtoritë në shërbime publike me qëllim të ndërtimit dhe rregullimit të trotuareve për këmbësor sidomos atyre afër shkollave.

z.Gazmend Islami, në emër të subjektit OBKD, theksoi, shqetësime e mia për shkollat në Komunën e Podujevës i kam shpreh shumë herë dhe siç e dini në mbledhjen e fundit kam sjellë disa fotografi si një pasqyrë reale të gjendjes se si janë shkollat. Ende shkollat e mesme, madje edhe sot po të shkojmë atje janë dyert e hapura, do të thotë dy shkollat naltë atje (në pjesën veriore të qytetit) nuk kanë as qelës të mbylljes dhe qëndrojnë të hapura, do të thotë lozin fëmijët, ka gra atje, ka bërlllog etj, dhe për këtë nuk po e fajësoj krejt drejtorin e DKA-së por duhet të punohet më shumë në këtë drejtim, pra pasqyra e shkollës së pari është oborri e që janë në gjendje katastrofike por që Kryetari i Komunës e mori me të keq që i prezantova fotografitë, në vend që Kryetari të jetë shembull, pra një asambleist i zgjedhur nga populli ofron një dëshmi dhe që i thotë Kryetarit prina ti ne po vijmë pas teje dhe e mbledhim bërlllogun bashkë, por çfarë bënë Kryetari i shqyen fotografitë prej mllefrit apo ku ta di unë, por është zgjedh Kryetar dhe tani po i'a shohim fytyrën çdo ditë e më shumë se çfarë kryetari është. Më vie shumë keq për shumë miq të mi që po i shohë këtu që nuk po e marrin guximin asnjë prej tyre që të dal dhe ta thotë të vërtetën, unë e di që një ditë pëlçet dhe nuk do të shkoj gjatë kjo do të pëlçet, por kur të pëlçet do të pëlçet shumë keq sepse dikush që vie në vitin 2019 dhe bëhet shefi i atyre të cilët e kanë mbrojtur dinjitetin e këtij vendi, me burg, me gjak, me protesta e me gaz, ku janë ata, prej kujt po frikësohen, prej askujt apo prej dikujt që ka ardhur në vitin 2019 dhe tani po i'u shkel me të dyja këmbët, mua po më vie keq dhe seriozisht po ndihem shumë i dëshpëruar prej miqve të mi, prej atyre që i kam parë nëpër burgje, i kam parë duke i rrahur policia, duke i ngreh zvarrë dhe i kam parë të gjakosur, pra prej tyre më vie keq sepse prej atij (Kryetarit) nuk ka çfarë më vie keq sepse ai më thoshte mua në vitin 2017 (pse po flet me këta të Vetëvendosjes, se këta janë stalinista).

Për shkollat profesionale drejtorit të DKA-së unë kam mundësi t'i ofroj bashkëpunim sepse e di që sigurisht drejtori nuk e din mirë se si funksionojnë shkollat profesionale, pra i duhet ndihmë.

Unë ofroj edhe ekspert të cilët vijnë falas prej Gjermanisë, qoftë për 1, 2, 3, 4, muaj për t'iu ndihmuar rreth punës së shkollave profesionale sepse mënyra se si funksionojnë shkollat profesionale në Kosovë dhe sidomos në Komunën tonë është më mirë të them asgjë nuk është ajo, apo të them është si humor, njerëzit dalin prej shkollës marrin një diplomë dhe nuk dinë çka janë, as nuk është murator, as elektrikistë as asgjë, pra është njeri pa dije, andaj në këtë drejtim do t'i propozoja drejtorit të DKA-së që nëse dëshiron t'i ndihmojmë që për vitet e ardhshme bashkërisht shkollën profesionale ta bëjmë shembull në gjithë Kosovën, ndihmën e ke falas prej neve, si bëhet bashkimi mes kompanisë dhe shkollës, sa herë duhet të shkohet në shkollë dhe sa herë në kompani, qysh bëhet pagesa dhe forma se si bëhet tamam një ekspert i fushës së vet kur të del prej shkollës profesionale. Pra kjo do të thotë diçka sepse nuk do t'i lenim njerëzit rrugëve. Në Gjermani nuk studiojnë as 50% por rreth 30%, të tjerët janë me shkolla profesionale sepse bëhen të zotit e vetit për drejtimin që e kryejnë në shkollat profesionale janë të përgatitur për tregun e punës, kurse këta tanët nuk janë të përgatitur për asgjë.

Pra kjo ishte sugjerim i imi, kam edhe shumë gjëra tjera për t'i thënë por meqë nuk është prezent këtu Kryetari i Komunës nuk po mundem ta zgjasë më shumë, ndërsa Nënkryetaren e Komunës nuk mund ta atakoj sepse kjo nuk ka bërë asgjë do të thotë po qëndron rehat, por i them kësaj që vazhdoni ju të vjetrit se më mirë ju bie.

z.Ekrem Rrahmani, theksoi, dua të ndërlidhem paksa për punën e tenderëve në Drejtorinë e Arsimit sepse për këto gjërat tjera që ishin keqpërdorime qoftë me 141 të punësuar jashtëligjshëm duke anashkaluar plotësisht Zyrën e personelit.

Gjatë shfletimit të një specifikimi teknik të një tenderi që e ka qitë drejtori i DKA-së në vlerë 179,000.00€ në të cilin kishte shumë pika që nuk po u dike sa çfarë janë por 2 ose 3 prej tyre pa qare më duhet t'i cekë, specifikimi teknik është ky (e prezanton të shtypur), jo që e kam bërë unë por ky është dokument i specifikimit teknik në të cilin shkruan, shembull, tush bateri 2500 copë për shkolla mirëpo në Komunën e Podujevës sa e di unë janë rreth 40 shkolla andaj sipas një përlogaritjeje i bie që 74 tush bateri për çdo shkollë, unë nuk e di se ku shkojnë këto dhe nuk e di çfarë nevojiten tush bateri për shkolla kur në anën tjetër në specifikime ka edhe çeshme për ujë të ftohtë dhe çeshme për ujë të ngrohtë dhe tush bateri, andaj nuk e di përse dhe për çfarë janë porositur gjithë këto tush bateri e që në total këto arrijnë shumën 19,260.00€.

Pastaj kemi të porositura nxemse për termo 2.5 kw-3.5 kw, por unë nuk e di as ku janë ato termo, çfarë i duhen ato nxemse apo për ku parashihen. Mandej janë porositur stufa dhe unë nuk e di se ku i ka paraparë t'i dërgoj ato tash në këtë kohë kur vet drejtori në raportet dhe informatat e thotë se shkollat janë me ngrohje qendrore.

Po ashtu janë porositur flamuj, shembull flamuri i Kosovës kushton 10€ në këtë pikë, kurse flamuri Kombëtar 1 cent, e që goxha mu duken të ndërlikuara këto çështje, dhe këtë edhe e them edhe duke parë facebook-un e drejtorit të DKA-së kur para rreth 2 viteve e potencon se drejtorët e komunës po bëjnë “tuxharet” me drejtorin e prokurimit, kurse ky tani të gjithë i ka lëvizur andej e këndeje por vetëm atë të prokurimit nuk e ka lëvizur fare, prandaj tani pyes, a është “tuxhar” ai person apo jo, dhe a po të dëgjon ty tani dhe a po bëni marrëveshje me atë.

znj.Donjetë Sheqiri, theksoi, pyetje për drejtorin e DKA-së, dhe atë, në shkollën “Lasgush Poradeci” në fshatin Dumnicë gjendja e fusha sportive është katastrofale, andaj pyes drejtorin e DKA-së se a e ka në plan kjo Drejtori që ti ndërtoj ato fusha sportive, nëse po kur do të ndodh sepse ato fusha që janë nuk i plotësojnë as kushtet elementare, përndryshe mund edhe ta shihni në foto që e posedoj këtu në telefonin tim se në çfarë gjendje është fusha e volejbollit në shkollën e fshatit Dumnicë (paraqet fotot) vetëm bari dhe 2 shtylla, kurse fotoja tjetër është gjendja e fushës së futbollit. Pra nëse do të investoni në këto fusha të sportit në shkollën e fshatit Dumnicë, kur do të ndodh ajo.

z.Avni Fetahu, U.D. drejtor i DKA, theksoi, duke ju falënderuar për vërejtjet dhe sugjerimet e juaj, unë po e filloj t'iu përgjigjem dhe të jap sqarime duke filluar nga diskutimi i fundit për të ardhur tek parafolësi i parë. Vërtetë është se gjendje është ashtu në fushat e sportit në shkollën e fshatit Dumnicë dhe ashtu e kam gjet, por në këtë vit nuk kemi të planifikuar investime në fusha sportive për shkak të një kontrate të lidhur ndër vite dhe e cila ka krijuar pengesa dhe për të cilën nuk jemi përgjegjës, mirëpo duhet t'i jepet një epilog i caktuar dhe për vitin e ardhshëm të planifikohen fusha sportive mirëpo duke i'u dhënë prioritet fushave sportive brenda hapësirave shkollore të cilat jemi në dijeni se si i kemi gjete dhe në çfarë gjendje janë.

Sa i përket çështjeve të ngritura nga z.Ekrem Rrahmani, specifikimet dihet qartë se drejtori nuk merret me këtë çështje de atyre detajeve që i potençoi, do të thotë janë zyrtarët përkatës në kuadër të Drejtorive dhe kjo kontratë nuk është vetëm kontratë e Drejtorisë së arsimit por është edhe e Drejtorisë së Shëndetësisë dhe Mirëqenies Sociale si dhe e Drejtorisë së Administratës, kështu që kjo

mund të jetë arsyeja që është ai numër i madh i atyre çështjeve që u përmendën, dhe sa jam në dijeni unë është një kontratë dy vjeçare e që nënkupton se mund të shpenzohen edhe ato pas që bënë pjesë Shëndetësia, Administrata dhe Arsimi. Pra edhe njëherë e ceka se specifikimin e tyre e bënë ekspertë që është brenda Komunës, por nuk ka të drejtë drejtori të bëjë specifika brenda Komunës sepse është konflikt interesi, mirëpo ne iniciojmë procedura në bazë të kërkesave që marrim nga shkollat dhe vazhdohet tutje. Sa i përket stufave, fatkeqësisht ka shkolla që janë me stufa dhe tani nuk po e fajësoj as të kaluarën as të tashmen por gjendja është e tillë, për një vit nuk mund të bëhen të gjitha me efikasitet, por dal nga dal do bëhen dhe fati është i mirë se ka një vullnetë prej Kryetarit të komunës dhe prej Lëvizjes Vetëvendosje për ta orientuar buxhetin në arsim dhe këto të mira i shihni ju për çdo ditë dhe do t'i shihni edhe ditëve në vijim.

Asambleisti z.Gazmend Islami i përmendi disa sugjerime të duhura e që i kemi biseduar bashkërisht më herët dhe jam i hapur për çdo bashkëpunim të mundshëm për shkollimin profesional dhe e vërtetë se kemi nevojë kështu që jemi të hapur për çdo bashkëpunim të mundshëm sidomos për përvojat e juaja që i keni treguar shumë herë në këtë pikë.

Gjithashtu pati disa sugjerime edhe nga asambleistja znj.Qëndresë Hajrizi rreth fushës së shërbimit psikologjik dhe vizitave në shkolla e të cilat do t'i kemi parasysh edhe pse kemi realizuar vizita por do t'i intensifikojmë sërish.

Sa i përket çështjeve të potencuara nga z.Qëndrim Softolli, anulimi i konkurseve kanë një shpjegim dhe një sqarim për çfarë janë anuluar dhe natyrisht janë shqip të shkruara për çka janë anuluar dhe janë publike nuk janë të fshehta. Raportit të Auditorit paksa po i jepni një ngjyrim jo bash real, të jemi shumë të sqarë, pra në raportin e auditorit është një e gjetur dhe ajo është publike, ku thuhet se Komuna për zhvillimin e procedurave të rekrutimit ka respektuar Ligjin e arsimit parauniversitar dhe Udhëzimin Administrativ, ndërsa ka anashkaluar sistemin informativ për menaxhimin e burimeve njerëzore-SIMBNJ, pra duhet të bëheni real dhe nëse nuk e dini duhet të pyesni, çka nënkupton ky lloj menaxhimi, e që për disa konkurse të cilat nuk kanë qenë me urgjencë siç është zgjedhja e drejtorëve, ne i kemi bërë publikimin ashtu siç e parasheh dhe siç e ka dhënë sugjerimin auditori sepse nuk e kemi pasë për ngutë zgjedhjen e drejtorëve, mirëpo janë disa raste paksa më specifike, dhe tani në këtë vit të gjitha rekomandimet e auditorit i kemi zbatuar, vetëm një shembull, në shkollën e fshatit Herticë një mësimdhënëse e ka kërkuar pushimin, deri sa i kemi zhvilluar procedurat ashtu siç i parasheh Ligji që është 1 muaj njoftimi publik, mandej edhe 15 ditë afati i konkursit, ajo mësimdhënëse veç është kthyer nga pushimi, dhe kjo nënkupton se nga kjo humbin nxënësit humbin ata.

Listën e pritjes nuk e kam shpikë unë, madje tani së fundmi është edhe me vendim të Ministrisë së Arsimit në të cilin shkruhet qartë se lista e pritjes është me ligj që mund të shfrytëzohet, pra për herë të parë, dhe për këtë bëhuni real sepse ueb sajt aty është dhe mund të hyni të shfletoni prej vitit 2017 listat, a ka ndodh të publikohen listat qoftë të atyre të pranuarve qoftë atyre që janë në renditje, si dhe në rast se ka ndodh që nga ato lista ne të marrim ndonjë nga fundi ashtu siç ka ndodh më herët e që jeni në dijeni, dhe ta qesim në fillim, atëherë ballafaqohemi me argumente. Pra lista e pritjes është publike dhe ajo është duke u zbatuar, kurse e vërtetë është se auditori ka thënë se kjo ndikon në menaxhim jo të mirë të proceseve dhe veprimeve, por nganjëherë edhe të krijon vështirësi sepse çështja e pushimeve mjekësore dhe pushimeve të lehonisë tek mësimdhënëset, ata që kanë punuar në arsim e dinë shumë mirë që është paksa më specifike. Pra kjo që kërkohet me SIMBNJ nënkupton që të publikohet njoftimi publik, si dhe për komisionet intervistuese mos po mendoni që Zyra e personelit duhet të vijë në zyrat e LDK-së dhe ti merr emrat e anëtarëve, jo anëtarët e komisionit këtu merren këtu në Komunë sepse nuk ka tjetër ku t'i merr. Në rregull është se janë procedura këto mirëpo këtu prezent e kemi edhe menaxherin e personelit dhe jemi në dijeni se çfarë stafi ka

aktualisht ku gjithsejtë janë 4 persona, Drejtoria e Arsimit ka një varg të konkurseve, dhe unë si Avni Fetahu nuk është se jam duke ndier ndonjë relaks aty sepse kur del konkursi dhe aplikojnë 56 persona dhe duhet të pranohen vetëm 5 nuk është e lehtë ajo, do të thotë nuk është ndonjë vetëkënaqësi aty sikurse që po e konsideroni ju, mirëpo proceset nuk mund t'i lëmë në gjysmë.

Te çështja e ndarjes së orëve, duhet të bëheni më real dhe ta shihni më real procesin e jo vetëm të thoni kinse unë kam shpallë vetëm për dy norma kurse janë bërë 4 norma, ju e dini se një profesor që ka qenë në shkollën ekonomike është bërë zëvendës drejtor e që i cili i ka pas 20 orë. Pastaj jeni në dijeni se për fat të keq ka ndërruar jetë një drejtoresh e shkollës dhe është shtuar numri i orëve, prandaj nuk mund të thoni se keni shpall me kaq orë kurse i keni marrë me kaq orë, mirëpo ne i kemi marrë prej listës së konkursit, asgjë nuk kemi bërë më shumë.

U cekën edhe ndërhyrjet kinse unë kam ndërhyrë diku, mirëpo nëse është ashtu është mirë të ceken për çfarë ndërhyrjesh bëhet fjalë kinse unë kam ndërhyrë tek ndonjë profesor apo ndokund tjetër, ndërsa tek testi pisa që ka dështuar, goxha është e çuditshme kjo çështje sepse ende pa dal rezultatet e testit pisa të thuhet se ka dështuar, nuk e kapë truri askund këtë çështje, ndërsa ato dezinformata që i keni hedh ju duke thënë se nuk ka pasë kompjuter e gjëra tjera të ngjashme, mirëpo zyrtarët e arsimit të cilët e kanë pasë detyrë ta organizojnë këtë janë ndier tepër të kënaqur me kompjuterët që i kemi marrë prej shkollës “Enver Maloku” dhe i kemi sjellë në shkollën “Shaban Shala” ku është zhvilluar testi pisa, por që 2 nxënës kanë hezituar të marrin pjesë sepse kanë menduar se po dështojnë shumë dhe është dashtë të shkohet dhe t’ju realizohet testi në fshatin Dobratin, çfarë ka të keqe kjo, andaj kjo është bërë temë që për dy nxënës që është dashtë të shkohet t’ju realizohet testi pisa e që është menaxhim i Ministrisë, kurse unë kushtet ju kam ofruar.

Për çështjen e ditarëve të shkollave mund t’ju them se vitin e kaluar për herë të parë kanë qenë në kohë të gjithë, pra ajo që u tha është gënjeshtër dhe nga ka ardhë ajo informatë nuk e di.

Po ashtu edhe tek çështja e transferimeve të mundshme të nxënësve e që e keni bërë edhe temë mediatike sepse si temë prokuroriale nuk ka asgjë këtu, për atë punë edhe jeni në opozitë, të jemi shumë të kuartë sepse për herë të parë po e përmend mënyrë kronologjike ngjarjen e që ju është dashtë vetë të pyesni dhe do të isha shumë i hapur para juve, nxënësja Dafina Ferizi ka qenë kandidate e mundshme potenciale për tu regjistruar në njërin prej drejtimeve në mjekësi, edhe ndërkohë ajo ka qenë në listën pritëse në mesin e 8 të tjerave, të gjitha janë pranuar dhe për asnjë zhurmë nuk keni bërë, vetëm për një fëmijë të cilën unë mandej e kam njohur se është e një familje të varfër, sepse po të ishte e ndonjë politikani nuk do ta përmendeshit fare ju, por për fat të keq familje e varfër, por si do që të jetë në atë periudhë kohore Avni Fetahu ka qenë asambleist, mirëpo e ka marrë një vendim e ndjera drejtoresha e shkollës e që edhe unë po të isha në vendin e saj ashtu do të veproja, dhe prej presionit të madh të prindërve ajo e ka vendos “pa hile dhe pa sherr” dhe ata 8 persona i ka inkuadruar në drejtimet e mjekësisë që kanë qenë në listën e pritjes e njëra prej tyre edhe Dafina Ferizi, dhe pastaj çfarë ka ndodh është se kanë dashtë ta bëjnë politike këtë çështje ai klubi që për fat të keq ekziston aty në atë shkollë dhe që kanë dashtë të bëjnë politike dhe e kanë thirr inspektoratin arsimor i cili ka ardhë dhe e ka vlerësuar gjendjen dhe me të drejtë ka thënë se pa marrë parasysh procedurat që nuk janë ndjek mirë, që ka vërejtje, fëmija nuk bënë të mbetet pa shkollim, shumë i qartë, dhe unë pa dashur të ndërhyjë, me rekomandim të tyre i’u kam thënë se këto janë kërkesat dhe nxënësja nuk bënë të mbetet e pa notuar, është bërë një komision i cili e kanë notuar dhe e kanë mbyllë lëndën dhe kaq është kjo çështje, pra ajo vajzë ka qenë pjesë e listës pritëse që është pranuar në mesin e 8 nxënësve tjera e që për asnjë nuk keni ngritur zërin por vetëm për atë.

z.Qëndrim Softolli, theksoi, fillimisht dua të them se shkelja e ligjit për zyrtarët publik që drejtori parafolës e ka shkelur për të gjitha procedurat dhe tani po vazhdon ta shkel ende edhe pas gjetjeve të Zyrës së Auditimit. Ligji për zyrtarët publik, neni 67 i - organizmi i konkursit, paragrafi 1 thuhet,

themelimi i marrëdhënies së punës për një Nëpunës të shërbimit publik bëhet vetëm në bazë të një konkursi publik dhe të hapur të organizuar sipas këtij ligji, pastaj në paragrafin 5 thuhet, përveç kur parashikohet ndryshe me ligj të veçantë procedurat e konkurrimit organizohen nga Njësia e Burimeve Njerëzore, pra është organi i veçantë për këtë, do të thotë sërish jeni recidivist i shkeljeve ligjore. Drejtori e potencoj se ka qenë asambleist kur ka ndodhur transferi i nxënësës, mirëpo unë ju them se ashtu është ke qenë asambleist në atë kohë por e keni ushtruar detyrën e drejtorit e që edhe kjo ka qenë shkelje, madje edhe atëherë kam reaguar për këtë çështje, por nëse auditori nuk i ka parë gjitha këto çështje besoj se prokuroria do t'i sheh. Pastaj ti drejtor ke shpall konkurs për pranimin e mësimdhënësit për 10 orë, kur aktualisht keni mësimdhënës të drejtimit të njëjtë me përgatitje të kompletuar me 10 orë, do të thotë nuk ke tentuar t'i plotësoni orët mësimdhënësit që është i punësuar aktualisht por ke shpall konkurs, nëse mundesh arsyetoheni këtë. Listën e pritjes nuk e ke të rregulluar me asnjë ligj dhe këtë e ke shpikë ti drejtor sepse ligjërisht nuk ka listë të pritjes.

Anulimi i konkursit për tutor, drejtori e tha se shqip është dhe ne e dimë këtë dhe shumë qartë është, ku anëtarja e komisionit nga Organizata që e ka sponsorizuar këtë nuk e ka nënshkruar pasi ka gjetë shkelje, dhe këtë ti drejtor e dinë shumë mirë. Tani nëse i ke bërë gjitha këto shkelje për të gjitha këto punësime dhe nuk e ke ndjekur Ligjin për zyrtarët publik, Auditori të ka dhënë vërejtje kurse ti sërish po vazhdon njëjtë pasi që ky konkursi i fundit është shpallur më datë 26 korrik 2022, pra ty drejtor nuk është duke ta ndie fare për këto, por ka të tjerë që merren me këtë çështje.

z.Avni Fetahu, U.D. drejtor i DKA, theksoi, kërkoj mirëkuptim që më parë harrova ta potencoj se Organizatat VORAE dhe ajo Perde Home, herën e parë e ka nënshkruar testin me shkrim që ka qenë dhe herën e dytë kur është mbajtur intervista me gojë e kanë kryer intervistën dhe atë ditë për shkaqe familjare ajo anëtare e komisionit nuk ka qenë, dhe kjo është publike në ueb-sajt të Komunës, kështu që ajo që e tha parafolësi është dezinformatë. Më vie keq dhe si shprehi e kam edhe kur kam qenë mësimdhënës që nxënësve vetëm njëherë jua kam shpjeguar kurse herën e dytë nuk jam marrë shumë me atë çështje, prandaj shikojeni mirë edhe njëherë se konkursi i fundit dhe në tërë këtë vit konkurset janë publikuar përmes Sistemit Informativ për Menaxhimin e Burimeve Njerëzore, nëse nuk dinë të hysh (i drejtohet z.Qëndrim Softollit) eja të tregoj se si hyhet sepse edhe kompjuterin e njoh, dhe do ta shohësh se prej këtij viti të gjitha janë të publikuara e që kanë qenë edhe në vitin e kaluar, me përjashtim të disave që kanë qenë në pushim të lehonisë e që është dashtë shpejt të intervenohet për të mos i lënë nxënësit pa mësim.

Sa i përket listës pritëse, nëse më lejoni unë mund ta lexoj vendimin e qartë ku lista pritëse është me vendim të Ministrisë së Arsimit, vendim të cilin gjatë kësaj mbledhje, ndoshta në pikën të ndryshme do t'jua sjellë me numër të protokollit.

z.Qëndrim Softolli, pyet, na trego drejtor kur e ke marrë atë vendim dhe kur e ke përdorë ti.

z.Avni Fetahu, U.D. drejtor i DKA, vazhdoi, lista pritëse është përdorur në vazhdimësi dhe është zyrtarizuar si çështje, madje edhe në konkurs çdo herë e kemi vërejtur se lejohet lista pritëse sepse ajo është proces paksa më i komplikuar se sa që e mendon ti, shembull, të vie në moment që ndokush shkon në pushim të lehonisë dhe tani nxënësit nuk mund të lihen pa mësim, andaj duhet të angazhohen nga lista pritëse, por jo të merren sikurse viteve të kaluara ku nga fundi i kanë marrë dhe i kanë vërejtur aty ku kanë pasë dëshirë, por ajo listë që është publikuar në ueb-sajt, ajo duhet të respektohet.

Sa i përket Prokurorisë, Agjensionit Kundër Korrupsion, mediave, të gjitha dërgoni dhe ne jemi të hapur dhe jemi duke u marrë që çka do që kërkojnë informata jua përcjellim dhe ballëhapur jam në këtë çështje, madje asnjë ves nuk e kam për këtë çështje, mirëpo edhe politikën e kuptoj sepse në një kohë as facebook-un tim nuk goxonit të ma shfletoni kurse tani po i shikoni shkrimet e mia dhe kjo

më bënë përshtypje që po i'u pëlqejnë kështu që unë edhe atëherë kam qenë konkretë dhe jam edhe tani andaj nuk ka asgjë diçka që unë po ndryshoj prej qëndrimeve të mia.

z.Qëndrim Softolli, theksoi, të më flas drejtori parafolës për parime ia humb vlerën dhe kuptimin edhe vet fjalës parim. Se sa keni qenë i dëgjueshëm dhe trim e dim të gjithë sepse të kam pas koleg në atë kohë. Sa i përket asaj që ta shfletoj facebook-un t'ju them të drejtën nuk bie as ndërmend që ekziston. Nuk kam diçka më shumë edhe pse drejtori hyri në detaje të panevojshme me deklarime duke thënë ma shikoni facebook-un, pastaj duke thënë a dini apo jo të përdorni kompjuterin, por nëse ti ke mbete me na vlerësuar “paskemi shkuar posht” me një fjalë.

Sa i përket asaj që drejtori e tha se kam qen andej, kam qenë guximtar, kam qenë parimor, beso se të gjithë të njohim se kur zëri nuk të është dëgjuar prej Kryetarit të mëparshëm, ke qenë më dëgjueshmi, madje edhe në media e pati pranuar ish Kryetari se ti drejtor je një super servil, dhe është një fakt i patjetërsueshëm, andaj nuk kemi nevojë të hymë në histori por jemi duke diskutuar për aktualen dhe për të gjitha ato gjetje i keni të evidentuara dhe kallximet penale për të gjitha ato shkelje, prandaj Prokuroria merret me atë punë.

z.Arjant Topanica, theksoi, dua të ndërlihem tek Sistemi Informativ i Menaxhimit të Burimeve Njerëzore-SIMBNJ për të cilin drejtori i Drejtorisë së Arsimit e potencoj se është përdorur dhe është shfrytëzuar, ndërsa tek gjetjet e auditorit thuhet se në proceduar e konkursit në sektorin e arsimit është respektuar Ligji për arsimin parauniversitar dhe Udhëzimi Administrativ, por është anashkaluar SIMBNJ, prandaj gjetja e auditorit thuhet diçka ndryshe nga ajo që u tha më herët nga drejtori, ndërsa për ta përdorur atë sistem besoj se të gjithë dimë.

z.Avni Fetahu, U.D. drejtor i DKA, theksoi, të jemi të qartë se nuk bëhet fjalë a dini apo jo ta përdorni, unë po ju tregoj shqip që në vitin e kaluar për çështjen e drejtorëve të shkollave e kemi publikuar. Fillimisht duhet ta dimë se çka nënkupton SIMBNJ, ju tregoj se nënkupton se konkursin duhet ta publikojmë dhe ai të qëndroj për 1 muaj si njoftim publik duke publikuar edhe datat duke sqaruar në vet njoftimin se nga NN data për 14-15 dit tjera për konkurs, kaq ka punë dhe tjetër gjë nuk është paraparë në të Sistem, pra edhe auditori ka thënë se kjo ka ndodhë shkak i ndryshimeve që ndodhin shpesh në arsim e sidomos zëvendësimet për pushimet e lehonisë, edhe ata e kanë ditë që nuk është bash proces i lehtë ky, kështu që kjo është arsyeja.

Çështja tjetër, i nderuar Qëndrim Softolli, unë nuk jam as t'ju shes moral politik juve e as asgjë, qëndrimet e mia në lidhje me ish subjektin tim politik kanë qenë të qarta, madje aq më pak teje nuk pres unë ndonjë mburrje e që tani po t'ju them mbylle telefonin dhe nga 10 themelues të LDK-së përmendi vetëm 3 emra prej tyre, nuk din të mi tregosh, madje nuk e din as kur është themeluar LDK, kështu që ti mos më shit moral politik mua duke më përmend se ku kam shkuar e tek jam shkuar sepse qysh kam diskutuar me Agimin atë e din vetëm ai, dhe ia kam sqaruar qartë çdo gjë dhe kam qenë shumë konkret me të, madje kam qen shef i grupit të këshilltarëve të LDK-së dhe e di sa vështirë ka qenë sepse është dashtë për të gjitha temat me diskutuar unë nga ikja juaj që as temat nuk i marrshi për t'i diskutuar, kështu që leje atë çështje.

z.Qëndrim Softolli, nga vendi ndërhyri duke theksuar, mirë që dole këtu sepse edhe këtu të prita sepse ku unë i kam pasë kundërthëniet për ish pushtetin që ka qenë në atë kohë aktual, ti ke qenë ai që e ke rregulluar e ke lëmuar dhe i ke qëndruar në vijë ish Kryetarit z.Agim Veliu. Pra për ata ju kemi ikë temave sepse kur ne kemi thënë se nuk është në rregull, ti ke dal dhe e ke mbrojtur duke thënë se në rregull është.

Kryesuesi i Kuvendit, theksoi, kërkoj nga dy parafolësit që të ndalemi pak dhe të kthehemi në temë sepse nuk është mirë të kalohet në çështje personale duke u shprehur këtu se nga keni qenë dhe në cilin subjekt politik sepse nuk është duke na interesuar asnjërit prej neve.

z.Qëndrim Softolli, theksoi, unë ku kam qenë edhe jam tani, por nuk jam shtegtar politik.

Kryesuesi i Kuvendit, vazhdoi, tema e dy parafolësve nuk është problem i qytetarëve dhe atyre që na përcjellin live tani, mirëpo qytetarëve i'u intereson se si ne po i zgjedhim problemet e tyre dhe si po i paraqesim në Kuvend, prandaj unë mendoj se jemi duke e tepruar paksa duke u marrë njëri me tjetrin për çështje personale dhe lëvizjet nëpër parti politike e që është e drejtë e çdo qytetari dhe nuk dëshiroj të merrem me atë çështje, andaj ju lus të qëndrojmë në temë.

z.Avni Fetahu, U.D. drejtor i DKA, theksoi, edhe njëherë dëshiroj të merrem me atë çështje sepse anëtari i Kuvendit në fjalë e potencoi një çështje dhe më duhet t'i përgjigjem me argumente, të jemi të qartë, qëndrimet e mia për fat të mirë janë të regjistruara dhe janë në procesverbale, nëse e gjeni ndokush që një shef i grupit të këshilltarëve siç kam qenë i LDK-së, nuk e kam votuar as buxhetin për shkak të mos investimeve në arsim, dhe këto janë publike, andaj nëse e konsideroni si servilitet ju këtë atëherë në rregull, si të doni, mirëpo unë e di qysh kam mbrojtje dhe qysh kam diskutuar, kurse të drejtën nuk ia mohoj (fjala është për ish Kryetarin e Komunës) që më ka lutur të bëhem drejtor i Drejtorisë së Administratës dhe drejtor i Drejtorisë së Inspeksionit, por nuk e kam pranuar.

z.Gazmend Islami, theksoi, jemi të zgjedhur këtu që të mundohemi të bëjmë diçka më mirë, më drejtë, t'ju japim qytetarëve tanë jetë më të mirë dhe shkollim më cilësor. Kush çfarë ka bërë e dimë të gjithë, andaj përse kemi nevojë të hymë në tema personale, kush, çka, tek, si, në fakt ne tani e dimë ku është ky zotëria (z.Avni Fetahu) dhe e dimë ku ka qenë e që tani as nuk mund ta bëjmë më të mirë e as më të keq sepse është ky që është. A ka dallavere, ka plotë, a ka të këqija ka plotë, madje edhe ti drejtor e din që ka, dhe kur e them këtë e ka parasysh se ne të gjithë e njohim njëri tjetrin, edhe në pushtetin e kaluar ka pas, edhe këtu ka plotë, por dua të them se ne duhet t'i ikim këtyre gjërave dhe të mundohemi të përmirësohemi, e aq më shumë se që përmirësohemi i bëjmë nderë edhe vetës, edhe Komunës por edhe qytetarëve tanë, ngase po të fillojmë e të flasim për dallavere dhe të lëshohemi në detaje, kush, çka, si, të gjithë njihemi mes vete sepse ose jemi miqësi, tezaka, shoqëri etj, janë gjëra që i dimë të gjithë por përse i fshehim në maskat tona është diçka tjetër, mirëpo i dimë, e që meritë do të ishte sikur të mund t'i ikim atyre, të përmirësohemi dhe të mos i bëjmë ato që i kemi bërë. Pra posa jemi zgjedh, jemi njerëz më energjik, pastaj kemi këtu njerëz që kanë kontribuar shumë, prandaj është mirë t'i mbyllem këto privatësi sepse mua më pengojnë shumë këto gjëra siç ishte ajo rreth përdorimit të kompjuterit e të ngjashme e që nuk është mirë të hyhet në ato gjëra sepse të gjithë kemi kryer ngapak shkollim, të gjithë dimë shkrim lexim, por po të hyhet t'ju shikohet statuset në facebook del që gjysma këtu as gjuhën shqipe nuk e njihni dhe kur e them këtë e bazoj në atë çfarë lexoj unë ku dhe si përdoren (presjet, ë-jat, q/ç-jat, gj/xh-jat, dhe shumica nuk e din ku vjen pyetje pikëpyetja e as pikëçuditsja), mirëpo si do që të jetë unë jam për shkollim cilësor dhe që të jepet kontributi prej çdo njeri për të mirën e këtij vendi, nëse merremi me thashetheme dhe me shpifje nuk na qon përpara askund kjo.

z.Kasib Bashota, theksoi, ne jemi para qytetarëve dhe të zgjedhur prej qytetarëve, andaj nuk po më pëlqen ky debati personal as i drejtorit të Drejtorisë së Arsimit as i diskutuesve përkatës nga ana e LDK-së. Nuk ka njeri pa mangësi por të mos kthehet debati në personale sepse jemi këtu për të mirën e qytetarëve dhe për gjëra të mira.

Tani ne mund t'i themi drejtorit se jemi duke parë ndryshime në shkolla, investime e që ka nevojë vendi të ketë investime e sidomos arsimit i cili ka një buxhet të jashtëzakonshëm dhe po presim që shkollat të jenë model në Llap.

znj.Arjeta Abazi, theksoi, kam pyetje për drejtorin e Drejtorisë së Arsimit i cili në informatë e ka paraqitur se ka mbi 500,000.00€ buxhet për investim në shkolla, mirëpo dua ta di konkretisht për shkollën "Shaban Shala" duke qenë në dijeni se viteve të kaluara parafillorët nuk i kanë pasë as kushtet elementare për mbajtjen e mësimin, shembull, janë ulur në ulëset e të rriturve, nuk kanë pasë mjete konkretizime, kanë mbajtur mësimin nëpër klasat ku njëherë kanë mbajtur mësimin parafillorët

e pastaj klasat e para e tutje, andaj do të doja për hir të opinionit dhe qytetarëve ta dimë kur do të bëhet ky investim dhe a do të jenë të gatshëm të fillojnë në shtator mësimin parashkollorët me kushtet që i'u takojnë atyre.

z.Avni Fetahu, U.D. drejtor i DKA, përgjigje parafolëses, theksoi, lidhur me investimet në shkolla e posaçërisht në shkollën “Shaban Shala” jemi dëshmitar të gjithë se me çfarë intenziteti janë duke punuar kompania përkatëse për të cilën zhvilluar proceduar e tenderimit nga Komisioni European ku ata janë duke e rregulluar hapësirën e jashtme për të vazhduar me hapësirën e brendshme. Kemi një kontratë të veçantë edhe në nivel komunal dhe presim të bëjmë ndërhyrje në këtë shkollë edhe brenda hapësirave dhe në ndarje të klasave aty ku është e nevojshëm për të krijuar atë ambient që u potencua nga parafolesja edhe pse paska është specifike çështja e inventarit ngase nga ky vit po jemi të detyruar që në bazë të një kontrate që është e nivelit qeveritar, vetëm të bëjmë kërkesën për inventar dhe në atë pjesë të inventarit nuk ka strukturë të ulëseve çfarë kërkon projekti sikurse që e kemi bërë me projektin “Shpresë Kosova” me Organizatën Caritas, kështu që jemi në përpjekje ta gjejmë një modalitet që me një tender të veçantë ashtu siç kërkohet dhe të bëjmë zgjidhje për të gjitha klasat parafillore.

Kemi filluar me disa TV-Monitor për të vazhduar në vitin e ardhshëm edhe me tabelat e mençura që do të krijojnë një ambient më të mirë edhe për parafillorët por në të njëjtën kohë edhe jemi në përpjekje të kurojmë nga muaji shtator sidomos këto dy shkollat (Shaban Shala dhe Naim Frashëri”) mësimin kabinetik e që nënkupton që mësimdhënësi të qëndroj në klasë, nxënësit të shkojnë aty që do të thotë se edhe bëhet ruajtja më e mirë dhe do të krijohet hapësirë për parashkollorët.

z.Valon Demolli, theksoi, ka edhe një pyetje për drejtorin e Drejtorisë së Arsimit, tek rasti i asaj zonjës Dafina Ferizi e cila është transferuar në fund të gjysmë vjetorit të parë, do të thotë një javë pa përfunduar gjysmë vjetori, andaj qysh e potencoj drejtori që kjo nxënëse kjo nxënëse nuk ka qenë në 8-shen e parë por në fund të listës së të papranuarve, mirëpo ja ku e keni edhe vulën në këtë dokument ku thuhet, njoftohen mësimdhënësit se nxënësjë Dafina Ferizi të notohet sepse DKA ka mundësuar transferimin e saj. Pra nga pozita e asamblistit ke dhënë vendime në kuadër të Drejtorisë së Arsimit.

z.Avni Fetahu, U.D. drejtor i DKA, theksoi, meqë përmendët vulën atë mund ta shihni me vëmendje që është vulë e shkollës së mesme ekonomike dhe në këtë aspekt të menaxhimit unë nuk mund t'i qëndroj mbi kokë secilit në shkolla se çka bon me vula. Isha shumë konkret, e ndjera ka ndërruar jetë dhe nuk është në këtë botë më (fjala është për ish drejtoreshën e shkollës ekonomike), por po të isha në vendin e saj dhe unë ashtu do të veproja dhe nuk do ta leja asnjë fëmijë të përjashtohet sepse kanë qenë në listë dhe nëse ata 8 të tjerët kanë bërë që të transferohen, nuk ka pasë të keqe as e përmendura, e që nuk e di a ka qenë e fundit apo ku ka qenë por që ka qenë në mesin e tyre, as nuk ka ndonjë lidhje familjare me atë vajzë e as nuk e njoh kush është, mirëpo kur është ardhë me kërkesë të qartë prindi i saj dhe e kam parë gjendjen e varfër çfarë e ka dhe gjitha tjerat, e kam respektuar por unë nuk e kam bërë krye në vete këtë sepse kanë ardhë nga Ministria të cilët i kanë dhënë rekomandimet dhe me të drejtë kanë thënë që sipas Ligjit nxënësjë nuk guxon të mbetet e pashkolluar. Ajo nxënëse nuk faj që nuk janë zhvilluar proceduar nga kujdestarja e klasës.

Për këtë çështja kam ndier keqardhje, madje kam ngritur komision disiplinor për mësimdhënësin me të cilët kam punuar dhe jam detyruar që përmes komisionit të dënohen në pagë e që muajin e kaluar ata mësimdhënësin kanë marrë pagë më pak, kështu që nëse do të kisha ndonjë interferim unë në atë çështje, nuk do t'i zhvilloja këto procedura të komisioneve. Pastaj është ngritur edhe komisioni i ankesave dhe e kanë dërguar në shkallën e dytë e që i kam inkurajuar sepse i kam pasë kolegë dhe i'u kam thënë se nëse mendoni se ju është bërë e padrejtë, mund të vazhdoni edhe në Gjykatë.

znj.Donjetë Sheqiri, theksoi, dëshiroj të ndalem tek siguria në shkolla, sidomos në shkollat e qytetit, rrahjet mes nxënësve, përdorimi i armëve të ftohta, shitja dhe konsumi i pijeve alkoolike përreth shkollave, andaj a është duke ndërmarrë Drejtoria e Arsimit ndonjë veprim për parandalimin e këtyre dukurive qoftë përmes Këshillit Komunal për Siguri në Bashkësi qoftë përmes instancave tjera, andaj kërkoj të njoftohemi më në detaje sepse kohëve të fundit janë dyfishuar këto raste dhe është shumë shqetësuese.

z.Avni Fetahu, U.D. drejtor i DKA, theksoi, ajo që e potencoj parafolësja është shumë e vërtetë, sidomos në shkollën ekonomike për shkak të numrit të nxënësve tani të përzier siç janë në mjekësi, bujqësi, juridik etj, e që janë duke u krijuar disa zënka më shumë se në shkollat tjera.

Stafi i policisë ju e dini se në çfarë gjendje është ke që janë 2 policë civil të cilët e monitorojnë këtë proces. Rrahjet e shpeshta po ndodhin për fat jashtë oborreve të shkollave dhe nuk po krijojnë ndonjë hapësirë që ndërmarrin veprime vetë ato shkolla.

Rregullorja në fjalë për të cilën me shumë kompetencë e thoshte z.Qëndrim Softolli se është e kundërligjshme, vlerësimi është sjellë tani së fundmi zyrtarisht se asnjë problem ligjor nuk e ka ajo rregullore, dhe e njëjta nga muaji shtator fillon së zbatuari dhe ajo rregullore do ta shihni se do të na e mundësoj të gjithë neve qoftë si prindër qoftë si mësimdhënës, qoftë si asambleistë, qoftë si drejtorë, ta monitorojmë procesin më mirë. Rregullorja nuk ka pas qëllim që t'i fusim në grushte drejtorët ashtu siç e potenconit por tani do të bindeni se është shumë funksionale sepse ashtu funksionon në të gjitha shkollat në nivel të Kosovës, e që njëjta shpresoj se do të na përmirësoj gjendjen në masë të madhe sepse parashih masa të qarta që nga nxënësi deri tek drejtori i shkollës.

znj.Edona Shabani, theksoi, dua t'i them drejtorit të Drejtorisë së Arsimit se meqë e keni kaq zemrën e mirë dhe jeni kaq bamirës, bamirësia së pari niset prej shtëpisë tënde, tani në lagje, pastaj në qytet dhe në fund fshatrave. Ju e dini shumë mirë se në fshatin ku jetojmë ne së bashku me drejtorin, ka shumë nxënës që kanë nevojë për shkollim. E përkrahi shumë atë që drejtori e potencoj që t'iu ndihmohet njerëzve që kanë nevojë, mirëpo i them drejtorit që fillimisht të niset nga shtëpia e tij, lagjja e tij, fshati i tij, pastaj të del në qytet dhe në fshatra.

Shumë do të doja që drejtori ta ketë zemrën aq të mirë edhe pse dyshoj në këtë, por po ta ketë unë personalisht do ta përkrahi, mirëpo e di që jo sepse nuk është kjo çështje vetëm sot.

z.Avni Fetahu, U.D. drejtor i DKA, theksoi, falënderoj parafolësen bashkëvendase e imja, posaçërisht familje e juaj e cila ka dëshmuar ndër vite për punët e mira që ka bërë dhe atë nuk e mohon askush e që kam respekt për atë, mirëpo sa i përket shkollës së fshatit nuk është se nuk janë bërë investime por kemi dashtë të tregojmë një qasje më ndryshe paksa, nuk kemi dashtë të veprojmë në Shtetdim sikurse që ka ndodh në Bradash të ndërtohet edhe një shkollë dhe të bëhen dy, por kemi dashtë të tregojmë një gjë të mirë që të fillohet me të gjitha shkollat njëjtë, e jo të themi se kjo është e vendit tim dhe të bëhen investimet aty. Edhe përkundër nivelit të shkollimit që jemi në dijeni të gjithë çfarë është nëpër fshatra e çfarë është në qytet, unë fëmijët i kam në atë shkollë të fshatit dhe as nuk kam bërë asnjë dallim diçka, kështu që kjo është tëra.

znj.Edona Shabani, theksoi, nuk e kisha fjalën për shkollën e fshatit Shtetdim sepse ajo në gjendje shumë të mirë për momentin, mirëpo e kisha fjalën për nxënësit dhe rrethin e që jemi në dijeni shumë mirë që ka shumë të tillë që t'iu jepet "suport" atyre në fshat që kanë nevojë dhe që janë të varfër ashtu siç e potencoj drejtori e që është në dijeni shumë mirë për ata që kanë nevojë, prandaj e thash që nëse do të veproje ashtu do të përkrahja, dhe për këtë temë nuk hyhet në ngjyra politike.

znj.Arjeta Abazi, theksoi, dëshiroj të kthehem sërish tek rasti i asaj vajzës që u përmend më herët me emër e mbiemër dhe që u sqarua, por që fillimisht do të kërkoja që kushtet materiale të mos përmenden këtu publikisht me emër e mbiemër sepse ajo vajzë mund të ndihet keq. Mandej nuk do të doja të pranohet në një drejtim të caktuar një vajzë për hir të asaj se është "gjynah" dhe nuk i ka

kushtet ngase sigurisht që kanë qenë kushtet dhe kriteret e caktuara të aplikimit dhe e njëjta ka mundur të shkoj në një drejtim tjetër të caktuar të cilin ka munduar ajo ta arrit.

Kështu ka ndodhur edhe me bursat e studentëve, e që mendoj se nuk duhet të ngatërrohen rastet sociale me bursa apo me regjistrim në një drejtim të caktuar siç është rasti në fjalë ku dikujt i pëlqen mjekësia dhe duhet të dërgohet patjetër duke u thirr në atë se është “gjynah”. Pra nuk e njohë atë vajzë dhe atë familje, por mua nuk po më duket në rregull që së pari të përmenden kushtet sociale e mandej të thuhet e dërgova atje sepse ka qenë në listë të pritjes dhe se është “gjynah” e që secili prej neve do ta bënte ashtu, mirëpo po t’iu hymë “gjynaheve” mendoj se ka shumë “gjynahe” dhe shumë parregullsi, por do të doja të shkohet në mënyrën e drejtë e që edhe do të duhej të shkohej.

z.Ekrem Rrahmani, theksoi, lidhur me atë që drejtori i Drejtorisë së Arsimit e tha se kam ngritur komisionin i cili i ka dënuar disa mësime, dua ta di se a është detyrë e këtij drejtori të ngritë komision i cili pastaj shkon edhe dënon atje me dosllaki sikurse në “partinë e punës”, apo është komision i shkollës që e cakton dhe e voton shkolla si komision për dënime dhe jo dënime.

E them këtë se drejtori në fjalë i ka dërguar disa letra atje në atë shkollë me nënshkrime e me vulë false e të cilat pastaj ka shkuar dhe i ka tërheqë, por që t’ia lëmë prokurorisë e cila është duke u marrë me këtë rast, mirëpo qysh dhe pse ky drejtor të formoj komision duke u bazuar në atë se i ka pas koleg deri tani dhe ka punuar me ata mësime kurse tani ata që i ka më shokë i qet në komision dhe t’i dënoj ata tjerët që nuk e kanë dëgjuar drejtorin, nuk shkon kjo punë kështu.

Pra është komisioni i shkollës, përse ky drejtor të bëjë komisione.

z.Avni Fetahu, U.D. drejtor i DKA, theksoi, formimi i komisioneve rregullohen me procedura ligjore dhe Drejtoria e Arsimit duhet të ketë komisionin disiplinor dhe atë të ankesave, ndërsa komisioni që u përmend nga parafolësi duhet të bëhet pikërisht brenda shkollës me këtë Rregulloren të cilën e refuzonit ju disa dhe e cila i ka kaluar të gjitha procedurat ligjore dhe që është vendim zyrtar se e njëjta është brenda kornizave ligjore. Çështjen në fjalë nuk e kemi bërë me inat sepse aty kanë qenë edhe profesor të subjektit të LVV-së, kështu që nuk ka të bëjë diçka me dallime, por për fat i kanë thirrë vetë ejani shikoni gabimet dhe i’a pafshin hajrin. Pajtohem me asambleisten parafolëse se nuk duhet të potencohet dikush me emër e mbiemër, por po më vie keq që atë e ka përdoruar partia juaj, për fat të keq ka qenë ajo e para që e ka publikuar dhe për këtë e them sepse jam i informuar në detaje. I vetmi gabim ai asaj nxënëseje ka qenë që nuk ka bërë kërkesë për transferim, dhe nuk ka shkuar ajo në atë drejtim për shkak të “gjynahit” sepse po të mos ishte në listë të pritjes, kushedi kush dhe çka po të, ishte nuk do të mund të hynte aty. Vendimin e ka marrë drejtoresha e ndjerë që ka qenë e asaj shkolle, dhe mendoj se ka marrë vendim të drejtë sepse nuk ka bërë dallime, i ka marrë gjithë ata që kanë qenë në listë të pritjes e që Ligji e mundëson që klasa mund të rritet deri në 32 nxënës por jo më shumë, e ajo drejtoreshë i ka marrë dhe i ka shpërndarë ata 8 nxënës/e që kanë qenë në atë listë e që në mesin e tyre ka qenë edhe nxënësjë në fjalë e që as kjo e as të tjerat nuk kanë bërë kërkesë, prandaj krejt këto i kanë bërë një grup i ish pastrisë time të cilët deshtën ta bëjnë politike këtë çështje, por për fat të keq, u munduan, e benën por sërish në dëm të nxënëses sa për ti dalë emri e mbiemri, e që t’ju them të drejtën unë edhe emrin kur e kam përcjellë në atë kohë e kam ngatërruar e kam shkruar “Dafina Zeqiri” sepse nuk është që e kam njohur.

z.Ekrem Rrahmani, theksoi, i them drejtorit se ka aty mësime që janë dënuar për mos notim atë nxënëse por ka që janë dënuar edhe që e kanë dënuar dhe dënimet i kanë marrë të njëjtë, andaj tani shtrohet pyetja ai komision cilin dënim e ka hënë me të drejtë e cilin pa të drejtë. Unë i njohë të paktën dy persona ku njëri prej tyre është dënuar që nuk e ka notuar atë nxënëse e që ti drejtor pastaj ke formuar tjetër komision dhe je shkuar e je munduar që ta notosh tinëz a çfarë ke bërë e dinë ti mirë këtë, kurse tjetri mësime është dënuar që e ka notuar atë nxënëse, andaj tani dëshiroj ta dijë se cili dënim është i ligjshëm.

z.Avni Fetahu, U.D. drejtor i DKA, theksoi, nuk e kam marrë asnjëherë në jetë rolin e gjykatësit dhe nuk mund të përgjigjem në pyetjen e parafolësit sepse vendimet e komisionit disiplinor kanë qenë shumë të pavarura e që nuk e kam idenë se kon e kanë dënuar më shumë e kënd më pak, por ata vetëm e kanë respektuar ligjin ngase janë ankuar tek komisioni i ankesave e që ky komision sërish i ka refuzuar.

znj.Tringa Sfishta, theksoi, pyetje për drejtorin parafolës, në fshatin Shajkoc a është ndjekur procedura e konkurrimit për një vend pune me gjuhë angleze si pozitë e që është pranuar.

z.Avni Fetahu, U.D. drejtor i DKA, përgjigje parafolëses, theksoi, është zhvilluar procedura e konkursit dhe ajo që është pranuar aty ka qenë pjesë përbërës e konkursit, ka qenë pjesë përbërës e atij lokaliteti ku vepron dhe punon dhe realisht ku jeton e që është e martuar, mirëpo pa dashtë t'i jap ngjyrimë politike e them se nuk është bash e lehtë që dikush që është duke pritur 10 vite radhazi si e diplomuar, është e atij vendi, kurse të merret në punë dikush nga një fshat tjetër dhe t'i bëhet zgjidhje atij fshati, ngase pastaj mund të krijohen konflikt. Pra ajo ka qenë pjesë përbërëse e konkursit.

z.Hilmi Hoxha, Kryesuesi i Kuvendit, theksoi, edhe unë dua t'i them disa fjalë sepse kur flitet për arsim besoj se e kam përvojën e gjatë ku me 01 shtator i bëjë 35 vite përvojë pune në arsim, që do të thotë se arsimin e kam përjetuar në shumë faze, qoftë para luftës kur na kanë larguar prej shkollave por edhe pas luftës kur jemi kthyer në shkollë. T'ju them të drejtën e kem shumë për obligim të bëjmë për arsimin e sidomos ne që jemi këtu, jo vetëm të flasim por të bëjmë diçka e që t'ju tregoj tani se unë vetit i kam dhënë detyrë që të vizitoj çdo shkollë ku mbahet mësim në Llap e që një gjë të tillë do t'jua kërkoja edhe juve si anëtar të Kuvendit, e pastaj të flasim e jo sikurse tani që flasim vetëm përmes facebook.

Unë e di se ka shumë parregullsi nëpër shkollë, ka probleme e telashe të ndryshme, por ne jemi që t'i zgjidhim ato, madje vijmë nganjëherë edhe në pozita që duhet t'iu ndihmohet ndonjë nxënës.

Nuk dëshiroj ta zgjati por është mirë të punojmë për arsim, t'i vizitojmë shkollat, dhe pastaj normal të kërkojmë nga drejtori i DKA t'i realizoj investimet dhe t'i rregulloj çdo herë shkollat dhe t'i bëjë më atraktive për nxënësit.

Problemi më i madh në shkollë është që nxënësit nuk po e dojnë shkollën, kjo është me rëndësi dhe kjo është temë, por jo nuk është me rëndësi se a po e bëjmë 1 kompjuter më shumë a më pak, prandaj e them që problemi kryesor është që t'i bëjmë shkollat e mira në mënyrë që nxënësit tanë t'i dojnë ato dhe të shkojnë me dëshirë në shkollë, andaj kjo më duket si më e rëndësishmja.

z.Naim Çunaku, theksoi, në rend të parë i nderuar Kryesues jua kam lakminë që je Kryesues dhe po e merr fjalën sa herë që po dëshiron dhe nuk po kush t'jua matë as kohën e diskutimit e që për një pikë të rendit të ditës ke të drejtë të diskutosh aq sa kam të drejt unë si anëtar i Kuvendit, asgjë më shumë, ndërsa sa i përket përvojës tuaj të gjatë në arsim i nderuar Kryesues, në të kaluarën ka qenë një sektorë i institucioneve që ka ndarë dekorata dhe mirënjohje dhe nuk ju është ndarë në atë kohë sepse po del se nuk e ke merituar sepse përndryshe do të të ndahej edhe ty (kjo që e potencova të merret si shaka jo diçka tjetër).

Gjithashtu këtu në sallë ajri është bërë paksa i zënë dhe kemi nevojë për një pauzë të shkurtër të paktën 10 minuta me qëllim të ajrosjes sepse po shihet se edhe temperaturat janë të nxehta dhe se që 3 orë jemi pa dal nga salla, andaj kërkoj pauzë, kujt t'i rrihet mirë, kujt nuk i rrihet të shkon mirëpo ne nuk është mirë të "dhunohemi" duke qëndruar në këtë ajër dhe kaq gjatë në sallë.

Kryesuesi i Kuvendit, përgjigje parafolësit rreth dekoratave, theksoi, dekorata nuk kam marrë sepse asnjëherë nuk kam qenë me partinë në pushtet.

z.Naim Çunaku, theksoi, Kryesuesi e tha se nuk ka qenë në pushtet dhe nuk ka marrë dekorata, e unë i them që tani është në pushtet dhe ta shfrytëzoj këtë duke marrë 5 dekorata dh të njëjtat t'i vendos në gjitha anët.

znj.Sebastina Vokrri, theksoi, për të mos marrë shumë kohë edhe unë e kam një pyetje për drejtorin e Drejtorisë së Arsimit, objekti i shkollës së vjetër në fshatin Sfeqël që është shumë i dëmtuar qoftë brenda ashtu edhe jashtë, edhe pse sakt nuk po e di se cilës drejtori i takon, mirëpo a parashihet ridestinimi i atij objekti sepse ai tani më nuk është as shkollë sepse nuk ka asgjë në të.

Po ashtu pyetja tjetër është se a parashihet ndërtimi i sallës së edukatës fizike në shkollën e fshatit Sfeqël sepse është një ndër shkollat e mëdha në Komunën e Podujevës e cila nuk ka sallë të brendshme të edukatës fizike.

z.Avni Fetahu, U.D. drejtor i DKA, përgjigje parafolëses, theksoi, objekti në fjalë i ish shkollës në fshatin Sfeqël i ka dy alternativa. Kemi pasë një Organizatë e cila ka shpreh gatishmëri që atë objekt ta bëjnë një qendër rinore mirëpo nuk kemi mund të arrijmë deri në finalizim, është një opsion për të mund të shndërruar në Çerdhe me investime konkrete. Ndërsa sa i përket sallës së edukatës fizike, për këtë vit nuk ka planifikim mirëpo për vitet në vijim prioritet është të krijohen salla të mbyllura të edukatës fizike për shkak të motit që mbizotëron në Kosovë sepse është e pamundur ta realizojnë plan programin profesorët e edukatës fizike me këtë gjendje çfarë e kanë, pra prioritet i kemi mirëpo ta keni parasysh se ato kërkojnë edhe investime, por fillojmë me shkollën “Enver Maloku” për të vazhduar me shkollat tjera.

Kryesuesi i Kuvendit, theksoi, diskutimet për këtë pikë të rendit përfunduan, shkojmë në pauzë 10 minuta.

Pas kërkesave për një pauzë të shkurtër me qëllim të ajrosjes së sallës, Kryesuesi i Kuvendit jep pauzë për 10 minuta, përkatësisht deri në ora 16;00.

Pas pauzës prej 10 minutave, Kryesuesi i Kuvendit vazhdon mbledhjen duke konstatuar kuorumin ku në sallë aktualisht prezent janë 21 anëtar/e të Kuvendit.

Kryesuesi i Kuvendit, vazhdoi, siç jeni në dijeni në mbledhjen e mbajtur një ditë më parë të KPF-së janë shtuar edhe 4 pika të rendit të ditës, 3 prej tyre me propozimin e drejtorit të drejtorisë së Buxhetit dhe Financave, dhe 1 pikë me propozimin e anëtares së Kuvendit znj.Mrika Thaçi, kështu që vazhdojmë me shqyrtimin tyre sipas konstatimeve të rekomanduara nga KPF.

Pra për pikat në vijim janë pika të ngjashme dhe kanë të bëjnë me projekte të Drejtorisë së Bujqësisë Pylltarisë dhe Zhvillimit Rural, konkretisht me financat e projekteve përkatëse, andaj fjalën do t'ia kaloja drejtorit të Drejtorisë së Buxhetit dhe Financave.

z.Naim Çunaku, theksoi, rreth rregullores së punës së kuvendit, pikat e shtuara nuk u adresuan që të marrin vendin aty ku duhet si pika të para pasi që ishin pika shtesë të propozuara për seancën, dhe tani jemi në një situatë ku deri tani Kryesuesi i Kuvendit punoj sipas rendit të ditës ashtu siç e ka pasë të propozuar dhe pikat shtesë i la në fund, shtrohet pyetja, përse tani këto pika po vë para pikës Të Ndryshme, meqë veç fillove kështu i nderuari Kryesues.

8. Propozim vendimi për shtim të buxhetit dhe kod të ri, për projektin “Furnizimi dhe montimi i serrave”.

9. Propozim vendimi për shtim të buxhetit dhe kod të ri, për projektin “Furnizimi me mekanizëm bujqësor”.

10. Propozim vendimi për shtim të buxhetit dhe kod të ri, për projektin “Furnizimi me mëshqerra”

z.Fatlum Osmani, U.D. drejtor i Drejtorisë së Buxhetit dhe Financave-DBF-së, paraqiti fjalën hyrëse rreth tri pikave të rendit të ditës, ndër të tjera theksoi, me qëllim që të mos e marrë fjalën tri herë dhe që të dinamizojmë punën për këto tri propozim vendime për shtim të buxhetit në tri projekte të fushës së bujqësisë sipas propozimeve përkatëse, projekte të cilat normalisht janë prokuruar nga Komuna Podujevës mirëpo marrin pjesë edhe fermerët përfitues me një shumë buxhetore participim 30% të vlerës së projektit, dhe asnjëherë këto participime nuk kanë kaluar përmes Kuvendit të Komunës por janë ndjekë procedurat përmes rregullores së subvencioneve, është bërë participimi dhe është përgatitur dokumentacioni i nevojshëm, është dërguar në Ministrinë e Financave e cila ato mjetet i ka alokuar mjetet financiare nga participimi dhe në fund është bërë pagesa Operatorit Ekonomik që ka fituar tenderin për projektet përkatëse, mirëpo këtë vit Ministria e Financave na ka obliguar që pjesën e participimit të buxhetit nga participimi i përfituesve të kaloj përmes Kuvendit të Komunës me vendim, e që siç e ceka kemi tri propozim vendime të cilat po besoj keni mund t’i lexoni dhe analizoni, ku shuma e participimit me 30% të vlerës së projektit në këtë rast shuma për projektin e furnizimit me mëshqerra është 60,588.00€, pastaj për projektin furnizim dhe montim i serrave shuma e participimit është 36,236.8€ si dhe për projektin e furnizimit me mekanizëm bujqësor 36,141.00€, prandaj ju ftoj t’i mbështetni këto bartje nga participimi i qytetarëve sepse përndryshe pastaj kemi problem në realizimin e këtyre subvencioneve në fushën e bujqësisë.

z.Naim Çunaku, theksoi, propozimet e këtyre tri vendimeve për shtim të buxhetit me kod të ri buxhetor si praktikë e re e ndërhyrjes në buxhetin e Komunës dhe baza ligjore në të cilën janë thirr këto propozim vendime më jep mendimin tim dhe Grupit të anëtarëve të LDK-së si dhe pas konsultimeve që kemi pasë edhe me njerëzit e lëmisë përkatëse në Grupin tonë, bazën ligjore nuk e shohim që e mundëson një aktivitet të tillë çfarë po kërkohet, aktivitet i cili bënë ndërhyrje gjegjësisht rritë buxhetin e Komunës e që po t’i grumbullosh këto tri propozim vendime reflekton mbi 132,965.00€.

po mundohem që shkurtimisht të lexoj atë në çfarë është bazuar, me qëllim që ndokush të thotë se diskutimi im ishte krejt përmendësh, dhe atë, Drejtoria e Buxhetit dhe Financave në bazë të nenit 13 pika 1.1 e Rregullores së MAPL-së për hartimin dhe publikimin e akteve të komunës, tani kjo Rregullore faktikisht nuk ka të bëjë me buxhetin asgjë sepse është ligji përkatës për buxhetin dhe për menaxhimin e bushtit qoftë të nivelit lokal qoftë të atij qendrorë, dhe të marrësh për bazë një Rregullore të MAPL-ës për ta proceduar një vendim të tillë dhe të bazohesh në nenin 13 pika 1.1, për mua dhe për mendimin tim e Grupit të LDK-së është jo në rregull.

Po ashtu po e citoj një nen tjetër të rregullores së cekur për të treguar se si bëhet një akt i Komunës, përkatësisht nenin 14 i asaj Rregulloreje sepse natyra e kësaj është nxjerrja e akteve të komunës dhe procedurat e dërgimit deri në fund, ndërsa ne kemi propozim vendime që kanë refleksion buxhetor, pra neni 14 i Rregullores së cekur e thotë dhe cakton, proceset e hartimit të akteve komunale, hartimi i projektit fillestar, për të qenë në rregull një akt komunal duhet t’i kaloj edhe këto procedura, e që

caktohen proceset e hartimit të akteve komunale hartimin e projektit fillestar, konsultimin e brendshëm të autoriteteve lokale, vlerësimin e ndikimit financiar të aktit të propozuar, vlerësimin e projektit pas konsultimeve, pastaj konsultimi publik parasheh forma shtesë të konsultimeve me shkrim dhe elektronik në intervista, panele dhe forma tjera siç janë publikimi i projekt aktit në tabelën e shpalljeve, ueb faqen e komunës, gazetë, takim me grupe të interesit dhe takim me qytetar, mandej finalizimi i projekt aktit pas marrjes së komenteve nga konsultimi publik, miratimi në Kuvend. Do të thotë pasi t'i kalon këto faza duhet të sjellët në Kuvend, a kemi ne këtë jo, a po thirrëmi në këtë po, prandaj nuk e di se si mund të thirrëmi në një diçka që thotë diçka tjetër.

Po vazhdoj tutje sepse propozimet në fjalë thirren edhe në Ligjin për vetëqeverisje lokale, dhe tani çka përcakton ky ligj dhe në këto nene që janë bazuar këto propozim vendime, neni 11 aktet komunale, Kryetari i Komunës ka të drejtë të miratimit të akteve dhe të ndërmarr masa për zbatimin e tyre brenda fushës dhe kompetencës, a e kemi këtë propozim prej Kryetarit të Komunës, jo, dhe nuk po dëshiroj t'ju lodhi më shumë, mandej është neni 12.2 ku thuhet çdo akt tjetër i nevojshëm apo i duhur për funksionimin efikas të komunave, pastaj kemi nenin 40 funksionimi i Kuvendit të Komunës, do të thotë ka të bëjë me funksionalitetin e Komunës e jo me ligj mbi menaxhimin.

Tani po referohem bazë ligjore që thirren këto propozim vendime e që është ligji për menaxhimin e financave publike, neni 64.4 dhe neni 17 i cili parasheh shpenzimin e parave publike, fundja a janë këto para publike përderisa kemi kërkuar si donacion, mandej neni 38 i cili rregullon pagimin e prioritetëve dhe kërkesave për ndarje buxhetore, prejardhja dhe rishqyrtimi, e që do të thotë se krejt bëhet fjalë për hartimin e buxhetit.

Për e përmbylli me këtë se duke pasë për bazë këto që i ceka, nenin 2 të propozim vendimeve, ku takstativisht thuhet, *projekti mund të krijohet nga mjetet e participimit të qytetarëve bazuar në Marrëveshjet e Mirëkuptimit mes Komunës dhe përfituesit të subvencionit*, shtrohet pyetja, a kemi ne të bashkëngjitur një Memorandum të tillë që ka ndodh.

Pa dashur të dal në anën politike, kjo për mua dhe për mendimin e njerëzve tanë të fushës lë shumë dyshime që jemi duke bërë një diçka, gjegjësisht që jemi duke marrë një vendim që është kompatibil me ligjet në fuqi, madje në një formë unë e kam lexuar se kjo çështje është në kompetencë të Kryetarit të Komunës, dhe në nenin përkatës të Rregullores së cekur që jeni thirr, është vërtetë që Kryetari i përcakton Drejtoritë, mirëpo për akte tjera i përcakton ashtu siç përcaktohet në nenin përkatës që e lexova më parë, andaj krejt kjo na bënë, jo me qëllim të pengimit dhe madje ndoshta më lehtë do ta përkrahim që participimi i qytetarëve në subvencione të mos ndodhte fare por të realizohen projektet, se sa të hymë në këtë formë të realizimit të projekteve me bashkëfinancim.

Grupi i anëtarëve të LDK-së, me qëllim që të mos jetë kundër, abstenon për këto propozim vendime dhe atë duke u bazuar në parimin 1 duke konsideruar se nuk kanë mbështetje të mirëfilltë ligjore.

z.Gazmend Islami, theksoi, dua ta pyes drejtorin e Drejtorisë së Buxhetit dhe Financave, rreth çështjes së participimit, shembull tek rastet kur përfituesit janë në skemën sociale dhe janë njerëz që mund të mos kenë asnjë të ardhur e që shembull tek projekti për Mëshqerra është dashtë t'i japin ata 500 - 600€ nëse nuk gaboj si participim, ku t'i marrin ata persona ato shuma të mjeteve, prandaj pyes se a lejohet me ligj që këto raste që vërtetë janë të rënda dhe që nuk kanë asnjë të punësuar dhe që nuk kanë mundësi të participojnë, a ekziston mundësia e lirit të kësaj kategoria nga participimi. E them këtë sepse nuk mund të jetë njëjtë një fermer i cili shembull mund t'i ketë 15 lop e që edhe një e merr subvencion dhe i bënë 16, sikurse një person i cili është në gjendje jo të mirë financiare e që ndoshta i ka bërë me mund 2-3 lop , dhe tani njëjtë të participojnë me 500 – 600 €.

Nuk jemi kundër kësaj dhe çdo gjë që është në të mirën e qytetarëve duhet të përkrahet, mirëpo çdo herë duke marrë parasysh personat që janë me gjendje të rëndës ekonomike dhe sociale ngase 30% e shumës për një Mëshqerrë e cila kushton rreth 2000€ është goxha shumë e madhe, sikurse që kemi

rastin edhe tek Serrat e që sa jam në dijeni unë është dashtë të shtyhet afati i aplikimit sepse nuk ka pasë kërkesa të qytetarëve për serra e që në pamje të parë duket si projekt i dështuar, dhe që mendoj se Drejtoritë përkatëse duhet të fillojnë të mendojnë për projekte tjera sepse siç po shihet shembull tek projekti i serrave nuk ka interesim, nuk janë profitabile dhe normal pastaj peronat po ikin nga këto. E them këtë edhe përkundër punës së mirë të drejtorisë së Bujqësisë Pylltarisë dhe Zhvillimit Rural e që çdo herë e potencoj se këtë Drejtori e vlerësoj me notën 10.

z.Bahri Blakçori, theksoi, besoj se drejtori i Drejtorisë së Buxhetit dhe Financave e arsyetoj jashtëzakonisht shumë mirë këtë, prandaj në emër të Grupit të LVV-së përkrahim këto propozim vendime për shtim të buxhetit dhe kod të ri për këto tri projekte sipas propozimeve përkatëse.

Kryesuesi i Kuvendit, theksoi, meqë nuk ka të lajmëruar për të marrë fjalën, mund të procedojmë me votim.

z.Gazmend Islami, theksoi, nuk mora përgjigje nga drejtori, dhe kërkoj që para se të hedhet në votim, të më jap përgjigje për pyetjen që e shtrova paraprakisht që ishte për disa persona me gjendje të rëndë ekonomike dhe sociale të mos e bëjnë pagesën e participimit prej 30%.

z.Fatlum Osmani, U.D. drejtor i DBF-së, përgjigje parafolësit, theksoi, në thirrjet publike për këto projekte nuk është paraparë lirimi nga participimi, do të thotë se të gjithë përfituesit e këtyre subvencioneve janë të obliguar të participojnë, prandaj meqë nuk janë paraparë në thirrjet publike tani në këtë fazë që jemi nuk mund të lirojmë askënd nga participimi.

Për vitin e ardhshëm mund të diskutojmë këtë çështje që rastet e caktuara të lirohen, mirëpo ato duhet të parashihen në thirrjet publike, përndryshe do të bëheshin shkelje në hapa.

Kryesuesi i Kuvendit, theksoi, meqë diskutimet përfunduan dhe nuk ka të lajmëruar për të marrë fjalën, i vë në votim një nga një propozim vendimet përkatëse sipas pikave 8, 9 dhe 10 të rendit të ditës.

*Pas votimit, Kryesuesi i Kuvendit konstatoi se nga 20 anëtarë/e të Kuvendit sa ishin prezent aktualisht në sallë, me 11 vota PËR, asnjë votë Kundër dhe 9 vota të PËRMBAJTURA, miratohet **propozim vendimi për shtim të buxhetit dhe kod të ri për projektin “Furnizim dhe montim i serrave”,** sipas materialit përkatës të paraqitur në Komitetin për Politikë dhe Financa dhe dërguar me konstatimet e rekomanduara.*

*Pas votimit, Kryesuesi i Kuvendit konstatoi se nga 21 anëtarë/e të Kuvendit sa ishin prezent aktualisht në sallë, me 13 vota PËR, asnjë votë Kundër dhe 8 vota të PËRMBAJTURA, miratohet **propozim vendimi për shtim të buxhetit dhe kod të ri për projektin “Furnizim me mekanizëm bujqësorë”,** sipas materialit përkatës të paraqitur në Komitetin për Politikë dhe Financa dhe dërguar me konstatimet e rekomanduara.*

*Pas votimit, Kryesuesi i Kuvendit konstatoi se nga 21 anëtarë/e të Kuvendit sa ishin prezent aktualisht në sallë, me 12 vota PËR, asnjë votë Kundër dhe 9 vota të PËRMBAJTURA, miratohet **propozim vendimi për shtim të buxhetit dhe kod të ri për projektin “Furnizim me mëshqerra”,** sipas materialit përkatës të paraqitur në Komitetin për Politikë dhe Financa dhe dërguar me konstatimet e rekomanduara.*

11. Diskutim lidhur me furnizimin me ujë të pijes

znj.Mrika Thaçi, në cilësinë e propozueses së kësaj pike të rendit të ditës, e paraqiti fjalën hyrëse. Ndër të tjera theksoi, unë po nisem nga thënia, uji është jetë dhe nisur nga kjo thënie nuk do të thotë se i ke thënë të gjitha. Sot po flasim për furnizimin me ujë, respektivisht për mungesën e furnizimit me ujë të pijes. Në këtë kohë të recesioneve të shumta të krijuara nga situatat t'i quaja globale si pandemia Covid-19, lufta në Ukrainë si më të theksuarat, reflektuan në ngritjen e çmimeve të produkteve bazë si të energjisë, naftës, miellit, vajit, produkteve higjienike si gjenerator të ngritjeve zinxhirore të çmimeve të shportës së domosdoshme për jetë, tani shto kësaj edhe mungesën e ujit në temperatura të larta të stinës së verës, në kohën e ardhjes së bashkatdhetarëve në vendlindje, mungesa e ujit e ka rënduar së tepërmi jetën dhe mirëqenien e qytetarëve në Komunën tonë. Vështirësitë në furnizim me ujë, reduktimet pa kriter, pa kurrfarë konsultimi me qytetarë, thënia uji është jetë na shpie në konkluzion se vërtetë na është krijuar një jetë aspak e mirë për jetë të dinjitetshme, vërtetë gjendje e rënduar. Dje në mbledhjen e KPF-së propozova që në këtë seancë të Kuvendit ta trajtojmë mungesën e furnizimit me ujë të pijes në Komunën tonë si pikë të veçantë të rendit të ditës. besoj se duhet trajtuar me urgjencë dhe konform nevojave dhe kërkesave të qytetarëve. Andaj të nderuar kolegë bashkërisht të shohim mundësitë për të bërë sa do pak në kuadër të kompetencave dhe mundësive tona. Fundja ne jemi të thirrur dhe kompetentë për adresimin e nevojave dhe shqetësimit e tyre. Na obligon besimi i marrë dhe zotimi ynë në përfaqësim, të adresojmë çështje dhe të kërkojmë zgjidhje. Unë besoj shumë dhe pres përkrahjen e të gjithë anëtarëve të Kuvendit që ta trajtojnë problemin e furnizimit me ujë të pijes në Komunën tonë.

znj.Arjeta Abazi, theksoi, desha të ndërlihem me pikën e rendit të ditës të cilën e ka propozuar dje në mbledhjen e KPF-së znj.Mrika Thaçi. Vërtetë është shqetësuese dhe është e papranueshme që çështjet elementare si puna e furnizimit me ujë të pijes të futet në rend të ditës pas kohës. Kjo tregon për seriozitetin me të cilën e trajton qeverisja lokale një temë e cila është vitale për qytetarin. Paramendo sot qytetarët e Komunës së Podujevës, veçmas ata që jetojnë në qytet por edhe në fshatrat përreth në gjithë këtë vapë përballen çdo ditë me reduktime të mëdha të ujit. Kjo bëhet akoma më shqetësuese kur i shtojmë faktin që ka familje, sidomos ato që jetojnë në ndërtesa kolektive që të vetmin burim e kanë ujësjellësin. Megjithatë në këta muaj të verës kur rriten nevojat dhe konsumi mund të arsyetohet ndonjë reduktim eventual, por i pa pranueshëm është fakti që në shumë pjesë të qytetit reduktime ka pas edhe gjatë muajve të kaluar, do të thotë edhe gjatë muajve maj dhe qershor. Kjo është papërgjegjësi e Kompanisë së Ujësjellësit në rend të parë por edhe e Komunës që nuk i ka koordinuar angazhimet e përbashkëta për të siguruar furnizim të rregullt, sidomos në sezonin e verës kur edhe mërgata jonë gjendet në vendlindje. E di se do të thoni se investimet në shtrirjen e rrjetit të ujësjellësit nuk janë kompetencë e jona por e Kompanisë por e di se kështu ka qenë edhe më parë, kur në debatet publike dhe takimet me qytetarë premtoni zgjidhje të problemit të furnizimit me ujë, madje brenda një viti të mandatit që shkoj. Duke mos dashur që ti jap kahje politike çështjes jetike siç është uji, dua të shfrytëzoj rastin dhe të ju ftoj për rritje të koordinimit dhe të angazhimeve të përbashkëta, në mënyrë që sa më shpejtë të sigurohet furnizimi i rregullt me ujë për qytetarët e Podujevës. Ne si Grup i LDK-së do të jemi në mbështetje të secilës iniciativë në këtë drejtim.

z.Bahri Selimi, U.D. drejtor i Drejtorisë së Shërbimeve Publike Mbrojtjes dhe Shpëtimit-DSHPMSH, theksoi, edhe ne ndajmë së bashku këtë shqetësim, mungesën e ujit të pijshëm. Vërtetë është temë e ndjeshme dhe duhet diskutuar, por se sa ky diskutim do të ketë peshë dhe rëndësi besoj se gjithsecili nga ju jeni në dijeni, por edhe nëse nuk keni njohuri të mjaftueshme besoj se do ta kuptoni se ujësjellësi është në kompetencë të KRU “Prishtina”. Kur e theksoj si kompetencë, nuk

nënkupton se duhet ta heqim përgjegjësinë tonë. Unë do ju informoj për hapat që ka ndërmarrë Komuna në vazhdimësi në funksion të sigurimit të ujit të pijshëm. Në periudhën e fundit gjashtë mujore kemi mbajtur gjashtë takime me zyrtarë të KRU "Prishtina", dhe nga ato takime pesë janë zhvilluar direkt me Kryeshefin Ekzekutiv të Kompanisë së cekur. Këto takime kanë pas për qëllim që të bëhet një koordinim më i mirë në mes KRU "Prishtina" dhe Komunës dhe në të vërtetë ka pas koordinim dhe vullneti që të bëhet furnizimi me ujë ka qenë i dyanshëm, por problemet nuk vijnë si rezultat i punës së Kompanisë. Në bazë të statistikave që ne i kemi marrë në këto takime kemi ardhur në përfundim se rrjeti që shtrihet nga Ujësjellësi në fshatin Shajkoc të ujit deri te rezervarët e ujit te parku ka humbje të mëdha, madje është konstatuar se janë mbi 70% e humbjes së ujit.

Kjo nënkupton sasi e madhe e ujit që humbet si rezultat i kyçjeve ilegale dhe rrjedhave të pakontrolluara dhe të paidentifikuara të ujit dhe këtë e kemi vërtetuar. Ne kemi bërë një inspektim të përbashkët me Kompaninë e ujësjellësit për të bërë identifikimin e këtyre, megjithatë Kompania ka mungesë të pajisjes/aparatit për identifikimin e ujit. Shprehjen keqpërdorim e ujit e them me keqardhje sepse nuk do të doja ta përmendja, mirëpo të gjithë jemi të vetëdijshëm se sa i rëndësishëm është uji, sepse të gjithë jemi banorë të këtij vendi dhe konsumues të këtij burimi të ujit. Ju mund ta vëreni se kur ka reshje shiu të mjaftueshme dhe kur nuk kemi nevojë për ujitje nuk ka reduktime të ujit. Kjo nënkupton që uji nga rrjeti i ujësjellësit keqpërdoret për ujitje, dhe ky konstatim është më se i saktë. Gjatë takimeve të mbajtura me Kompaninë e ujësjellësit, Kompania në fjalë e ka autorizuar një inxhinier të KRU-së që të merret vetëm me Podujevën, sa i përket kësaj çështjeje. Pra fjala është të bëhet identifikimi i kyçjeve ilegale dhe të krijohet një mundësi për furnizim më të mirë të ujit. Ne si autoritet komunal në bashkëpunim dhe koordinim me zyrtarin e cekur i kemi ndjekë të gjithë hapat që mund të vie deri te ulja e reduktimeve, sa që kemi vizituar edhe Ujësjellësin dhe nga aty u konstatua se rrjedhin 80m^3 ujë për sekondë gjë që është e mjaftueshme për furnizim të qytetit, por në rezervuarët e ujit të qytetit shihet se ata janë nën minimumin e sasisë së ujit dhe në këtë rast gypi i cili bënë furnizimin me ujë i qytetit, ai është i mbushur me vetëm 30% të sasisë së ujit me të cilin furnizohet qyteti. Dhe si përfundim, si rezultat i këtyre gjashtë muaj angazhimesh për rregullimin e kësaj çështjeje na është thënë se është një projekt ka një kohë dhe i cili është ndërprerë për arsye të ndryshme që një operator ekonomik i ka pas për furnizim të gypit dhe fatmirësisht edhe pas presionit që i ka bërë KRU-ja, dhe presionit nga ana e Komunës, e që Kryetari në këtë çështje ka qenë shumë i përkushtuar për të bërë zgjidhje, tashmë veç se e keni parë se ditën e djeshme kanë filluar punimet për vendosjen e gypit të ri në gjatësi prej 2 km, i cili do ta ketë kyçjen te "Lagja e Dëshmorëve" për furnizimin e rezervuarit të qytetit, rezervuar i cili ka kapacitet për 3000m^3 ujë e që i ka edhe dy rezervuar ndihmës me kapacitet me nga 1500m^3 ujë. Gypin e ri kemi filluar ta vendosim që dje bashkë me KRU-në, e që është financim nga CDI apo Zyra Zvicerane. Edhe këtë verë mendoj se do ta kemi gjendjen e njëjtë sepse mundësi të tjera nuk ka. Sa i përket shtrirjes së gypit falë bashkëpunimit të mirë të qytetarëve kemi arritur të dakordohemi të mos kemi asnjë problem gjatë procesit të vendosjes së gypit dhe shpresojmë që në afatin sa më të shkurtër kohor do të vendoset gypi dhe furnizimi me ujë do të jetë i mjaftueshëm. Në koordinim me KUR kemi ardhur në përfundim pjesa ku edhe kanë filluar punimet për vendosjen e gypit të ri është pjesa e cila ka shkaktuar humbjen më të madhe të ujit. Unë ju falënderoj që ngritët këtë temë, sepse sikurse theksova në fillim ky ka qenë edhe shqetësim i ynë sepse bashkë ndjejmë dhe të gjithë bashkë këtu po jetojmë, pra edhe për ne po ka reduktime, e jo vetëm për ata qytetarë që janë duke na dëgjuar. Me shpresën që së shpejti do të bëhet një zgjidhje dhe nuk do të ketë më reduktime, ju bëjmë thirrje për mos keqpërdorimin e ujit të pijes, t'i ndalim këto keqpërdorime dhe të zbusim të paktën 70% të keqpërdorimit të ujit.

z.Naim Çunaku, theksoi, furnizimi i qytetit të Podujevës me ujë është një problematikë e gjatë kohore, në vazhdimësi është folur shumë se do të bëhet zgjidhje, do të mundohen për zbutjen e problemit të furnizimit me ujë. Nuk kisha dashur të keqkuptohem nga Drejtori i DSHPMSh por ne nuk jemi këtu për të konstatuar situata se çfarë është gjendja. Konstatimin e situatave e bëjnë më së miri vet qytetarët të cilët ballafaqohen me problemin e ujit. Këtu deri sa të trajtohet si temë dhe si pikë e veçantë, në këtë rast në Kuvendin e Komunës, ne do të jemi ata që duhet t'i japim zgjidhje, e jo të konstatojmë situatë. Një pjesë e mirë e juaja e dini që kjo problematikë përmendet më së shumti në kohën e fushatave, sepse e dinë që është një problem dhe dukuri që më së shumti e mundon qytetarin. Pa qëllim për të bërë fajtor kryesor Komunën në këtë rast, mirëpo Ligji për Vetëqeverisjen Lokale si adresë e parasheh Komunën dhe thënia që nuk është kompetencë e Komunës nuk qëndron sepse Ligji në fjalë këtë e parasheh si kompetencë të Komunës, citoj: “Neni 17 pika f) ofrimin dhe mirëmbajtjen e shërbimeve publike dhe shërbimeve komunale, përfshirë furnizimin me ujë, kanalizimin dhe drenazhin...”.

Në fazën e fillimit të funksionimit si shtet kur kemi pas menaxhimit nga OKB, gjegjësisht shtylla IV e UNMIK-ut që atëherë ndoshta me qëllimin janë krijuar këto kompanitë regjionale, por kompania regjionale është edhe kompani e jona, sepse ne kemi në ato kompani asete dhe anëtarë të komisioneve. Në fund të fundit duhet ti dalim zot vetes sepse komplet ai furnizim bëhet përmes Komunës tonë ndërsa jemi një prej komunave që kemi furnizimin më të rëndë me ujë, dhe në anën tjetër t'i furnizojmë pesë komuna, çështja është se problemin duhet zgjedhur tani autoritetet tona, dhe ky nuk është problem i tanishëm. Në projekt buxhetet tona çdo vit kemi pothuajse shifra të larta të investuara në furnizimeve me ujë për qytetarë, dhe çfarë ndodhë, ato asete kalojnë drejtpërsëdrejti në menaxhim të KUR "Prishtina". Në një formë kisha dashur të bëhen përpjekje dhe të ngritet zëri konform hises që e kemi në kompaninë e furnizimit me ujë dhe Komuna e Podujevës duhet të trajtohet me prioritet në këtë. Ndërtimi i ujësjellësit në fshatin Shajkoc, qysh atëherë është paraparë një gyp jo i mjaftueshëm për furnizimin me ujë për komunën dhe ka pas si alternativë pusët në fshatin Peran, këtë kështu e kam lexuar. Nëse në atë kohë janë lypë alternativa dhe nëse ne një farë forme jemi të pamundësuar për ndikim në KUR, që dua të them se duhet të shtojmë përpjekjet me qëllim që të marrim vendin merituar atëherë nuk guxojmë të mjaftohemi me atë që është kompani regjionale dhe kështu trajtohem. Fundja ligji na obligon që ne të bëjmë përpjekje për furnizimin e qytetarëve me ujë të pijshëm dhe në një të ardhme të afërt, e pse jo edhe prej tani që u ngrit ky shqetësim mundohemi ti shohim alternativat e mundshme për furnizimin e qytetarëve me ujë. Ne gjithherë kemi pas në programet e tona alternativa, duke e ditur gjendjen dhe këto alternativa gjegjësisht këto premtime që i kemi dhënë për furnizim me ujë për qytetarin e Komunës së Podujevës, kështu që po të ishin angazhuar alternativat kishte për të qenë një tjetër gjendje. Ne kemi një burim të ujit që vjen nga fshati i propozuesit, ku janë mbledhur edhe mjete dhe që nga ajo ditë janë në buxhetin e Komunës, dhe e tëra kjo duke neglizhuar. Është koha e fundit dhe po apelojmë të mundohemi të bëjmë atë që është në kompetencën tonë, fundja t'i reduktojmë investimet kudo qofshin dhe të investojmë aty ku është më e rëndësishme, në këtë rast për ujë të pijes.

znj.Marigona Lahu, Nënkryetare e Komunës, theksoi, çështja e ujit të pijshëm është shqetësuese edhe për mua, sepse si banorë e qytetit nuk mbaj mend verës kur kemi pas ujë pa reduktime. Jam tridhjetë e një vjeçare dhe tërë këto vite gjithherë verës kemi pasur reduktime të ujit. Sa i përket aspekteve teknike veçse e sqaroi Drejtori i DSHPMSh z.Bahri Selimi, por çka më bëri të dal dhe të reagoj është diskutimi i zotëri Çunakut. Sikurse jeni në dijeni, tash KRU "Prishtina" ka një bord të ri i cila nuk ka më shumë se një muaj që është zgjedhur dhe nuk e di sa keni qenë në dijeni se Komuna e Podujevës ka pas një përfaqësues në Bordin e KRU-së dhe sa ka qenë përfaqësuesi i Komunës i angazhuar nuk jam në dijeni. Po besoj se Bordi i ri do të ketë fokusin te çështja e ujit të pijshëm.

Gjithashtu fokus te çështja e ujit ka edhe Qeveria e Republikës së Kosovës. Fatkeqësisht Kosova është një vend i cili nuk ka burime të mjaftueshme ujore dhe për këtë arsye jo vetëm Komuna e Podujevës por të gjitha komunat kanë probleme me ujin e pijes. Nga ajo që kam dëgjuar, Qeveria është në negociata me Bankën Botërore për financimin e një sistemi të ujitjes i cili besoj se do të ndikojë në parandalimin e këtyre keqpërdorimeve që bëhen nga ana e qytetarëve tanë.

z.Naim Çunaku, theksoi, kur thuhet 70 % uji humbë është me të vërtetë shqetësuese, por a duhet të ndalemi dhe të shikojmë kah humb uji, a duhet të ndërtohen kapacitete dhe autoritete për luftimin e atyre dukurive, apo të mbetet në ndërgjegje të çdo kujt. E di se nuk është lehtë për ta bërë, sepse natyra e ujit dhe tubacioneve që kalojnë është e tillë, mirëpo ne duhet të shtojmë përpjekjet tona. Atë që dëgjova prej Nënkryetares veç se e theksova në fillim, se ne e kemi hisen në KRU dhe çfarë bëjnë personat e caktuara për të mbrojtur interesat. E kemi rastin e Prishtinës, ndërtuan ujësjellës të ri prej furnizimit të sistemit Ibër Lepenc, shtrihet pyetja a ka ndryshuar diçka për Komunën tonë. Po të kishim një angazhim ndryshe besoj që edhe me krijimin e alternativave, në veçanti duke luftuar dukuritë negative të keqpërdorimeve të ujit të pijes. U fol për inspeksionin e Kompanisë, por ne kemi edhe inspeksionin komunal dhe kemi rregulloren për ndëshkimin e keqpërdorimeve të ujit dhe duhet ti vejmë në funksion të gjitha këto për një furnizim më të mirë me ujë. Duhet të veprohet.

z.Hilmi Hoxha, Kryesues i Kuvendit, theksoi, pajtoj me konstatimet për gjendjen e rëndë të furnizimit me ujë të pijes. Kjo gjendje nuk është krijuar sot por ka njëzet vite. Ne e dimë që kemi probleme me ujë të pijshëm. Unë vij prej një fshati që kemi ujësjellësin ka pesëmbëdhjetë vite të cilin e ka ndërtuar pas lufte organizata CDF, por fare s'kemi pas ujë. Po ashtu kemi pusët e që janë në fshatin Obrançe e jo në fshatin Peran siç u theksua, megjithatë prapë nuk kemi ujë, ky është realiteti. Ka qenë një projekt te Vrella e fshatit Revuçë dhe ka dështuar. Projekti për vendosjen e gypit të ri sikurse e përmendi Drejtori i DSHPMSh, mendoj se plani dinamik prej 240 ditë që të realizohet projekti është një periudhë e gjatë kohore, është dashur një kohë më e shkurtër, ky proces duhet përshpejtuar. Humbja e ujit, përkatësisht keqpërdorimi prej 70% kjo çështje duhet zgjidhur dhe ka mundësi të zgjidhet. Mund të sigurohet/blihet pajisja/aparati për gjetjen e ujërave rrjedhëse. Kështu që nëse zgjedhim problemin e 70% të humbjes së ujit, atëherë do të bëhet zgjidhja e problemit të ujit dhe nuk do të kishim nevojë për investime tjera. Pra dua të theksoj se nuk jemi vetëm për të konstatuar por për të vepruar. Kërkesa është që Drejtoria përkatëse të merr veprimet që i takojnë, ose të sigurojë/blej një aparat dhe të angazhojë personelin në terren të konstatojnë dhe të evidentojnë keqpërdorimet e ujit.

z.Bahri Selimi, U.D. drejtor i DSHPMSh, theksoi, për të mos e zgjatur, ndoshta nuk u kuptuam si duhet kur ishte fjala te çështja e kompetencave. Nuk theksova se ne nuk e kemi kompetencë, por potencova që çështja e furnizimit me ujë është kompetencë e drejtpërdrejtë e KRU "Prishtina", po ashtu i prezantova të gjitha bashkëpunimet dhe koordinimet që ne si autoritet komunal i kemi zhvilluar me Kompaninë. Kjo nënkupton që ne kemi përdorë të gjitha kapacitetet tona për të ardhur deri te zgjidhja e këtij problemi. Sa i përket kompetencës, KRU ka kompetencën kryesore në këtë çështje, megjithatë ne investojmë në zgjerim të rrjetit me mjete që ndahen nga Komuna dhe që aprovohen nga ana e juaj. Pra ne investojmë në zgjerimin e rrjetit por asnjëherë këtë nuk kemi të drejtë ta bëjmë një gjë të tillë pa koordinim me KRU-në. Fjala vjen në fazën e punimeve është zgjerimi i rrjetit në rrugën "Ibrahim Demolli", aneks i rrugës "Skënderbeu" dhe projekti prej fshatit Shajkoc që vazhdon deri në rrugën tej shkolle. Pra këto janë projekte aktuale që janë në proces të punimeve. Sa i përket veprimit, unë veç se ju njoftova se kemi filluar me veprime. Që ditën e djeshme kur kemi filluar me ndërrua gypin, ky është veprimi, nuk ka pas veprim tjetër. Për sanimin e këtyre humbjeve duhet ndërruar gypin i cili përveç kyçjeve ilegale ka edhe rrjedha të shumta. Është një gyp i vjetër prej asbesti i cili u vendos në kohën e sistemit komunist dhe ai po ndërrohet

dhe po vendoset një gyp që është shumë më i mirë edhe në aspektin shëndetësor dhe po eliminohen komplet rrjedhat dhe kyçjet ilegale. E potencova se është filluar me këtë pjesën në gjatësi prej dy km dhe projekti do të vazhdoj sipas bisedimeve që kemi me KRU-në deri në Ujësjellës. Neve na mbetet që të jemi të kujdesshëm sepse në po të njëjtin gyp që po e ndërrojmë prapë mund të ketë kyçje ilegale. Inspeksioni i Komunës dhe inspeksioni i KRU së bashku kanë dalë në terren, por është problem identifikimi i kyçjeve ilegale sepse ato mund të bëhen edhe gjatë natës, sepse gypi kalon nëpër prona private dhe publike. Unë vetëm desha të ju informoj se veprimet kanë filluar dhe së shpejti qytetarët e komunës së Podujevës nuk do ta kenë më problemin e furnizimit me ujë. Megjithatë sikurse e potencoi edhe Nënkryetarja, Kosova ka mungesë të burimeve të ujit. Në këtë aspekt është duke u iniciuar edhe një projekt, sigurisht keni dëgjuar, fjala është për projektin e digës në fshatin Pollatë i cili edhe pse është shumë i kushtueshëm, niveli qeveritar veç se kanë filluar bisedimet. Ne kemi pas një takim me zyrtarë të ministrisë, kemi biseduar për këtë çështje, por kur do të fillojë është çështje që do të vendoset nga ministria përkatëse. Ky projekt konsiderohet shumë i kushtueshëm që nuk mund ta përballojë as vet Ministria, dhe intenca është që të shkohet përmes një kredie. Projekti ka për qëllim jo vetëm furnizimin me ujë për Komunën e Podujevës por edhe për shumë qytete tjera, sikurse aktualisht është duke e bërë furnizimin KUR.

z.Ekrem Rrahmani, theksoi, afati apo plani dinamik prej 250 ditësh për shtrirjen e gypit të ri, konsideroj se është i gjatë, pyetja është pse koha e punimeve duhet të jetë aq e gjatë.

z.Bahri Selimi, U.D. drejtor i DSHPMSh, theksoi, gypi i ri i cili do të vendoset është i profilit 650, ndërsa plani dinamik është paraparë në bazë të projektit të CDI-së dhe këtu nuk ka çasje Komuna. Në kuadër të këtij projekti është duke u bërë shtrirja e rrjetit të ujësjellësit edhe për fshatin Orllan dhe po ashtu janë edhe disa fshatra tjera të Komunës siç janë Dumnica, Llausha pjesa e epërme, pra ky është projekt i vjetër dhe është në vazhdimësi nga CDI.

z.Naim Çunaku, theksoi, duhet të jemi të bindur se me shqiptimin e tiketave me gjoba ndaj keqpërdoruesve të ujit besoj se në afatin një mujor nuk do të ketë 70% humbje të ujit por do të kthehen sigurisht në 30%. Mendoj se Komuna e Hanit të Elezit ka blerë ato pajisje/ aparatura që saktë detektojnë kyçjet ilegale. Në pjesën ku unë banoj nga gypi i ujësjellësit derdhet uji nëpër ara dhe nuk intervenon askush për ta sanuar. Pra ka ara ku vazhdimisht rrjedh uji i pijes që nuk e keqpërdorë askush por ka shpërthye gypi dhe nuk merret askush me të dhe këto në një masë të madhe janë duke ndikuar në këtë gjendje

z.Hilmi Hoxha, Kryesues i Kuvendit, theksoi, besoj se kjo temë u diskutua mjaftë dhe nuk po besoj se këtu mund ta zgjedhim këtë problem. Drejtori i Drejtorisë përkatëse theksoi se kanë ndërmarrë hapat, andaj na mbetet të shohim rezultatet. Gjithashtu propozoj që nëse shihet e nevojshme të bëhet edhe blerja e një aparati për identifikimin e kyçjeve ilegale në rrjetin e ujësjellësit.

Prandaj meqë nuk ta lajmëruar tjerë për ë marrë fjalën e konsideroj të përfunduar edhe këtë pikë të rendit të ditës.

(Nga Kryesuesi i Kuvendit, konstatohet i përfunduar diskutimi rreth kësaj pike të rendit të ditës, dhe njëkohësisht e përfunduar si pikë e rendit të ditës)

12. Të ndryshme

znj.Arjeta Abazi, theksoi, në bazë të disa ankesave të qytetarëve mora fjalën rreth shtegut të biçiklistëve i cili ende nuk ka përfunduar me ngjyrosje, edhe pse sa po shoh unë nuk janë prezent në sallë personat/zyrtarët kompetentë, pra përse nuk ka përfunduar ngjyrosje e atij shtegu, si dhe përse po lejohet që ajo pjesë të shfrytëzohet për parkingje, do të thotë në atë shteg po parkohen veturat ose po anashkalohen. Çështje tjetër është se në atë rrugë ku gjendet shtegu i biçiklistëve, përkatësisht nga kafe bar ‘Pranvera 99’ deri tek rrethi te “Shqiponja” ku lidhet me magjistralen Podujevë-Prishtinë, brenda një periudhe shumë të shkurtër kohore kanë ndodh disa incidente ku janë goditur disa fëmijë në rrugë. Prandaj këto janë ankesa të qytetarëve të cilët më kanë kërkuar ta ngris si çështje në Kuvend. Si çështje tjetër është edhe në Sheshin e qytetit ku po ka skuter, dhe pse janë caktuar rregulla nga ana e Komunës, mirëpo po zbatohen dhe po ndodh të ketë incidente të vogla e që po shkaktojnë pasiguri të madhe për fëmijët që gjinden në shesh.

Pra për këto tri kërkesa apo si çështje që i ngrita, do të doja përgjigje.

z.Arjant Topanica, theksoi, kemi parë se ka më shumë se një vit që semaforët në rrugën “Zahir Pajaziti” nuk janë funksional dhe tani meqë rruga “Skënderbeu” është në punime atëherë po ka shumë ngarkesë në rrugën nga kafe bar ‘Pranvera 99’ deri tek rrethi te “Shqiponja” ku lidhet me magjistralen Podujevë-Prishtinë, madje mu tek semaforët tek rruga lidhëse po ka probleme shumë të mëdha madje edhe aksidente e që ka shumë ankesa prej qytetarëve që asaj pjese t’i bëhet një zgjidhje, ose të aktivizohen semaforët ose ashtu siç e shohin të arsyeshme ekspertët e fushës së komunikacionit në këtë rast.

z.Artrit Mulliqi, theksoi, zakonisht nuk bëjë lëvdata mirëpo tani dëshiroj të bëjë një lëvdatë për z.Bahri Selimin drejtor i Drejtorisë së Shërbimeve Publike Mbrojtjes dhe Shpëtimit sepse kjo drejtori është me një gamë bukur të gjerë të shërbimeve, kështu që e shohë se është njëri prej drejtorëve më aktivë, dhe pyetja ime në këtë rast është se para rreth 1 muaji kemi qëndruar te Shkolla “Xheladin Rekaliu” ku në të dy anët e asaj rruge mungojnë trotuaret dhe shpeshherë nxënësit rrezikojnë etën duke lëvizur në atë rrugë, prandaj duke qenë në dijeni se më 01 shtator fillon viti shkollor a mund të presim se gjatë këtij muaji dhe muajit gusht të përfundon ndërtimi i atyre trotuareve.

z.Gazmend Islami, theksoi, fillimisht më vie keq që të zgjedhurit ata që i kanë marrë votat po ikin dhe nuk po qëndrojnë deri në fund, pra vetëm po nënshkruhen dhe nuk po qëndrojnë deri në fund në mbledhje si të tillë nuk po bëhen të sinqertë as me qytetarët e as me neve si anëtar të Kuvendit që po qëndrojmë në sallë më gjatë.

Meqë është hera e parë që mund të foli pak më gjatë, kam disa shqetësime për të cilat do të doja të ishte prezent këtu Kryetari i Komunës por që fatkeqësisht nuk është prezent dhe që deri në muajin shtator nuk mund të shihemi me të. Sa herë kam marrë pjesë në mbledhje unë kam ngritur probleme për të cilat unë kam menduar se është e drejtë dhe është për të mirën e qytetarëve, mirëpo në çdo fjalim timin sa herë që unë kam marrë pjesë në diskutim, Kryetari i Komunës i cili e donë shumë mërgatën m ka ofenduar çdoherë duke më etiketuar se unë jetoj jashtë Kosovës dhe vie këtu “sa për sy e faqe”. Pra nëse mendojnë Vetëvendosja dhe Kryetari që mërgata është zemra e Shqiptarëve, çelësi i Shqiptarëve dhe është gjithçka që bëjnë për këtë vend, si është e mundur që një Kryetar i Komunës të më ofendoj e që është edhe raciste, për shkak se unë një pjesë të jetës time e kam kaluar në Gjermani, pra çdo shqetësim që unë e kam ngritur për të mirën e këtij vendi, për çka ekzistojnë të gjitha incizimet, ai më ka ofenduar në frymën më të keqe duke më thënë se ti vie prej mërgatës, por kur po ju duhet mërgata për vota, për mjete financa dhe për të tjera po thoni se në rregull jemi, mërgata më e mira. Për atë po dua të them se ju vet asamblistët e LVV-së që e keni marrë votën e qytetarëve nuk keni nevojë t’i bëheni avokat Kryetarit që nuk është këtu, por ju duhet ta ngritni zërin së pari, shembull, pse, sa herë e kam ndihmuar unë LVV-në e që ti (i drejtohet njërit prej anëtarëve

të Kuvendit nga radhët e LVV-së) ndoshta nuk ke qenë fare në LVV, dhe sa herë e kam ndihmuar me mjete si mërgatë e që sa herë ju ka dashtë i kemi ndihmuar, prandaj është e padrejtë dhe e pamoralshme që një njeri i tillë të më ofendoj mua në këtë formë, për çka më vie shumë keq që nuk është prezent këtu në sallë.

Shqetësimet që jam duke i marrë tek personeli që punojnë në Komunë, ka filluar një fushatë të egër ndaj punonjësve që punojnë në administratë duke i'u bërë ndërrime, duke dërguar atë të shëndetësisë në inspektorat, dhe atë tjetrin aty, pra është një lojë kamikazësh e që nuk ka ndodhur kurrë në Komunën tonë e që besoj se edhe është e kundërligjshme kjo sepse tani nëse një perona i cili ka punuar ndoshta 5 vite apo 10 vite në shëndetësi dhe tani ta dërgosh në prokurim apo anasjelltas është shumë e keqe, dhe këto shqetësime i kam marrë prej punonjësve.

Mendoj që duke filluar prej Nënkryetares së Komunës e cila është një veterane e Vetëvendosjes dhe këta tjerët që i njoh dhe që janë këtu, nuk duhet bash kështu që një perona të jetë “peranador” ngase ne jemi zgjedhë këtu për t'i ndihmuar qytetarët, nuk jemi zgjedh këtu për t'ia bërë “pekej”, ne jemi zgjedh këtu për të mirën e qytetarëve por nuk jemi zgjedh këtu që një njeri të sillet sikur despot e që kjo nuk na bënë nder as neve po as juve. Për çdo gjë çka është e keqe duhet t'i thuhet stop, mjaft më se nuk shkon kështu më tutje. Unë mendoj se Kryetari e ka devijuar dhe mbanë në mend që do të vije dita që kur të pëlçet tek ju do të pëlçet më keq se tek “karriket e LDK-së”. Pse e them këtë, e them sepse njerëzit të cilët e kanë ndërtuar me mund, me gjak, me djers për të ardhur këtu dhe për tu përfaqësuar në këtë Kuvend në vitin 2013 kur kanë vrapuar me çanta për të marrë një votë, ata që ju përfaqësojnë dhe atë që janë ardhur në vitin 2019 ta diskonojnë edhe jetën edhe punën se si duhet të punoj ty që je i zgjedhur në këtë Kuvend, prandaj unë nuk e kom me të keq për askënd, por e kam fjalën që çdo njëri prej nesh duhet ta mbaj peshën për çka është zgjedh këtu, nëse Kryetari bënë gabim ne duhet ti themi se është gabim, ne duhet të jemi të bashkuar. Nuk jam për të prishur punë, por jam për jo diskriminim as punëtorëve ngase kjo është lojë “zik-zake”, ishte z.Ajet Potera drejtor por nuk bëri ai, erdh tjetri z.Bedri Maçastena as ky nuk bëri, çfarë është puna që veç tek Inspektorati nuk po i pëlqen diçka, madje as ky aktualisht nuk është duke i pëlqyer diçka, çfarë është duke u fshehur aty tek Inspektorati pas asaj Drejtorie, asgjë tjetër, por vetëm i ka telashet e mëdha me padronët e politikës dhe mafisë së ndërtimeve në Komunën e Podujevës.

Ne nuk do të heshtim për këto, ju thash edhe më herët, por do të ndjek çdo hap ligjor, do të thërras konferencë për shtyp dhe jam duke mbledhur materiale për ndërtimet pa leje që bëhen nën hije me bekimin e Kryetarit i cili i mbyll dy sytë. Një fukaraje nëse e ndërton një shtëpi tre kate shkojnë dhe ia rrënojnë, kurse ai që ka financa nuk është problem sepse i mbyllem sytë për të, prandaj nuk po e zgjati më shumë meqë Kryetari nuk është prezent këtu sepse po të ishte do të kisha shumë dëshirë por meqë nuk është këtu po më vie shumë keq, por ju bëj thirrje të gjithëve veteranëve të Vetëvendosjes ta prekin kokën pak sepse ata e dinë shumë mirë qysh kanë ardhur deri këtu, me çfarë mundi dhe me çfarë djerse keni ardhur këtu për të qeverisur, por kur të shkon njëherë nuk do të ktheheni më kurrë sepse ai që po i'u prinë juve është ardhur në qershor ose korrik të vitit 2019, është ardhur dhe është bërë prijës i juaj dhe po jua udhëheqë politikën e që e dini se po i udhëheqë, tmerrësisht në kundërshtim me programin dhe statutin e juaj, dhe për ata që jeni thirrë këtu.

Ai të më tregoj mua këtu se vije unë prej mërgate, sa herë e kam pritun unë zotëri Albin Kurti në shtëpinë time, me qindra herë, pastaj zotëri Glauk Konjufcën, zotëri Liburn Aliun, zotëri Xhelal Sveqlën dhe çdo njëri ka qenë në konak timin dhe unë e di se si i kemi ndihmuar, kurse ky të vije në vitin 2019 dhe të më tregoj mua, e që u ardhë dhe u bë “puthadorë” këtu, mirëpo ky nuk është bash askushi fare, mbajeni në mend që do të vije koha që ju që jeni mbrojtësit më të mëdhenj të tij e që ndoshta u e keni mirë e unë jam gabim, por do të vije dita që ju do të pendoheni më shumë se të gjithë ne që e kemi ditë që është i sosit të tillë.

z.Artrit Mulliqi, theksoi, për Ekzekutivin e Komunës nuk po marrë përgjegjësi të flasë sepse ka këtu që janë më kompetentë, mirëpo kjo ngërsyrja për të fol për Lëvizjen Vetëvendosje po e shohë si pozitive, por kam frikë shumë që duke u marrë me Vetëvendosjen shumë, ka rrezik disave t’iu shuhen partitë e tyre, kështu që është mirë të merren pak më shumë me parti të tyre, neve të na lënë t’i kryejmë punët tona, dhe kaq.

z.Gazmend Islami, duke i’u përgjigjur parafolësit, theksoi, shprehja e përdorur ngërsyje, është vetëm kur ngërsyhet qeni dhe askush tjetër, do të thotë kjo është teknologji e dobët dhe kjo tregon se jeni profesor i keq dhe nuk ke logjikë të mirë të ndërtimit të asaj çfarë donë të thuash.

Askush kurrë nuk është duke u marrë me Vetëvendosjen, dhashtë Zoti 11 milion anëtar i bënë dhe 70% të fitoreve i bënë, por unë vetëm të tregova sepse ti je i vonë këtu, shumë i vonë, por ju tregova që e keni një Kryetar për “faqe të zezë”, asgjë tjetër nuk thash, mbajeni mend.

z.Ardi Hasani, theksoi, i nderuar zotëri Gazmend Islami, nuk e di përse të ka rrokë kaq me siklet dhe përse po e trajton sot këtë punën e qasjes së Kryetarit karshi mërgatës ashtu qysh po e thua ti. Unë mendoj se ai (Kryetari i Komunës) nuk e ka pasë në këtë mënyrën çfarë je duke e thënë ti, por ti je ka dëshiron të bësh pak më shumë filma, si dhe zbutë pak sepse përnjëmend nuk po të ka hije, sinqerisht po, sepse rolin e mërgatës por edhe tëndin personal dhe të vëllezërve tuaj nuk mund ta humb askush dhe këtë gjë e dim secili prej nesh por e din edhe ti, prandaj mos e kthe diskutimin në personale si dhe zbuti pak se nuk po të ka hije.

z.Bahri Selimi, U.D. drejtor i DSHPMSh, theksoi, u mundova të mbaj shënime për secilën pyetje dhe çështje të ngritur që bie në fushën e Drejtorisë që unë e udhëheqë andaj edhe po mundohem të jap përgjigje tani mirëpo nëse ka interesim për përgjigje apo sqarime shtesë jam i hapur për secilin që t’i pres në zyrë apo edhe përmes shkëmbimit të e-mail adresave.

Sa i përket pyetjes dhe çështjeve të ngritura nga znj.Arjeta Abazi lidhur me shtegun e biçiklistëve dhe disa aksidenteve të ndodhura në atë rrugë, sa i përket ngjyrosjes së shtegut të në fjalë ju them se aq sa është ngjyrosur aq ka qenë sasia e paraparë në projektin e shenjëzimit horizontal dhe vertikal që lidhet me këtë çështje, pra në specifikacion të projektit janë të ndara ngjyrat se sa do të shpenzohen dhe brenda asaj të mundshmes që ka qenë ngjyra e kuqe ka mbërri deri aty, por shtegu është i papërfunduar për shkak të neglizhencës së Operatorit Ekonomik dhe për këtë ne kemi bërë shumë vërejtje me shkrim dhe kemi shumë e-maile nëpërmes menaxherëve të projektit të cilët kanë shkëmbyer me Operatorin në fjalë i cili është nga Prizreni me të cilin është lidhur Kontratë qysh moti dhe është kontratë 2 ose 3 vjeçare nëse nuk gaboj, prandaj për shkak të neglizhencës dhe papërgjegjësisë së tij ka mbetur ende i papërfunduar ai shteg, mirëpo ju them këtu se edhe ajo pjesë që është përfunduar nuk do t’i pranohet, dhe i është bërë kërkesë që të ri ngjyroset nga fillimi sepse e kemi parë të gjithë dhe askush nuk mund të thotë se ai shteg është i ngjyrosur mirë përderisa e shohim se ka shumë laramani të ngjyrës në atë shteg, andaj e thash se ne bashkërisht me menaxherët e projektit dhe me mbikëqyrësit e menaxherëve e kemi obliguar atë Operator që pjesa e shtegut deri aty ku ka mbërri të ri ngjyroset, kurse pjesa tjetër e shtegut do të ngjyroset me projektin e radhës që ne do ta iniciojmë tani në këtë vit dhe sigurisht që do të lidhet kontrata në fund të këtij vitit ose në fillim të vitit të ardhshëm. Sa i përket aksidenteve kemi informata se fatkeqësisht kanë ndodhë disa aksidente të vogla të disa biçiklistëve gjatë qarkullimit të tyre për çka jemi munduar që gjithherë të jemi në bashkëpunim dhe koordinim me Policinë sepse kjo është kompetente për mbajtjen e rendit sepse inspektorët e Komunës nuk kanë të drejtë të shqiptojnë gjoba të trafikut, dhe fatkeqësisht kjo ndërlihet edhe me pyetjen tjetër rreth parkimit të automjeteve në shtegun e biçiklistëve për çka shumë herë e kemi ngritur këtë shqetësim sepse vërtetë është shumë keq kur shohim veturat e parkuara në shteg e që edhe për këtë çështje disa herë kemi bërë koordinim me Policinë që të ndërmerren masa në mënyrë që shtegu i biçiklistëve të jetë i lirë për qarkullim, mirëpo Policia

arsyetohet kinse nuk kanë staf të mjaftueshëm ashtu siç kemi kërkuar që njësitë e Policisë që është me biçikleta të qëndrojnë në shteg në shumicën e kohës së tyre, por si duket në mungesë të stafit kërkesa jonë nuk ka rezultuar pozitivisht. Pavarësisht kësaj ne kemi menduar t'i vendosim disa barriera apo disa pengesa të cilat në mënyrë të dhunshme e ndalojnë automjetin të parkohet apo të hyjë në shteg të biçiklistëve mirëpo arsyeja përse nuk i kemi vendosur në fillim është se nuk kemi dashur të krijojmë probleme të qasjes së bizneseve përgjatë asaj rruge ku ka shumë biznese e që do të kufizoheshin ato biznese në një formë dhe këtë na e kanë thënë në takimet që kemi pasë, mirëpo siç po duket ne do të detyrohemi të vendosim pengesa dhe në një të ardhme të afërt me kontratën e re që do ta lidhim do të parashihiem edhe pengesa me qëllim të ndaljes së parkimit të automjeteve nga ata vozitës të papërgjegjshëm të cilët e pengojnë lëvizjen e lirë të biçiklistëve.

Sa i përket pyetjes së z.Arjant Topanicës, lidhur me semaforët të cilët nuk janë funksional e që puna e tyre nëse mund të them është bërë temë interesante dhe që shpesh bisedohet për këtë, mirëpo këtu hapur ju them se semaforët nuk kanë defekte dhe janë në gjendje të mirë dhe janë në rregull ashtu siç janë vendosur në fillim, por i kemi ndal ne qëllimisht dhe arsyeja e ndaljes së tyre ka qenë edhe kërkesë e qytetarëve. Unë e di që ata semaforë sa herë që janë lëshuar në funksion vetëm kanë ngritur tollovi në trafik dhe nuk e ka zbraz dhe nuk e kanë rregulluar komunikacionin, për çka e kemi provuar përmes testeve, dhe tani kemi ardhur në një situatë ku kërkohet të bëhet një ri strukturim i tyre dhe në këtë fazë duhet të përfshihet edhe shtegu i biçiklistëve në ristrukturim sepse domosdo na detyron sepse matësi/sekondari i tyre na ka paraqitur këtë problem. Ne kemi biseduar me shkollën teknike-drejtimi i trafikut rrugor dhe bashkërisht me nxënësit do t'i bëjmë matjet e sakta se si do ta vendosim kohë matësin apo sekondarin dhe këtë do ta bëjnë nxënësit e cekur së bashku me mësimdhënësin dhe me neve si Komunë, e që do të jetë një përvojë e mirë edhe për ata nxënës por do të jetë një gjë e mirë edhe për neve në këtë aspekt. Prandaj e them se kur do që ju e vlerësoni ne mund t'i lëshojmë në funksion semaforët, mirëpo vetëm tani sa janë mërgimtarët për pushime në Kosovë mund ta merrni me mend se çka do të bëhet nëse veç i lëshojmë ata semafor.

Sa i përket pyetjes së z.Artrit Mulliqit, është e vërtetë se mungesa e trotuareve në rrugën në drejtim të shkollës "Xheladin Rekaliu, është shqetësim i përbashkët, mirëpo shumë shpejt do të fillojmë me fazën e punimeve dhe fatmirësisht kemi kontratë të lidhur për mirëmbajtjen e trotuareve, por fatkeqësisht ende nuk ka mbërri me fillimin e punimeve në këto trotuare dhe shpresoj shumë se pas përfundimit të disa punëve që është duke i bërë kompania përkatëse për mirëmbajtjen dhe renovimin e trotuareve, do ta vazhdohet me trotuaret në rrugën e shkollës "Xheladin Rekaliu" sepse vërtetë e dim se është në gjendje të keqe.

Pra këto ishin sqarimet dhe përgjigjet në pyetjet dhe çështjet e ngritura nga ana juaj, mirëpo sërish edhe njëherë ju ftoj secilin që çfarëdo që keni urdhëroni bashkërisht i trajtojmë në zyrë apo në forma tjera.

Meqë nuk pati të lajmëruar tjerë për të marrë fjalën, Kryesuesi i Kuvendit e konstatoi të përfunduar këtë mbledhje duke i'u uruar pushim të mirë muajin gusht meqë me planin e punës nuk ka të planifikuar mbledhje të Kuvendit, përveç ndonjë rrethane urgjente apo të jashtëzakonshme.

Mbledhja përfundoi në ora 17:30

Procesverbalin e mbajtën;

Enis Sheholli

Nr.prot.01-060/04-0062837/22

Podujevë, datë, 29 korrik 2022

Kryesuesi i Kuvendit

Hilmi Hoxha